

萬 有 文 庫

第七百種

王雲五主編

文山先生全集

(三)

天文祥著



商務印書館發行

845
567
V.3

萬有文庫

第七百七十一種



商務印書館發行

840 845.26
5657 5674
V.3

008981

文山先生全集

(三)

天文祥著



國學基本叢書

文山先生全集卷之七

啓

上權郡陳通判高謝解

是邦大夫賢者。聿新道藝之寶興。吾黨小子。斐然得遇功名之主宰。僧彌出法護之右。越石居楚金之先。人羨二難。已叢百媿。竊惟奎開我宋。箕壽斯文。堯叟以壯歲拏魁。堯咨爲之接武。子由以弱冠登第。子瞻至於聯芳。孫何齊孫。僅之名。宋祈遜宋郊之榜。韓家閔閔。吳氏簪纓。皆一時兄弟之傑然。乃我朝科目之盛者。甲於江右。未若廬陵。名耀帖金。以一門而五輩。筆香檀墨。不十歲而七劉。或踵接於童科。或肩摩於胃監。耀煌簡冊。雜選衣冠。至今文水仁山。猶想流風遺俗。雖巫步亦期似禹。然賜賢何敢望回。如某者。技等飛颺。才長縮蚓。故家喬木。借秭歸舊峽之陰。官錄雲萍。分白鷺餘波之潤。勘皇祐勝帖。久寒石室青氈。閱癸丑狀頭。曾入本心墨譜。恐負前人之弓冶。勉爲今日之箕裘。有嚴君焉。唾棄萬年之詔味。難爲弟者。誓齊兩到之英聲。故唯諾怡愉之間。皆切磋琢磨之地。晨窻花露。滴乾硯眼之鳴。夜帳木油。剔盡按頭之蠹。以孝弟忠信爲實地。以功名富貴爲飄風。非六六餘子之儔。有飄飄凌雲之氣。自染指時文之鼎。卽梯身季考之階。愈出愈奇。頗類黃絹外孫之蓋白。屢選屢中。幾成翰林學士之蒞。遂令伯氏吹埴。仲氏吹

鏡。過辱庖人繼肉。廩人繼粟。方嗟雌伏。未遂雄飛。適槐粟之揉黃。借棣華而拈采。擲番散子。同拏喝六之籌。彎起弓弦。共上中紅之垛。天開雙眼。地放一頭。渴睡漢。平白解嘲。擲揄鬼。分明東首。二句賜第。皆以沈內翰相期。十八奏名。僉謂劉學士可繼。使小子自此升矣。皆先生進而教之。茲蓋恭遇某官。秀孕天台。英蜚帝學。萬乘器可繫。唐柱五色線。要補舜裳。器古疊於盆盎之中。韻黃鍾於雜優之地。一從分刺。名雖沂郡之王祥。兩屈護麾。實則潁川之黃霸。斯民廣廈。吾道泰山。螺川醉多旨之春風。燕寢樂近民之暇日。政安赤子。解弄挺之亂繩。兵撫清人。戢攘斂之橫彙。雖借我二天之有幸。恐尹京五日以趣還。茲以題輿。委之勸駕。至若豆箕之朽質。亦該花帖之榮恩。是宜拂楮雪以牋誠。候屏星而布謝。誓當鞭策。不負揄揚。諒大賢何所不容。知孺子尙或可教。晉公得二俊才士。不無汗赭於前脩。古靈薦三十餘人。尙冀牙緝於後進。

上倉守李愛梅謝解

執轡而御於君。風裁久欽司隸。推轂而輦其正。天人幸遇翰林。欲借方寸地。吐氣而言。敢操盈尺紙。循廊而進。切謂烏河陽方司鎮。鉞石生隨就禮羅。王豫章未下使車。苟爽已騰辟剡。蓋人非卞和。玉闕石竅。而世無伯樂。駒困鹽車。必假先容。乃梯後進。切念某策非魯客。材僅莊林。自垂髫逮二十年。知肄業爲第一事。家庭自爲庠序。要祖庶江興學之風。文字懶傍門牆。惟準石室立言之法。遙睇故家之木。勉爲良冶之

弓子玉應而父金春。伯墳唱而仲篋和。夜按剪燈。帳幾成墨。凍窻呵筆。火不思爐。每因染教於芹香。屢獲聯輝於萼集。角能戰蟻。占序榜龜。明社陽秋。過許洛中之陸。鄉評月旦。謂非吳下之蒙。龔踏黃槐。聊窺班管。合三萬餘於園棘。爭六十八之帖花。如小子者。車載斗量。況有司之沙披石汰。誰謂燭几駒意之際。遽蒙黃鍾曷洗之褒。風健鶴披。騰北海一雙之鸞。雲橫鴈翅。搏漆園九萬之鷗。必侍郎穗筆。噓而送之。則進士虎榜。自此升矣。茲蓋恭遇某官。百梅風格。八桂雲仍。羅哈門兵甲於胸中。激淮水淵源於筆下。風檣陣馬。不足爲勇。長吉之文章。景星鳳凰。快觀爭先。王濬之名望。早躋顯第。徧歷要途。嘗膺北闕之詔。綸出領西江之衣繡。兒童猶誦君實。野老皆識元城。惟虎城舊治。嘗屈典麾。故螺水重來。又新持節。蘇疲民於恩露。清奸吏於壺冰。坐念鉛爲銛。跼爲廉。安有書如絲。官如毳。燦連檣。粧執樂。舊句重賡。繪閱庫。粟埋梁。新謠繼作。茲屈皇華之使。就延鳴鹿之賓。某忝以釜箕。玷茲玉笋。敢不淬庖人之刃。誓無荒陸氏之莊。云云。

賀吳丞相革

再登鉉路。首冠鈞庭。以進士爲名臣。兩朝倚重。以儒宗爲宰相。四海具瞻。天啓聖衷。國有生氣。某官洪深而肅括。光大而直方。喬嶽泰山。微細悉歸於涵育。青天白日。奴隸皆知其清明。頃天子以爲股肱。舉海內望其風采。霖雨未浹。而收斂神功。泰階未平。而韜闕光耀。共惜溫公之歸洛。猶期潞國之還朝。假逸藩維。久鬱袞繡。歸公之望。均調鼎味。端復鹽梅。用汝之司。公卿大夫。交笏相慶。兒童走卒。舉手懽呼。願中外不

謀同辭。在今古未始多見。斯人之望既切。賢者之責方新。維今言路之不通。最爲天下之大弊。縉紳以開口爲諱事。城關以游談爲危機。如人一家情睽離而衆侮起。如人四體氣壅底而百病生。多故之由。一類諸此。枿更子改。柁轉舟移。惟從衆謀。可以合天心。惟廣忠益。可以布公道。盡解羣疑。衆難之會。克有榮名。成功之休。其惟我公。望在今日。某瞻依有素。慕戀惟深。適造闕以戒嚴。聞揚庭而增抃。以書上光範。先伸賀厦之私。於人見歐陽行展摠衣之敬。其爲懇切。罔既敷宣。

謝吳丞相

渙號揚庭。方慶昭文之命。蒙恩詣闕。適修進士之恭。喜當風雲際會之秋。得囿天日照臨之下。輒陳短淺。爰叩高明。伏念某才不逾人。學未聞道。雖家庭唯諾之教。動欲行其本心。然山林朴野之資。知無補於當世。頃得備地官之貢。遂及登天子之庭。一第榮名。既有慚於負乘。三年讀禮。幾無意於驅馳。宸命光華。自天而下。聖恩廣大。如海斯涵。遂令參京兆之謀。仍許奉團司之表。靖循僥冒。端出庇存。載册戒行。將下天威之拜。彈冠稱慶。遽傳公袞之歸。重惟柳氏之碑。曾辱燕公之筆。讀聖主偏親之語。佩教方新。仰先生長者之風。銘恩莫報。矧復更新於弦轍。自今密邇於鈞陶。喜如其辭。有莫能贊。茲蓋恭遇某官兩朝舊德。一代偉人。金鼎調元。曾接沂公之轍。玉龍擎重。再持忠憲之鈞。屬逢當軸之初。與有得輿之慶。某敢不勉摠素學。圖報明時。仰台宿之麗天。既近輝光之照。占赤雲而赴幕。尙依覆轡之仁。

先生之父革齋先生墓誌銘。乃江古心撰。履齋題蓋。道體堂書。

謝丞相除秘書省正字日

竊祿叢祠。方重素餐之媿。備員蓬館。遽叨黃紙之除。由大鈞之無垠。故小子之有造。輒據短淺。庸瀆高深。伏念某。大江以西。一介之下。幼蒙家庭之訓。每欲行其本心。長讀聖賢之書。初何補於當世。從事一研。起身諸生。偶遭際於聖明。獲僥逾於科第。君恩天大。若爲報稱之圖。流俗波頹。常有激昂之志。當前年之赴闕。適強寇之臨江。親見主憂之時。不勝臣辱之義。陳師江浒。恨無一障以宣勞。奏疏公車。倘冀九重之易聽。奔命而歸田里。舉目而盡干戈。江迥川平。非賴整頓乾坤之手。糜沸雲擾。幾無戴履天地之身。骨肉幸全於山林。頂踵皆歸於造化。琳宮香火。揆始分而已。逾石室詩書。尋初心而未究。敢圖非采。獲備茹連。使當登崇俊良之時。而乘校讐圖籍之筆。賢人在內。幸無正朋字之譏。世運方平。雅有讀秘書之暇。顧茲甚寵。非所宜蒙。有懷負乘之慚。無任循墻之懼。使之得進退之正。所以報知遇之隆。茲蓋恭遇某官。勳在王家。澤被天下。圭瓊桓豐。侈召伯之來宣。袞衣繡裳。大周公之歸相。既仗筭策而定大難。將興禮樂而開太平。遂使乾清坤夷之餘。轉爲小往大來之會。至如公選。亦及凡材。某敢不勉企前修。恪持素節。彥博未至堂上。已先蒙許國之知。器之既入館中。當不辱溫公之薦。其爲懇悃。因旣敷陳。

謝皮樞密龍榮

領香火於祠宮。幸書下考。校丹鉛於冊府。誤玷中除。由秦階六符之光。爲廣廈萬間之地。輒裁牘記。仰謝鈞慈。切以登羣玉山。夙號麒麟之勝。持三寸筆。將刊魚豕之訛。是爲朝露之清班。必極人材之公選。我聞在昔。公惟其人。晏殊之學問。楊億之文章。仲淹之聲名。器之之氣節。苟非其類。不在此科。伏念某。學不知方。仕未能信。尋千年之蠹簡。早慕伊顏。得一第之鵝梁。終慚晁董。深考國家之典。每由館閣之途。知負乘之懷慚。恐顛隕之速咎。故方筮仕。已卽丐祠。尙口乃窮。頗愛山深而林密。觀頤自養。徒奉月費以歲糜。敢圖楓陛之疏恩。俾處蘭臺而正字。正恐不免耳。其何以堪之。靖循僥冒之由。端出陶成之辱。茲蓋伏遇某官。清朝良弼。名世大才。變贊化原。大尊主庇民之道。均調皇極。普薦賢報國之心。遂使疏庸。與叨拔擢。某敢不恪持素節。勉企前修。讀木天汗漫之書。尙求指教。陪丹地深嚴之幄。何幸身親。懇悃深。敷宣罔既。

謝何樞密夢然

范質傳衣。曾侈和公之遇。仲淹入館。復蒙元獻之知。使諸公而與同升。豈門生而不知報。輒伸下悃。庸叩中樞。伏念某。石室孤寒。青原落魄。幼被家庭之訓。頗欲得其本心。長讀聖賢之書。初無補於當世。從事一研。起身諸生。偶持軀輪於南宮。獲遇鑑衡於北面。鸞鳳杞梓。舉集權公之門。款段鷲駘。誤登伯樂之厩。名姓雖塵於函丈。足迹未造於切墻。山斗之望。彌久而彌穹。賦畝之蹤。愈疎而愈隔。閉門自守。知尙口之乃窮。遜世無求。惟觀頤而自養。凡竊祿奉祠之日。皆省身念咎之時。承明之慮。著作之庭。未嘗意想。寂寞之

滾寬闊之野。遽拜寵光。胡爲乎來哉。是有其故矣。想木天之清峻。望丹地以凌兢。願非麒麟鸞鷲之英。其如亥豕魯魚之謬。深有慚於負乘。敢自已於循墻。玆蓋恭遇某官。名世鉅公。清朝良弼。持樞贊化。共調傳鼎之梅。報國薦賢。不種狄門之李。遂令公選。亦及凡材。某敢不勉企前修。恪持素節。就中書而見座主。將求一介之先容。以進士而爲名臣。尙賴終身之保任。

謝江樞密萬里

領祠宮之香火。敢望彈冠。掌冊苑之丹鉛。誤蒙推轂。薦非由於識面。事真可以語人。頂踵銜私。額手奏記。切以觀遠臣以所主。孟子以言進退之閑。遇大賢而相知。韓公以爲遭逢之盛。蓋受恩非天下之所少。而知己得君子之爲難。乃若初無左右之先容。獨受門墻之隆遇。以古道之相與。尤人生之至榮。伏念某才不逾人。學未聞道。雖家庭疇昔之教。動欲行其本心。然山林朴野之資。知無補於當世。執經而後。承恩以來。念景行在四海之遠尊。而科第非終身之能事。頗欲自拔於常人之類。庶幾無負於上帝之衷。頃趨闕下之時。適際江干之警。主憂臣辱。念我生之不時。外阻內訌。繫禍至之無日。因撫躬而思奮。遂投醜而獻言。當時破腦而刎心。何啻焦頭而爛額。有倉卒等死之慮。無毫髮近名之心。六太息之陳。豈曰賈生少年之過。三十字之獻。幸寬郇模東市之誅。逮時事之既平。滋人言之無據。小體者。戚其失措。好事者。高其得名。痛痒無知者。以文采爲賢。操挾不正者。以譁競爲議。匪躬之故。俱莫諒於初心。尙口乃窮。嗟難行於直。

道既奉祠而竊祿。額閉門而讀書。未可與俗人言。姑盡吾分內事。不謂見知於長者。遂勤延譽於諸公。承明之廬。著作之庭。未嘗夢想。寂寞之濱。寬閑之野。遽沐寵光。非華衰有一字之褒。何弊帚增千金之重。雖深慚於負乘。然幸出於鈞陶。永堅乃心。欲報之德。茲蓋伏遇某官。清朝碩輔。昭代真儒。胸中括石渠東觀之藏。海內仰天球河圖之瑞。唯世道深屬我公。整頓乾坤。共屹江流之柱。獻納日月。入旋斗極之樞。非徒耀不世之功名。將有意太平之禮樂。凡今小往大來之會。多出前推後挽之功。遂使疎庸。例叨拔擢。某敢不力持素節。勉企前修。稱彥博於都堂。幸借郇公之譽。薦仲淹於館職。敢忘元獻之知。

賀江左相

大老造朝。元臺正席。歸公有袞繡。我來自東。用汝作鹽梅。王置諸左。三台明概。八表清夷。洪惟我朝相業之隆。莫如元祐家法之懿。潞公平章軍國。司馬實位昭文。正獻議論廟堂。徵仲嘗升左轄。或以學術真純而輔君德。或以人物直諒而當帝心。續遺響於先秦兩漢之前。文章鉅麗。挺雄姿於黃河泰山之上。器量崇深。此自古之難兼。蓋於今而獨見。共惟某官。行關百聖。名塞兩間。於前輩人。期之以伊尹傳說。今從學者。尊之如韓愈孟軻。尚論公之平生。有報國之大節。以君子不用爲我恥。以小人未退爲己憂。童兒婦女。知其血忱。縉紳大夫。想其風采。自其驅馳外服。出入中朝。洛中偃仰之年。江上經營之日。以至贊先皇之大政。參嗣聖之初元。賢與不賢。一言定其可否。用或弗用。四海視以重輕。卓然一時人望之宗展也。三代

王佐之事。屬登庸之伊始。問夢卜以孰賢。朕安得斯人哉。固無踰老臣者。乃申帝指。乃穆師言。金甌覆崔相之名。銀信趣鄴侯之覲。朝士舉笏相賀。都民遮道聚觀。天子引見以勞歸。東朝出饌以錫宴。遂由政路。徑秉國鈞。先天下而憂。斯能後天下而樂。有聖人之任。將以行聖人之時。莫難得者。海內相望之深。最罕遇者。君子氣類之合。方今師維尙父。右舉皋陶。贊襄於都俞之間。寅協於和同之際。鈞無垠而播物。相天地。理陰陽。鼎有足於承君。安國家。定社稷。昔講於洙泗者。困道路之厄。而學於河汾者。抱禮樂之慚。道之行歟。時則可矣。俾我后五三之盛。真吾儒千一之榮。某猥在山棲。欣逢庭冊。親見上下龍雲之會。豈徒門闈燕雀之私。陽翟歸耕。回首舊時之學士。徂徠作頌。傾心今日之太平。慶抃情深。刊摩語淺。

馬右相庭鸞贊

紫宸播告。金鉉登崇。歸周公於東方。來大老。舉皋陶於右。復得良臣。九鼎尊安。三靈開懌。自馬服君之著姓。至伏波氏之封侯。燧進侍中。特超居於外府。璘遷僕射。姑借重於將壇。惟賓王起自書生。在貞觀號爲真宰。然以草茅之疎遠。出於羈旅之遭逢。未有親拔巍科。素居清望。布衣之極。以一編爲帝師。都門之中。不十年至相位。於皇盛舉。變掩前聞。恭惟某官。得聖人之和。抱王佐之學。高山蓄泄。有潤澤萬物之功。太極渾涵。無運用四時之迹。自顯昂縉紳之日。已雍容廟堂之風。告后惟良。有謀猷則順于外。敬王如我。非仁義不陳於前。其出處不可瑕疵。其喜怒未嘗形色。龍潛羽翼。栽培不世之風雲。鸞禁絲綸。醞釀後來之

魚水。先帝留之爲宰輔之備。主上待之以師傅之尊。徑邁羣公。徧登兩社。或主東廳之典故。或參西事之經營。鄴侯之跡大奇。安石之名愈重。兩宮明聖。一老辯章。既峻昭文之選。遂正集賢之拜。朝家用元祐之故事。學館獻慶曆之頌詩。儒者之遇。僅有而絕無。天下之望。方來而未已。簡淡獨周於事物。晦叔所以有立於潞國司馬之間。忠恕不離於須臾。堯夫所以無媿於正獻微仲之際。前哲之風流未遠。太平之幾會有開。豈特輝簡冊於二百年之前。直將植風聲於千萬世之下。某喜傳鴉字。驚起牛衣。知廊廟之有人。爲國家而增氣。昔通政府。無書或詭於門人。今誦相麻。交賀敢遲於朝士。其爲拊蹈。罔旣刊摩。

通章簽書鑑號杭山

茲者。恭審渙號明廷。普籌宥府。風生黃道。衛宸殿之凝嚴。星度紫清。煥斗杓之赫奕。真儒無敵。中國有人。竊惟我朝之盛明。最繫君子之翕合。永叔之參兵柄。在魏國位平章之時。堯夫之贊樞庭。當路公判重事之日。於以笙磬治平之政。於以墳茂元祐之功。若稽前聞。復見今日。恭惟某官。知周而道遠。仁熟而義精。和風甘雨慶雲。備四時之正氣。高山深林鉅谷。名一代之魁人。當屬者爲小官之初。已淵乎有大臣之器。誰起諸國人之謗。我衣而褚之。我田而伍之。公真大丈夫所爲。匪席可卷也。匪石可轉也。突兀南都之鐵壁。卷舒滕閣之朱簾。在江湖。在朝廷。時人望其大用。爲臺諫。爲侍從。識者恨其已遲。六飛之馬。莊重而不馳。萬斛之舟。舒徐而後進。厥今天助順而人助信。大在廷而細在邊。江漢沔水朝宗。載揚我武。夙夜。恭命。

宥密無競維人。遂升兩社之班。爰贊五兵之本。宰相計安宗社。大師時游廟堂。參之以運籌帷幄之神。輔之以折衝樽俎之密。衣冠盛事。具四方巖石之瞻。寰宇一堂。有三公鼎足之勢。遙觀大業。丕建隆平。某置耳山棲。傾心廷播。親見天地雲龍之會。非爲門闌燕雀之私。傳江西宗派之圖。敢云入社。誦徂徠聖德之句。請繼作歌。抃蹈之深。敷藜則淺。

賀倉守趙編修端齋

侯藩課最。庚節陸華。常平專歛散之功。廉察展澄清之志。有識交頌。不謀同辭。恭惟某官。璿派清流。玉班雅望。早贊樞庭之畫。遍躋府寺之崇。結知前旆。試庸外服。幸甚趙大夫之日。來臨歐六一之鄉。廟堂知其爲循良。田野誦其爲豈弟。二天不啻。兩年於茲。雖明公屢上丐閑之章。而天子正深倚重之眷。爰畀茶鹽之任。聿增慶節之光。鮮于一道福星。式快輿情之望。晉公三司真使。行膺御札之除。某仰席庇休。倍深欣抃。大廈成而燕賀。敢修奏記之恭。六轡沃而駟馳。實切執鞭之戀。其爲贊慶。罔旣敷宣。

回瑞州羅權府

遙瞻松雪。久羨灑冰。麗捲西山。撫輿圖於錦水。書移東里。醒午枕於桐鄉。寵委新編。輝生棄弁。天高地迥。諒碧落之知心。日光月華。看紫微之潤色。謝私何限。嗣敬以陳。

回吉州繆守送端午

端午賜衣。漸傳靈召。昌陽薦俎。忽沐珍頒。行人竄然來思。野老爲之驚見。某官心清於水。仁行如春。岐麥詠漁陽。方騰善政。角黍記荆楚。尙念流風。亦分百索之餘。遠及一塵之陋。某條驚晝晚。良感慇懃。剪綵艾以爲嬉。強酌佳節。對燈花而作報。多謝故人。

回朱約山賀生日

鄉有達尊。獲在嫡孫之行。我生初度。誤蒙大老之知。庭實駢羅。使華驚見。共惟某官。世間活佛。天上壽星。乘萬戶如張子房。而壽考遠甚。領諸孫似郭中令。而精神過之。尙憐蒲柳之新姿。分以松椿之餘福。既受賜矣。細吟香山三十六之詩。何以報之。還祝崆峒千二百之壽。

餽朱約山歲禮

歲無多子。驚爆竹之候來。盤有五辛。喜屠蘇之末至。晡時大老。萃止繁禧。喧轡馬。散林鴉。遙傳歲頌。臥籠兔。橫盤鯉。聊見鄉風。

回前人餽歲

一壑棲遲。不覺歲年之晚。五雲飛墜。頓生草木之春。分四老之玉塵。起初平之白石。某官陽和着物。壽極當霄。門有垂車。換桃符之新句。庭多戲綵。沸竹爆之驩聲。猶推椒柏之芳馨。散作茅茨之光寵。某肅登嘉。祝祗佩盛心。嘆巷北之椰榆。吾癡未醒。祝樽前之強健。翁醉何妨。

回前人賀生日

富公七十九歲。踈九老之不如。潘岳三十二年。覺二毛之已見。方揆余之初度。忽惠我以好音。疇昔折疊行之謙。從今悅親戚之話。永爲好也。長歌白雪之章。還以事之。願壽青山之約。

回彭知縣賀生日

潘岳閑居。已覺二毛之見。盧仝破屋。忽驚三印之來。愛之欲生。錫以難老。親戚情話。若是綢繆。宇宙吾生。不勝感慨。矧復贈我。永言好之。讀三星行。誰解嘲於南斗。壽八百歲。尙徵福於彭城。

回太和趙宰賀生日

三載淵明。幸相望於五柳。今年潘岳。覺已見於二毛。懷哉好音。貴我初度。愛之欲其生也。忠焉能勿誨乎。一鶴自隨。約青山於未老。雙鳧何許。感流水之相知。

回太和趙尉賀生日

潘岳閑居。已覺二毛之見。盧仝破屋。忽驚三印之來。爲此大小年之光。異哉神仙尉之寵。錫以難老。愛之欲生。陽春白雪之詞。眞成寡和。流水高山之約。安得相逢。

回胡宜教賀生日

春華如水。驚三紀之流光。夏綠滿園。又一年之初度。方拾薪而煮瀑。姑攝草以供茶。敢意谷虛。有來庭實。

錫之廚珍。以起其牢落。將之篚厚。以申其懇勤。門外桑弧。自嘆男兒之老。里中羊酒。敢忘親戚之情。

回蕭子蒼賀造居

東門掃軌。方尋歸隱之盟。依山結廬。聊作奉親之計。正辛勤於結構。辱折寄於芳馨。室虛分塊。圮之春庭。實委繽紛之貺。想兒郎之歡喜。共舉草堂。謝介使之勤渠。寄將梅驛。

賀朱太博得祠

楓陞疏榮。蓋宮領秩。平分風月。暫橫綠水之舟。寄傲烟霞。新入壺天之宇。相羊得所。進退有階。共惟某官。一世精英。盛年華要。春風滿座。人知公揆之懷。雲谷讀書。我得晦翁之樂。聞已速夔龍之武。未容高鴻鶴之飛。某同志有人。相期何許。臥箕箒谷。正尋白水之盟。望麻姑山。輒致黃冠之賀。

送章主簿成功赴宏詞科

徑辭矮屋。前赴大科。開五十難。以試教官。是名上等。分十二體。以取詞學。尤見宏材。慶熊魚之得兼。觀龍象之第一。某冬烘自昔。晚歲相期。久此妙音。不到蓬宮之處。看君名第。又光杏苑之年。

回廬陵趙簿投贄

我輩蓬蒿。正堪羅雀。美人錦繡。上有棲鸞。懷哉六謙。持此三過。某官鳳其翽翽。麟兮振振。吹大乙之烟蓊。歛然特起。織天孫之雲錦。輝乎相輝。有是簿耶。自此升矣。某細敲白石。遙想綠綈。看南山之雲。惠而好我。

穿東郭之履欲往從之。

回吉州陳守緯

台州人。葉西園表親。大常丞。

分牧龍藩。此非子坐。退耕鶴隴。乃得公書。紛六轡之光華。賣一廛之榮寵。某官照人白雪。有脚陽春。蒙福凡十萬家。民歌載路。薦人至二千石。相譜滿門。籍甚噓枯。居然起廢。某豈堪作吏。真足爲氓。儻一壑之無他。維五雲之在上。吟詩自樂。退求元亮之心。設榻相看。徒感陳蕃之意。稟辭不敏。摧謝未央。

賀前人除福建倉

藩條報政。庾節敷綸。雲閣森嚴。上接神奎之府。天囿明樞。下臨須女之虛。天啓九遷。民爭二竟。共惟某官。渾金璞玉。甘雨祥風。家有旂常。籍甚東山之名姪。身雖朱紫。依然太學之儒生。蚤騰駿馬於雲霄。遂主神螺之風月。人懷惠政。帝有恩言。奪南國之二天。遣東甌之一佛。常平典在。武夷之文獻可尋。宰相時來。文程之聲徹孔邇。某退耕膝野。喜趣曹裝。輒持行李之恭。庸展塗芝之慶。事大夫賢者。庶自附於攀轅。以我公歸兮。將不勝其賀度。其爲頌抃。曷竟敷陳。

賀劉省元夢薦登科

辛未省元。甲科第九人。衡教。

蘭宮授穎。甲第傳臚。過千曰俊。過萬曰英。人間健筆。第一爲魁。第九爲弼。斗北脩名。柯峯翠濕於飛纓。泮水清搖於振鐸。行徹舉比之席。卽歸鸞翻之班。某正僻耕寬。遂稽箋賀。賦雲山之紅樹。焉得往從。摩石室。

之蒼苦不堪持贈。

迎寧國交代孟知府

共審肅將一札言牧雙溪紫馬西來照旌旗而出色玉麟外遺覺彖籀之生輝上日先庚懽聲旁午竊深慶抃欽以某官羔裘豹袖玉質金相說書而動京師素積行秘書之學把麾而去江海重爲賢刺史之勞少稽漢郡之三公嘉惠建州之千里某久哉望歲際此行春宛水明樓已敬虛於中舍照亭簇騎敢先候於前茅謹具申聞伏惟丙照。

除湖南憲通交代李樓峯

李改除漕

東風一道喜鵲錦之生花元日十行愧牛衣之換繡幸甚葵丘之新好託於杏苑之舊盟一介施先七襄敢後共惟某官負宇宙之志出文獻之傳高山深林世載其魁傑青天白日人知其清明地望接乎西平聲名垂於北斗瑤編玉牒參天上之神仙紫界粉牆隔人間之風雨盡鳴琨而登駁娑乃彌節而下控同民五袴而牛犢滿家米萬橋而蠶桑遍野屬凝旌之西顧遂持斧以湘行風動襄帷祝融七十二峯之雲曉星沉貫索太微二十五宿之芒寒江春洗蘅莊之愁庭畫臥桁楊之影方山搖而岳動俄斗轉而星移五丈原之流馬木牛運於樽俎八景畫之晚鍾沙鴈同是江山我公之二界無爭先君之四封如舊然而江濤如許原隰謂何溫公嘆子駿之福星不宜居外文正服張公之大體引以歸朝爰重中權式光前軌

某生而散。分也。嶽崎。飲蘭露。餐菊英。哺鳥有味。裂荷衣。焚菱製。夢鹿何心。每爲梁甫之吟。有感長沙之賦。曩於飛輓。徒觸危機。今見平郊。猶驚曲木。賴有同年之宿昔。互爲一日之交承。春爲秋先。秋爲春後。甲入乙舍。乙入甲家。曲江會上之風流。南岳雲邊之禮樂。荆俗相傳於佳話。蕭規幸淑於前猷。睇騶駘之光華。敢云並駕。隨雲龍而上下。儻許執轡。欣蹈之私。誦言莫既。

賀前人改除湖北漕兼知鄂州

日陞揚綸。冰輅作屏。北斗丹梯。勾陳玉檻。聯郎宿於天階。洛宮碧樹。巫峽青山。迎福星於江夏。光稠符玉。色動轡絲。恭惟某官。鐵馬行空。金虬驚海。離離珠壁府。懸黎垂棘之光。耿耿斗牛虛。干將莫邪之氣。灑翠竹碧梧之韻度。發清霜紫電之神奇。太微二十五星。旌搖江漢。祝融九千餘丈。節倚雲霄。當驅馳吟遣使之時。每慷慨讀出師之表。落落襄樊之事會。悠悠江漢之風寒。局面一新。機神頓發。師垣制勝。集忠益而開誠心。帥闕請行。從便宜而上方略。武承先志。孰與明公。乃峻冰臺。乃陞寶屐。練鵠錦之廉車。改觀黃鶴樓之衛戟。生風餉高密之師。借恂河內。詔西平之子。贊度淮堧。節鉞合而氣勞張。弓矛重而精神壯。北代歌功於六月。中興刻頌於萬年。樓船過洞庭。旌旗直下。闔闔開黃道。衰鳥過歸。某方協寅衷。喜傳卯詔。界上爭杜衍。想共戴於我公。方面待乖崖。將遂誇於吾榜。行行會弁。疊疊賀床。

賀前人生日

暢月先春。福星初度。朱綬錦艾。聯赤璧之六絲。蓬矢桑弧。絢紫微之五色。玉書吐箴。繡紱生輝。恭惟某官。風骨清剛。精神大耐。仙人駕黃鶴。色照洛宮。老子跨青牛。氣浮函谷。壽八荒而哀福。律九寸以迎長。棠陰照响。鸞之央。十分翠曉。桃影近蓬萊之水。一朵紅雲。某夙分碧落之香。遠認瑤池之色。一車以南。一車以北。軫軫相望。千歲爲春。千歲爲秋。心心持壽。

賀化地冬

舞雲門而奏至。六琯函和。占星壁之正中。三階齊色。芝香丹禁。穀介黃扉。恭惟某官。心見乾坤。身持元會。御床親捧。耀五龍夾日之光。寶鼎密調。胚萬衆皆春之意。燦火城之鶴籥。領圭鳥之鷺行。宜哀塊圮之和。茂集陶鈞之福。一陽出地。露玉燭之光芒。五色書天。開金穰之瑞慶。某叨繼乘輅之乏。殊慚把繡之長。絢色線於帝裳。乃心上袞。跂黃雲於仙屨。莫尾賀恭。頌詠情深。敷藜喙短。

賀化地正

帝堯授曆。肇開平秩之端。周公爲師。實主泰和之運。光華絕席。塊圮方維。恭惟某官。玉燭際蟠。鈞陶動植。調元神鼎。心包太極之春。捧日扶桑。色照蒼精之角。條鬯東南之溫厚。填滂上下之明良。拜晉國大夫人。慶祥符之真宰。邁潞公平章事。登元祐之昌期。億載敬休。八荒開壽。某困身洪播。稽首獨班。三陽君子。泰來仰贊。茹茅之盛。四柱王事靡盬。俯同苞杞之生。致賀輪囷。殷忱稿積。

賀簽書冬

暑躡南陸。一線迎長。星麗西樞。三階齊色。哀時夾社。穀我英髦。恭惟某官。元會運之經綸。天地心之藁籒。黃雲乘輶。肅劍履於大昕。繡日補裳。領衣冠於亞歲。鼓舞黃鍾之雅。陶鎔緹幔之溫。萬物生輝。回餘光於草木。八荒開壽。鬯新渥於乾坤。某承乏湘輅。馳瞻魯觀。芸香透暖。尙憐采若之寒。梅意先春。預闡和羹之候。葵葵是祝。草草奚殫。

賀參政正

簽書樞密院筆

東角耀芒。開三朝之景運。西樞齊色。轉萬象之洪鈞。碩輔均弘。方輿錫羨。恭惟某官。明謨贊化。熙績亮天。金鼎調元。共幹太和之運。玉衡測影。首參平秩之功。填虎宥密之經綸。鼓舞明良之際會。徵歌中國。壽細柳之春風。花滿上林。揭扶桑之曉日。四方來賀。三壽作朋。某身逃馳駟。神傾垓北。拔茅連茹。言觀君子之風。集杞方苞。尙念使臣之遠。輪囷致頌。藟桔箋忱。

賀江丞相除湖南安撫大使判潭州

舊弼起家。价潘建闢。姬公相周而爲左。方遂明農。召保分陝而守西。又新維翰。威行夷夏。運在東南。恭惟某官。壽俊兩朝。禮樂四代。修名偉節。以日月爲明。泰山爲高。奧學精言。爲天地立心。生民立命。水火不爭。於鼎鼎泥金。各就於陶鈞。本之身心。暴秋陽而濯江漢。措諸事業。膺戎狄而懲荆舒。起觀一世之安危。端

繫大人之出處。當世道未寧之日。正遼人相戒之時。乃攷一道之玉麟。乃授三公之金鶴。謂捍荆門。吞夏
汭。寄莫重於星沙。豈挹浮丘。拍洪崖。閑可專於綠野。安石起東山。而符秦潰。孔明渡瀟水。而孟獲擒。維茲
銀濤青壁之雄。倚我錦艾朱紱之重。功隱存於宗社。書不盡於蔚常。三軍百姓之歡迎。大開玉帳。一馬二
童之促召。再築沙堤。佐興唐虞。誕保文武。某及門甚晚。知己何深。薦不識面官。每嘆先生之古道。自號報
恩子。豈在衆人之下風。鳳凰出而羽毛朝。蛟龍驤而雲氣簇。一日偃藩之際會。同時誤節之走趨。方當聖
哲馳驚之秋。無限師友從遊之感。孝子回車。忠臣叱馭。司空副相。將交盡於君親。太保上公。惟深期於造
化。潔獨拜下。傾倒由中。

賀前人除特進

碩輔在藩。優恩加秩。撫淳熙左相之舊鎮。赫奕十連。冠元豐特進之新銜。巍峨一品。星馳汗號。雷動驩音。
恭惟某官。耆壽具瞻。宗師先覺。東問典故。西問文學。錦堂丞相之規模。公見庶僚。府見監司。路國太師之
度量。維時台宿。來茨軫邦。熊當道而貉子之膽寒。龍居淵而象罔之迹遠。上思舊德。時有恩言。進左右僕
射之官。增詩書元帥之重。在師中吉。承天寵也。既都錫命之榮。以我公歸。有袞衣兮。卽轉征東之馭。某猥
塵馳轡。阻赴賀床。載鄆淥之清。指玉麟而爲壽。遡斗樞之紫。俟金鶴於方來。

回前人除特進送禮

上公國輔。相望龜絨之華。特進天人。忽枉鸞飛之字。溥乾坤之新渥。賁絢燿之行雲。庭實熒煌。鈞和塊比。芳洲杜若。被紫駘翠釜之榮。驛路梅花。看赤鳥繡裳之覲。熏香詭謝。伏藹沂馳。

行部潭州謝江丞宴

古之學必有師。甫趨函丈。子使人歌而善。肅拜初筵。春風渭北之旗。夜月洞庭之樂。簫韶俗耳。冰雪征塵。車攻廣六月之詩。先聞吉語。帝所聽九成之奏。再相太平。

送前人九日禮

宴龍山九九之節。夙修維藩。開鶴林七七之花。今逢真宰。風清六蠹。霜肅九州。共惟某官。赤鳥元圭。珊戈錫盾。酌長沙酒。快春水之曉行。賦北門詩。喜秋花之晚看。小馳戲馬。重補袞龍。某記影星垣。驚心廳館。跋芙蓉之頂。想千乘之登。高折茱萸之房。爲三公而持壽。

回前人送九日禮

天開紫蓋。秋高淡圃之香。星下碧泉。春到長沙之酒。飛卷五雲之風雨。光華九日之山川。味也深深。恩斯曷稱。北門看菊。幸與分玉帳之清。內殿傳柑。聞已下金甌之信。

賀前人冬

春入重緹。欣聽雷鼗之奏。台明上袞。具瞻井鉞之輝。殺我靡臣。哀時疇社。共惟某官。量包元氣。心見先天。

冠漢殿之仙班。火城如畫。補舜裳之五色。宮線猶香。卷舒昭文館之春風。布濩祝融峯之曉露。蒞闈出色。芸荔舍和。愛日迎長。開一氣八荒之壽。瑞雲促覲。領五更三點之朝。某迹困轉鈞。心馳獻履。近依星軫。愧直指之繡衣。遙贊雲門。歸碩膚之赤鳥。薄言燕賀。永矢螽鳴。

送前人折筵

肇九寸律柄。屬洪鈞。建十丈旗。光生几鳥。馳想雲和之瑟。莫陪壽軫之觴。薄注鄴清。式歌魯瑞。出乘仙轡。遙修南至之恭。入梓建御床。預致東歸之慶。瀆嚴增惕。錫頓爲榮。

回前人送冬酒

噓嶰谷之陽。方覃鈞播。照鄴湖之淥。忽拜袞題。有華舞袖之春風。增賞繡絲之曉日。淺深存。雙理滿。傾北斗之天漿。德澤布。光輝跪。沐南山之雲氣。輪囷鏤感。稟枯刊申。

賀前人正

龍杓麗曉。天開秦內之陽。驛騎明春。星起軫中之壽。和薰青瑄。喜動黃麻。共惟某官。心會陽宗。身扶人統。黻明帝袞。迎瑞日於東郊。纒煥公主。照蒼精於左角。卷劍氣玉烟之彩。增繡裳赤鳥之榮。東作有三百六旬。陶鈞一轉。中書歷二十四考。鼎鑪重新。戒前路之鸞鳳。沸歡聲於重馬。某喜逢雞朔。隲贊熊旂。光近火城。又獻大椿之歲。寒噓雲舍。敢忘寸草之春。鼓賀心馳。箋忱喙短。

送前人酒

開條風於獻節。瑞藹三朝。介壽履於公堂。春生四履。歛神光於雲岳。拓喜氣於沙堤。輒持露淥之窪樽。聊贊鈞天之和鼎。不置錫爾類。懷哉萱草之詩。再入福蒼生。如此椒花之頌。薄將凌蹏。賜頓欣榮。

回前人送春

春回大簇。開雲氣於南山。曉醉長沙。酌天漿於北斗。挹注偏提之調。薰蒸統部之和。綠淨生香。洪鈞轉燠。八仙地隔。莫陪左相之杯。太乙風生。險贊東皇之席。卷卷跋謝。草草箋忱。

賀前人赴召

銀信騰霄。金書照關。映南雲之紫蓋。春滿江湖。歸東雨之袞衣。天開閭闔。行宮絡繹。統部歡呼。共惟某官。以太宗師。爲真宰相。文章若雷。靈河漢。玉色金聲。言行質天地鬼神。丹心白髮。出納祝融峯之日月。卷舒昭文館之星辰。北門小煩魏公。盡寬上顧。中國再相司馬。坐攝衆心。仙人駕綵鳳。以傳音。老子馭青牛。而入觀。碧涵汀芷。曉清沙路之塵。黃把庭麻。夜轉火城之影。某固身化治。舞手揚綸。大老盍歸乎來。共致巖瞻之喜。君子永錫爾類。終徹鈞播之私。跋賀欲飛。箴詞甚枯。

通雅提舉京子誠牧隱

天困照楚。瞻駟轡之濡絲。雨未耕綿。愧牛衣之易繡。合臺容之永好。嚴牘贊之先恭。欽惟某官。冰浸玉潤。

雲嶸鐵壁。沮金石。諧韶濩。音振蓬萊。踞虎豹。登虬龍。氣摩胸臆。覽德輝。翔千仞而下。迴狂瀾。障百川而東。萬鍾何加。一介不取。寧航選海。棹頭不揖於王公。使夢鈞天。平步可登於卿相。莫屈英英之氣。何求赫赫之名。以恢乎玉山壁府之才。亦屑於金署犀監之屬。再命而俯。一車以南。霜飛暑路。旗展春山。輝煌周隕。金聲中朝。玉振江左。照映熊湘。起視西北之風濤。誰是東南之砥柱。必平居曰法家。曰拂士。則臨事爲孝子。爲忠臣。參文公之政於浙西。舉行殆遍。凜清獻之風於殿上。植立方來。某政酣啜菽之甘。不作覆蕉之夢。長鑱爲命。忽持斧以重來。曲木猶驚。雖循墻而莫避。幸甚星臺之近。聿爲鄰燭之輝。繼自今爲王事之圖。增昔者實周行之氣。九折回王尊之馭。爲絕馳驅。四方隨東野之龍。願從鞭弭。匪伊拜下。莫旣由中。

回前人干批書

舊例監司文批

疇庸天庾。趣駕星闈。戒嚴繫日月之書。茂對照乾坤之渥。某稟承有恪。占署知榮。謹具劄子。復申葦結。萬愧。

送前人七夕

瞻雨旗之耀。獨立秋風。依六轡之光。相望七夕。來繡口錦心之巧。贈玉盤金錯之英。鄰酒春深。客堂涼透。牽牛織女。看夜度於天街。語燕留人。且曉吟於湘水。

請前人宴

灌錦湘江。欣觀乾坤之渥。卷簾楚觀。頗懷風月之談。忘蒙漬之爲嫌。冀謙尊之肯訪。薄言卜日。爲慶朝天。富以其鄰。且細論於尊酒。德將無醉。願小駐於鋒車。某輒擬翌日。敬邀崇重。

回前人折送

錦闌星度。喜換禁綸。畫舫雲來。特開臺宴。爲折瀟川之淥。頓生楚觀之春。酌郎官清。卷碧筩而遙謝。懷美人贈。慚荆壁之無酬。

請前人九日宴

紅杏舊陰。甫迎天困之綵。黃花佳節。又飛冰冢之丹。膏車已動於行雲。流馬聿來於今雨。偶龜明日。薄蕙清風。莫置錦屠蘇。且拚小飲。已鑄黃金印。行慶異除。

送前人折筵

鵠立春霄。帥雲霓而來御。鴈拖秋色。喜風月之共談。欲挹注於黃流。盍招呼於綠淨。踴效折枝之瀆。想爲會節之煩。飲露供騷。何取水中之薜荔。倚雲同味。共看江上之芙蓉。

通董提舉楷

號克齋。永嘉人。前知瑞州。

魏闈揚綸。熊湘授庾。刺史二千石。雲度錦河。天困十三星。春浮絲隔。六條先曉。一道生風。共惟某官。閎冠雲霄。樓高湖海。沮金石。諧韶濩。音振蓬萊。踞虎豹。登虬龍。氣摩鴈蕩。清泚三蘇之穎水。崢嶸二陸之象山。

自崑丘鳳穴之鳴陽。卽溟海鵬雲之增翮。上下浙江之明月。早透金閨。翱翔葦路之春風。曉聽魚鱗。灑灑清都之人物。飄飄碧落之神仙。張乖崖斬叛卒於益州。騷動之餘。富鄭公活飢民於青社。荒殘之後。靈書選表。環召歸班。大府上士之清聯。帝思前席。常平使者之新轡。公念南湘。以醴泉芝草之春。爲芳芷杜蘅之澤。九郡顛顛而望賜。四社業業以戒嚴。霜飛暑路。旗展春山。已搖翠岳。烟傍袞龍。日臨仙掌。過侍紅雲。某夙出年盟。今諸鄰好。萬里風雲之天闊。一襟草木之味同。祝融山外之芙蓉。肅迎紫氣。秦華峯頭之冰雪。佇沐清風。

回前人到狀

夙綴鴈題。今聯駱轡。欽侯清風之戾止。亟馳新雨以恭先。甫快低簪。居塵飛翰。天因星近。喜不隔於光華。湘水月明。尙嗣承於談笑。

迎前人

星槎度漢。天庾明湘。丹鳳啣書。光照朱維之色。蒼龍授節。清搖綠淨之波。禮樂輝煌。旄倪鼓舞。恭惟某官。文章大雅。節槩真清。玉立九關。徹芒寒於霄漢。春行千里。蓄精銳於雷霆。屢培後戶之本根。少屈廉車之步武。任一道常平之寄。推九重博濟之仁。不待突黔。趣歸藁紫。某寅同下隲。蔭接芳隣。太史新占。看德星之照軫。故人舊識。喜今雨之來車。

送前人洗拂

振衣碧落。彌節朱陵。祝融驅海若。靈江山搖動。風伯清雨師灑。原隰昭蘇。言解征騶。驛傳回鴈。某年盟有。夙鄰蔭方新。吉日來思。已慶拂龜之喜。臯華近止。輒陳秣馬之恭。

回前人送私覲

今雨來車。方連雲於回鴈。清風落袖。忽分颺於懸魚。捧旅實以若驚。恍使華之如對。報青玉案。頗懷客況之寒。望黃金臺。惟謝年情之厚。

謝前人招宴樂語

雲垂臺蔭。偶陪湘水之行。風度伶音。恍聽洞庭之奏。和氣一堂之律呂。年情四海之弟兄。矧燕花飛舞之時。正鵲錦交輝之日。充庭有喜。滿座爲春。故永歌之尙想五章之禮樂。式相好矣。永懷一片之宮商。

送前人新除禮

峯回秋色。審誰留兮中洲。臺立春冰。歷余征於吉日。烏奕車輿之彩。葳蕤袍鶴之花。注綠淨以傾馳。睨青空而折寄。洞庭霜熟。是爲正好景之時。闕闕雲開。嗣貢眞福星之賀。薄言卷俎。莫究衷旌。

送前人折俎

臺冰正色。錦袍生春。馳華轡之六絲。軫星增煥。鑄黃金之一節。融岳如新。條令具孚。羣倪胥抃。某阻奉卽

真之賀。輒修攝飲之恭。禮無體。樂無聲。慇懃直寄。南有箕。北有斗。清淺相望。持酒恣恣。慶留荷荷。

回前人中秋請宴

照江疊節。載畫舫之清冰。待月舉杯。呼芳樽於綠淨。拜華星之墜几。約明月之浮槎。風雨滿城。何幸南重陽之近。江山如畫。尙從前赤壁之遊。棗結申酬。輪囷嗣布。

回前人折俎

注鄴湖之淥。昉慶臺春。然楚竹之清。倍分鄰燭。載塵卷俎。如侍秩籩。援北斗以酌天漿。既知賜矣。醉長沙而行湘水。悵莫從之。

回前人送酒

福星明處。甫羞北斗之漿。今雨來時。又報長沙之酒。起立寒梅之月影。坐添凍芋之春萌。雖軫軫之相望。真心心之不隔。白絹之封三印。報不成章。黃麻之似六經。又將來賀。

賀前人冬

春入重緹。欣聽雷蕤之奏。星垂練錦。沂瞻沙軫之輝。履此一陽。賁然雙節。共惟某官。聲名雷動。意度春融。大雅正音。得黃鐘之渾厚。純和元氣。探寶鼎之細縵。卷夜月於蓬萊。布曉雲於胸臆。滌蘭出色。芸荔生香。君子得輿。開千載一時之會。使臣濡轡。催五更三點之朝。某斧鑿何功。臺雲借蔭。暖回鄰壁。先鳴鳳之六

第光近福躡會牽牛之七曜。通恣睢知馳賀心長。

又送冬至酒

五紋添繡線。日麗旌旗。一節鑄黃金。春生霄漢。馳想雲和之瑟。莫陪壽軫之觴。薄注鄴清。式歌魯瑞。九疑仙人之履。正快曉行。四牡使臣之車。卽催元會。瀆嚴增惕。賜頌爲榮。

送前人歲節酒

條風開獻節。瑄玉更端。春酒躋公堂。壺冰薦社。皇華六轡。和氣九州。輒獨杜若之清。持向屠蘇之末。軫中星轉。除瞻練鵲之輝。綿上雲歸。爲喚林鳥之夢。薄將增慙。賜頌知榮。

賀前人正

龍杓曉轉。天開泰內之陽。駟轡春行。星揭軫中之壽。雙旌郁穆。疊節焜煌。恭惟某官。清徹壺冰。和鍾瑄玉。葱珩刻劍。輝瑞日於東郊。練錦煌煌。映蒼精於左角。小駐祝融峯之雨露。遍催含光殿之風雲。某幸接臺容。欣同律暖。酌屠蘇酒。願均八荒壽之心。詠萱草詩。曷謝三春暉之賜。傾心來賀。引領欲馳。

回前人送春

杓攜龍角。煥天上之星辰。壽介兕觥。分軫中之和氣。喚醒年華之舊。移來夜酌之春。折芳芷與杜蘅。永懷騷雅。按紫莖坐碧草。險企湘深。什襲知榮。七襄莫報。

得贖送前人禮

上堂拜家慶。偶忝近麾。痛飲讀離騷。有懷疊節。持此清冷之寒淥。進于沅澧之朝霞。望美人兮一方。特慚
絕禮。問征夫以前路。尙肅藥規。輅瀆有慚。麾留斯寵。

回前人請宴

堂有白髮親。誤塵便組。公鑄黃金印。爲舉初筮。移來長沙酒之芬馨。喚起章貢臺之顏色。君子永錫爾類。
已懷既醉之歌。使臣言遠有光。尙借如濡之潤。

送前人別會折俎

楚節易麾。深味慈烏之哺。湘花舞席。險瞻練鵲之輝。思君渥之綢繆。膏吾車而繡綵。上堂拜家慶。遠借光
華。痛飲讀離騷。險同慷慨。區區折寄。盼盼麾留。

回前人別會送酒折俎

回叩坂之車。方隨橋燕。贈蒲城之酒。忽枉帳犀。感動折柳之情。流麗飛花之影。丈夫豈無別淚。不灑於東
西。同年亦有情雲。相隨於上下。銘藏媿媿。馳泝云云。

小人有母。聊分竹以懷歸。君子錫朋。指飛花而賦別。慷慨執社之意。感勤祖帳之文。卷寄良稠。銘感不足。
日暮碧雲合。喚游子於他鄉。月明今霄多。耿美人於河漢。揭麗軫之福星。險詹正色。呼歸航之明月。尙沐

餘光還已催南浦之春。更爲醉長沙之曉。公方行冀部。卽聯獻納之班。吾亦念桐鄉。終席澄清之潤。懷哉折寄。皋甚刊酬。

賀衡州宋吏部上

鳳池綉曉。鴈軸行春。天近蓬山。玉檻照西清之直。風高湘水。朱旗壯南國之游。童竹生驩。騷蘭出色。恭惟某官。山輝川媚。雪跨霜懸。遠景樓高。拂西眉之意氣。靈光殿炯。接東魯之風流。砥柱百川。大車九軌。金鑰玉珂之凌厲。粉牆紫界之踟躕。海荔晴雲。曾度兩轡之影。溪茗夜雨。尙留六轡之光。卷紫氣於河球。韜神芒於浦劍。屈訪禹碑之奇字。小凝韋戟之清香。驅龍蛇放之菹。春生敏手。乘騏驥道夫路。雷動先聲。佇風幕之園春。聽今襦之歌暮。朱陵道院。暫分翠岳之輝。碧落仙人。行侍紅雲之近。某牡驅何補。臆技已窮。地帶九州。輝最親於鄰燭。月明千里。影卽對於朋簪。盥露云云。遡風疊疊。

回前人到任狀

小車戒曉。猥隨竹馬之塵。森戟臨風。快觀梧鸞之彩。纏纏襟期之新雨。煌煌手舉之華星。封侯識荊州。已諗度關之氣。低頭拜東野。願從開岳之雲。儲謝輪囷。刊酬梗槩。

請前人到任宴

虎符新渥。聿來聚軫之輝。鴈嶠初春。喜接浮關之氣。粲梅花之照眼。擷杜若以論心。欲龜告朔之朝。薄燕

行春之色。共剪西窗燭。迎桃李之春風。爲酌北斗漿。卷瀟湘之夜雨。

送前人洗拂

露溶朱旆已空。綠淨之塵。烟淡繡闥。莫侑清香之宴。來新多喜。飲至有森。花邊立馬。竹裏行廚。木末窸蓉。聊將綿絕。水中采薜。謾贊春容。翰瀆知慚。慶留爲寵。

謝前人招宴致語

衡陽虎竹之春。新輝碧落。湘水燕花之夜。共醉清吟。藹俱介之倡。酌發伶倫之揄。詠恭惟某官。黃鍾疏越。丹井甘寒。咳唾珠璣。五鳳樓之錯落。擊撞金石。九龍簾之春容。妙言語之齊諧。寄音容於趙舞。某味深登。席寵復歌詩。相如文豈類。律敬肅齊心之謝。魯侯永錫難老。莫醉思樂之章。什襲意長。七襄辭訥。

送前人特會折俎

慶榮戟之遙臨。幸依香燕。講尊彝之特試。敢去餼羊。折騷客之芳馨。效野人之綿蕝。樂無聲。禮無體。聊寓慇懃。北有斗。南有箕。相望清淺。恣恣持瀆。盼盼慶留。

回前人送物

詹新府之贈帷。有光下隰。來美人之錦繡。於粲西珍。庭實生香。江空出色。綠文赤字。徒深什襲之榮。青玉明珠。莫寓七襄之報。填膺多謝。待面樓陳。

回前人賀雪

行湘水之春。天開光霽。呼霍山之雪。風起縉紛。手提五袴之溫。心出六花之瑞。幻塗鴉之玉界。賞回鴈之瑤田。清憶廣平公。莫形容於天巧。白戰潁水上。預贊詠於年豐。

回前人饋歲

官居家節。坐閱壘茶。兵衛清香。特分瀟灑。來使華於千乘。雜侯餽之八珍。喚醒春意之縉紛。倍覺寒聲之辟易。歌椒頌而懷杜甫。除贊凝森。持梅花以謝廣平。莫酬清絕。

謝前人聚宴折俎

諸侯應郎宿之躔。來從劍外。太史奏德星之聚。偶與席間。傳風味於鄱湖。斂陽和於楚觀。黃堂一杯酒。良佩交情。青烟五侯家。除馳謝臚。

送前人聚宴折俎

凝香森衛戟。近揖春和。舉瓢酌天漿。有懷星聚。爰采澗溪之末。薄陳俎豆之前。爲細民斟。陰想賦西園之雪。從太守樂。鸞言隨東野之雲。瀆餉懷慚。慶留爲幸。

回前人賀正

斗指蒼龍。轉陽和於雄律。尊分白獸。來瑞氣於雌堂。曉醋柏葉之香。暖轉梅花之色。稱壽觥而頌魯。散作

春和。下。褒。靈。以。微。黃。佇。看。天。渥。有。華。什。襲。莫。報。七。襄。

回前人請元宵宴

麗。誰。龍。炬。春。輝。左。角。之。星。碧。落。燕。香。夜。對。西。眉。之。月。特。枉。金。玉。章。之。貺。許。從。雲。霞。佩。之。遊。邊。建。章。立。通。明。預。祝。六。鼈。之。宴。醉。長。沙。行。湘。水。且。聽。五。馬。之。謠。

請前人元宵宴

轉。西。樓。之。梅。月。喜。對。銀。花。持。北。斗。之。桂。漿。擬。陪。畫。戟。僭。卜。仍。圓。之。夕。共。流。引。滿。之。霞。敲。鐵。馬。之。春。冰。肯。來。楚。觀。賦。石。犀。之。夜。燭。細。說。巴。山。

回前人請聚宴

虛。危。出。福。星。光。生。鴈。嶠。斗。牛。有。紫。氣。喜。動。燕。香。爲。開。北。海。之。尊。如。會。長。沙。之。節。益。者。三。友。懷。練。錦。之。新。輝。襄。我。二。人。歌。緇。衣。之。永。好。感。深。緹。襲。愧。後。刊。酌。

除贛守回宋衡袖劄請宴

馳。隄。何。功。沐。崆。峒。之。新。雨。秩。筵。有。命。開。胸。噓。之。春。風。鏗。然。出。衡。袖。之。音。爲。我。助。回。車。之。譜。江。湖。千。里。將。聯。麾。影。之。光。桃。李。一。杯。尙。聽。襜。歌。之。譜。彌。襟。傾。感。走。筆。刊。酬。

請前人宴

太行望吾親舍。偶逢陳情。合江和使君詩。正堪握手敬龜。明日薄燕清風。銜杯接慇懃。聊盡湘行之趣。上堂拜家慶。敢忘穎錫之私。微惠資然。坐邀慇甚。

請前人別會

致節言歸。借末光於郎錦。飛花執別。馳遠夢於客帆。小滿祓於詰朝。更徘徊於勺水。日暮碧雲合。不勝年遠之情。月明今宵多。且盡相親之興。坐邀凌蹏。惠肯知榮。

回前人還請

把太守之新符。獲傳民譜。問征夫以前路。乃辱祖筵。方繾綣於飛花。更慇懃於折柳。南有箕。北有斗。所願挹漿。君向湘。我向秦。若爲聞笛。懷哉傾倒。帥是刊辭。

謝送禮物

捧檄江城。喜繄二天之照。折梅驛使。歡傳千里之香。煌煌慶節之夏盟。纏纏雲仍之新好。某官誼隆金石。香溢芷蘭。誰將西歸。懷之好香。莫殫深謝。詩曰不匱。永錫爾類。惟戴殊知。慈禮將忱。視顏匪報。

通胡都承石壁

叨臬湖南。余征上日。摺衣洛下。伊邇中台。函裁書而敍心。將考德而問業。恭惟某官。出入文武。闔闢樞機。龍虎變化。山林高深。間出魁傑。冰雪聰明。雷霆精銳。獨步艱難。肯綮十九年而刃如新。扶搖九萬里而風

斯下連。懸江海。春浮五袴之聲。疊節東南。星度六絲之影。自任以天下之重。獨賢於王事之勞。金署犀監之翺翔。奎殿紫樞之凌厲。赫奕將磨於活石。逍遙遽薄於蓬萊。此聲梁楚之間。英雄藉甚。長江南北之限。人物眇然。馳旌夜召於長沙。乘驛曉行於湘水。亟躋兩地。試韓范之規模。弘濟中天。遡趙張之事業。某味方酣於嘖菽。夢不到於覆蕉。換烟雨之綠蕪。方深澗媿。起波濤之舊繡。曷稱臺容。緬懷冀部之風。喜近高陽之里。王尊九折坂。願聞叱馭之規。元龍百尺樓。卽展下床之拜。登龍在望。濡兔莫殫。

回楊秘監就賀

貳書壁府。晉講金華。太乙葵青。煥玉山之黼黻。邇英槐翠。照丹井之綸絲。開岳雲回。度堦春早。恭惟某官。岷峨一壁。關洛單傳。玉井冰輪。灑落神仙之韻。簾鍾瑤篴。和平典則之音。自歛起而靈轟。每徐行而山立。稱真侍講。在淳夫正叔之間。號小司成。負安定康侯之望。雉監沐天光之近。螭坳居地望之嚴。羞崑崙而薄蓬萊。枕湘江而會瀟水。萬家燈火。雨籠絃誦之聲。千里桑麻。雲度袴襦之曉。君不淮陽之薄。上深渤海之嘉。圖書歸領於瀛州。鍾鼓行尋於長樂。銅印水蒼佩。亟紆宣室之思。白馬金盤陀。漫近文昌之拜。某相望千里。一別六年。綠蕪風雨之中。方茲餐菊。舊繡波濤之後。復爾夢蕉。喜追東海之龍。來趣衡陽之鴈。恍絕塵而瞻後。剖半夜之召前。懷駟駱之載馳。敢安絲轡。藥駟驥以先路。遙想雲旗。贊賀葵葵。刊酌草草。

文山先生全集卷之八

啓

通丁侍郎應奎國瑛

誤節讞湘。馳驅上日。振衣過洛。咫尺中台。拜下有期。恭先告至。恭惟某官。黃河泰山之望。咸池大濩之音。學問覃傳。安定公之蘊奧。文章獨步。歐陽子之聲名。空萬馬以無前。領衆星而直上。慷慨玉廬之給札。聯翩壁府之影纓。一麾江海以翱翔。載駕風雲而磅礴。翠帷麟觀。螭陛鸞臺。天子穆穆以親賢。海內顛顛而望賜。方千仞翔而覽下。乃六月息以圖南。矧如聖哲馳驚之秋。正切廊廟論思之益。胡不起金魚而垂帶。而乃新瑤象以爲車。弭節愈窮。履星采近。賈生見宣室。亟紆半夜之思。安石起東山。大衍蒼生之福。某相望千里。一問十年。綠篔風雨之中。菊餐有味。舊繡波濤之地。蕉夢何心。詎期漢節之來。喚醒楚騷之讀。黃緣通德。親切依仁。瀟湘逢故人。尙軫蓬鯨之舊。霖雨思賢佐。佇看芝鳳之新。傾耳一言。拜手三肅。

通楊提刑允恭驥高峯

誤節讞湘。載驅上日。振衣過洛。伊邇下風。望履有期。擘牋告至。欽惟某官。溟南健翮。斗北修名。玉尺冰莖。灑落絕塵之韻。瑤琴錦瑟。和平瑞世之音。自炊起而霆奔。每徐行而山立。提振春陵之風月。縱橫周序之

鼓鍾日暖旌旗一麾玉帳春明霄漢三道繡衣驅馳靡憚於賢勞出入有關於民命方千仞翔而覽下乃六月息以圖南矧今聖哲馳驚之秋正切英雄經濟之略江濤如許泉石謂何召賈誼於長沙上心久渴見夷吾於江左天下何憂某飲菊悠然夢蕉儻爾起家乘傳念舊繡之波濤長道回車想綠簔之風雨幸近十洲之島冀沾九里之河滕壤舊塵曾識平反之譜周原新轡願承鞭辟之方拜下非遙由中莫旣

回李安撫肯齋

叨臬湘南余征上日樞衣洛下伊邇中台亟裁書而鉞心將考德而問業恭惟某官名門人傑昭代吏師醴泉芝草麒麟天生瑞質高山深林龍虎代出魁人見謂西珍蔚爲南望自覽德翔千仞而下卽回瀾障百川之東粉牆紫界之躡躡玉檻丹梯之凌厲連麾江海風馳五袴之聲疊節荆吳星度六絲之影以天下而自任何王事之獨勞迨授鉞於千畿乃進書於九扈俄動平地神仙之想來尋往時鍾鼓之盟湘水春深未許放情於黃老虞廷日永行看翔舞於夔龍某飲菊悠然夢蕉儻爾起家乘傳念舊繡之波濤畏道回車想綠簔之風雨幸近十洲之島冀沾九里之河滕壤舊塵曾識平反之譜周原新轡願承鞭辟之方拜下非遙由中莫旣

回前人賀遷秩

影靡下隰奚補毫釐步進員階忽饒分寸未謝玉潤之潤先厭金蓮之華自笑竿魚爲官何拓落也尙隨

書鶴振德而輔翼之。未悉刊酬。餘圖闕布。

送前人冬

灰管移新律。暖轉蕙蘭。鍾鼓樂清時。春生花竹。隔幔緹之醴郁。阻履襪之從容。薄注鄠清。式歌魯瑞。俯漸雲縠。又添愛日之紋。陰聽雷鼉。趣侍含光之宴。徵芹馳瀆。采菲知榮。

賀前人冬

黃鍾噓暖。繡線紀長。錦堂增履襪之春。綠野換荔芸之色。某謾馳今雨。阻造下風。陰暉翠蓬。莫遂前茅之拜。第瞻鶴儀。早催元會之朝。

餽前人歲

朱泥貼歲。鶯殘爆竹之寒。綠野回春。喚起屠蘇之曉。欲贊喧馬散鴉之集。曾微橫鯉臥兔之供。柏葉浮香。陰想午橋之宴。梅花轉暖。即迎卯詔之來。輜瀆包羞。靡留爲龍。

賀前人正

攝提貞孟。陔春回甲。胙祝融接天柱。雲度午橋。元氣與游。壽祺來介。某官泰內君子。西方美人。樂鍾鼓於園林。聲和綠淨。拜衣冠於闔闔。光近清都。表新渥於鶴書。催窮班於鼃禁。某迹靡俗。駕心遠賀星。遙指於衫中。拳拳公壽。雪立於門外。耿耿于懷。

送前人元宵

火樹銀花簇朱陵之明月。羅幃繡幙開綠野之春風。莫陪鍾鼓之勝遊。敬效豆蓬之攝飲。醉長沙。行湘水。忍賦岸花。遠建章。立通明。佇依雲朶。區區輶賸。跨跨麾留。

賀前人納子婦

歡聲噪鵲喜氣乘龍。日耀屏金。春生堂錦。伏惟歡抃。某永塵賀履。敢後慶箋。猥此將芹。菲然采若。倘蒙鑒茹。無任欣榮。

送前人別會

楚節易麾有味。林鳥之哺。湘花舞席。險瞻湖雁之飛。感水蘊之風規。持金蕉而雨別。日暮碧雲合。耿河漢之相忘。月明今霄多。勞江湖之遠夢。薄言折寄。微惠麾留。

謝章簽書鑑

綿田負耒。投分一丘。楚澤乘輅。飯枕兩地。公造化吹噓之賜。廣詳明欽恤之仁。昉履南維。輒箋西筵。伏念某遭逢雖早。零落亦多。一壑白雲。對哺烏而俯仰。十年流水。忘夢鹿之去來。不圖元日之會同。猶記壯年之奔走。我牛我車。我輦。方墮影於湘波。維駒維駟。胡強顏於衡麓。未許賦東方之粟。乃趣澠南冠之囚。尊叱馭。陽回車。展轉於君親之際。皋明刑。契敷教。劑量於政化之間。吏民甫接於咨詢。風俗重爲之感。

激龍蛇行而赤子瘁。羔羊混而素絲傷。非扶內地之本根。曷壯重湖之保障。曹劌之戰長勺。或云察魯獄之功。孔明之駐臨蒸。正在破荆賊之後。恍聞風而興起。凜受命之艱難。玆蓋恭遇某官。德業兩朝。人物三代。頌慶曆之聖德。政府經綸。用淳熙之真儒。中天黼黻。誕篤緇衣之造。齊調金鼎之和。遂沐匿瑕。亦叨將指。某敢不靈承清問。惠迪嘉師。奉使登車。敢自詭范滂之操。爲親拜表。尙曲全李密之私。激切未央。敷榮祇淺。

先生前除湖南漕。卽報罷。復除本路憲。道體堂謹書。

謝高尙書斯得

負耒耕綿。方省愆於私室。乘輅使楚。忽拜命於公朝。昉履朱維。敬籛丹屏。伏念某。同甫。茲蓋恭遇某官。拱璧元圭。泰山喬嶽。邇交殿之勸講。總是經綸。古靈臺之薦人。不遺氣類。遂令起廢。復忝司平。某敢不迪惠嘉師。靈承清問。鞭辟虺隤之陳迹。濯磨鞅掌之新功。自與心謀。敢比范滂之攬轡。未以罪去。尙容李密之陳情。歸倚方長。敷榮祇淺。

謝陳尙書宜中

耕綿負耒。方私室之省愆。便楚乘輅。忽公朝之錫命。旣履朱維。而陳臬。亟瞻紫橐。以修辭。伏念某。學極支離。性惟骯髒。宿昌黎之南斗。自嘆我辰。事元亮之西疇。每懷前路。撫陳編而慷慨。恍初服之流離。題柱而

乘駟車。不量己力。叱馭而馳九坂。徒負壯心。山川尙有於鬼神。草木自全於霜露。迹已陳於芻狗。影屢落於杯蛇。一壑白雲。十年流水。當元會彰綸於日月。乃一朝移縶於波濤。血指創深。貽差巧匠。折肱痛定。莫詭良醫。請東方之粟以闕餼。爲南冠之囚而趣載。周爰伊始。汔濟奈何。起觀今日之重湖。正抵北風之一面。曹劌之戰長勺。或云察魯獄之功。孔明之駐臨蒸。正在破荆賊之後。欵聞風而興起。凜受命於艱難。茲蓋恭遇某官。大呂黃鍾。元圭拱璧。天章閣之論事。行展經綸。古靈藜之薦賢。不遺氣類。遂令起廢。復忝司平。某敢不激厲新知。濯磨舊玷。沐浴蓬萊之風露。昭蘇衡芷之江山。皇帝清問。何擇非人。願言奉教。王事靡盬。不遑將母。儻遂陳情。歸倚意長。敷宣喙短。

謝陳正言堅

省愆私室。方負未以耕綿。拜命公朝。忽乘輅而使楚。初咨詢而咨度。終受察以受容。險跂拾遺。敬箋主進。某名浮實淺。意廣才疎。早歲飛騰。真有終軍之銳。中年閱歷。始知元亮之非。頃飯牛吉水之陽。有秣馬湘江之旨。此運使大體。既無士遜之良。去監司不才。聊見希文之志。進退用舍。固各有命。栽培傾覆。亦因其材。此真生我之孟孫。安得酖人之叔子。歲年忽忽。空懷躍冶之羞。風雨悠悠。久斷問鈞之夢。不謂一寒之零落。未爲諸老之棄捐。取彼蒼葭。謂粗嘗於霜露。憐其舊縵。使復出於波濤。血指創深。見噬巧匠。折肱痛定。敢詭良醫。方祈偃息於支離。俄責驅馳於跋蹙。慨念重湖之今日。浸憐一面之北風。孔明之駐臨蒸。正

在破荆賊之後。曹劇之戰長勺。或云察魯獄之功。馮受任於艱難。恍聞風而興起。孰主張是。遂躋登茲。茲蓋伏遇某官。寒露清冰。泰山北斗。雖剛不吐。柔不茹。卓然論事之風。然過者化。存者神。偉甚容人之度。遂使山林之深密。復叨原隰之光華。某敢不祇若平反。對揚欽恤。鞭辟馳隕之陳迹。濯磨鞅掌之新功。元龍百尺樓。知將展下床之拜。王尊九折坂。其敢忌叱馭之規。飯倚方長。敷菜祇淺。

謝陳侍郎存

省愆私室。方負未以耕綿。拜命公朝。忽乘輶而使楚。初咨詢而咨度。終受察以受容。稽首席間。通窓閣下。伏念某。名浮實淺。意廣才疎。生平事可對人。粗有聞於涑水。仕太早不及學。或見笑於垂崖。捫心每念於息肩。回首不堪於鑄錯。司馬橋乘駟。豈應開命以疾驅。管城子免冠。正當爲法而受惡。然而兩停漢傳。再黜周行。皆緣一日之瑕疵。自取十年之坎坷。悠悠白日。空懷毀瓦之思。落落青山。久斷問鈞之夢。不謂元日關門之始。猶在皇華遣使之中。追天上之雲龍。望不到此。詠人間之蕉鹿。意若安之。血指創深。見嚙巧匠。折肱痛定。敢詭良醫。方祈偃息於支離。俄責驅馳於跋躐。慨念重湖之今日。浸鄰一面之北風。孔明之駐臨蒸。正在破荆賊之後。曹劇之戰長勺。或云察魯獄之功。馮受命於艱難。恍聞風而興起。孰主張是。遂躋登茲。茲蓋恭遇某官。拱壁元圭。泰山喬嶽。邇英殿之勸講。總是經綸。古靈藁之薦賢。不遺氣類。遂令起廢。復忝司平。某敢不激厲新知。濯磨舊玷。沐浴蓬萊之風露。昭蘼蕝之江山。皇帝清問。何擇非人。願言

奉教王事。歷監不遑。將母。倘途陳情。歸倚意長。敷宣喙短。

賀曹尙書孝慶筆給事中

選高春伯。光映夕郎。削履摩雲。煥清朝之文物。簪裾照日。侈丹地之恩輝。鼓舞風雷。動搖鸞鷲。恭惟某官。名高二陸。才備百參。風雲上下之交。搗呵龍虎。天日清明之瑞。轅駕鳳凰。春行霄漢之三麾。星煥江湖之四節。蘭臺壁水。安定龜山。彤管青蒲。歐陽司馬。出袖磨霜之鉞。浩吟捲雨之簾。階轉松陰。旗翻柳色。白馬盤陀之覲日。紫囊筆橐之生風。矧批救瑣闕。任朝廷之綱紀。而侍言經帷。啓帝學之光明。用頒一命。再命三命之榮。特懋大書。特書屢書之績。卻高麗使。止西蕃馬。讀青史而猶香。還諫臣救。繳內侍官。凜清遊其未遠。必兼廣申公之十論。必細陳溫國之五規。要看久遠之功名。盡展平生之經濟。某濫巾遠服。望履層霄。星度文昌。遙想蓬萊宮之氣。雲行石鏡。尙磨蛟龍字之碑。心曲葵葵。毫端草草。

賀劉尙書黻

命渙九旒。光升雙履。風清畫省。準繩帝世之百工。雲擁仙臺。刀尺周官之羣吏。潘毫綠淨。拜手紫微。恭惟某官。吞吐龍湫。卷舒雁蕩。清規映日。耀西華之金晶。真氣摩空。屹南都之鐵壁。威鳳祥麟之出處。慶雲瑞日之文章。一疏辨姦。少日老泉之氣識。十條論事。平生小范之精神。自增篋堂。陸之交。而黻藻帝皇之度。獨到古人之未到。能言天下之難言。爲御史。爲諫官。張膽論事。真舍人。真侍講。吐辭爲經。儒榮方試於一。

時柄用邁開於九軌。乃滯三命再命之渥。徑通前行後行之班。細鹽廣廈之席。重龍泉文淵之劍。二時方艱。大公竭論。思余安道。決邊議於朝廷。真工部長。蘇子容。成功臣於疆場。爲史銓師。發揮黃旗紫蓋之精靈。盡掃枉矢。掩搶之芒角。前籌彪炳。疊紐蟬聯。采石江流。更展中書之略。海潭沙漲。邁符宰相之謠。某竊足馳原。阻心賀廈。文昌星度。衣冠徒想於後塵。絢燿雲飛。草木願濡於今雨。鋪陳曠短。激躍心長。

賀趙侍郎月山太平州赴召

選表揚綸。歸中持橐。采石洲之明月。光照海山。通明殿之紅雲。影搖河漢。介圭覲只。會元驩如。恭惟某官。玉粹金剛。冰懸雪跨。清廟生民之作。膾炙諸公。干將莫邪之鋒。指麾餘子。自傍天而行。斗牛之渚。便拔地而起。湖海之樓。出入兵間。月柝燈碁之耿耿。馳驅江上。參旂井鉞之堂堂。儒臣知兵。從古所少。天子謀帥。必在其中。方建纛而前。千軍遠帳而不動。及還笏而去。二童隨馬而有餘。悠悠四顧於山河。落落一麾於江海。嘯吟水石。酬謫往展月之魂。上下風檣。訪舍人麾軍之迹。慨然有神州陸沉之歎。發而爲中流擊楫之歌。屬傳風景於峴山。忽駭波濤於天塹。長江爲備不數處。可共險於萬人。朝廷養兵三十年。當成功於儒者。乃疇庸於東掖。乃趣貳於西曹。太乙靈旗。出陪豹尾。鈞陳玉檻。進逼鰲頭。青天白日。鳳凰之聲名。高山深林。龍虎之氣勢。前行爲兵部。小紆帷幄之謀。大本在中書。亟正鈞樞之拜。某濫巾劇部。望履修門。班漢從於甘泉宮。喜稱知己。勸唐功於吾溪石。已戒有司。

賀荆湖汪制帥立信

中禁出綸。上流易鎮。尙書天之北斗。光動玉垣。荆楚國之西門。勢雄鐵壁。穆帷膽落。旗蓋風生。恭惟某官。意氣吳鉤。胸襟彭蠡。蒼龍捲四海之水。拔地威風。巨鯨戴三神之山。擎天砥柱。表表二三豪傑。恢恢數萬甲兵。起觀江漢之危樅。政急波濤之巨楫。峴山落日。追思羊太傅之經營。江左流風。孰奮管夷吾之慷慨。乃易長沙之節。乃高建禮之門。北繞潁沔。南卷沅湘。一新牙纛。東達吳會。西通巴蜀。重整金湯。然且許充國。以便宜授孔明。以節制真儒。無敵於天下。此虜已在吾日中。箭青海。弓天山。囊鞬敵愾。盃長河。塊秦華。檣俎折衝。陳六月北伐之詩。刻萬年中興之額。式歸几几。晉位巖巖。某除睇齋壇。阻陳賀履。星輝翼軫。莫隨東野之雲龍。月滿關河。尙策祁山之流馬。裏旌搖曳。舌筆單疎。

廣西李經略經過迎狀

圭裳東覲。牙纛西來。畫鶴鏡秋。懸桂林之明月。繡屏悵曉。拂石廬之行雲。雷馭先驅。天吳起舞。某摩挲脫履。飛遶前茅。逐東野之龍。久懷上下。拜北平之馬。重視傑魁。

請廣帥會

傳鼓上清湘。桂舟度曉。舉杯邀明月。楚觀生秋。輒扳千乘之光華。重話六年之契闊。舳龍飛動。豈敢爲從者之淹。橋燕慙。且爲盡故人之飲。

折送諸監司巡歷會

問楚囚而返棹。幸接席間。傳露淥以稱觴。幾成瓦後。欲洊邀於金轡。恐重瀾於冰壺。獻芹而效野人。顏之厚矣。折枝以奉長者。禮亦宜之。區區卷俎不腆。僭易馳獻。如沫肯留。萬有餘榮。

回朱帥參

晴庸紅旆。贊畫油幢。羅帶玉簪。卷嶺靡之雲氣。銀濤青壁。籌湘柳之春風。五朶施先。七襄禮後。某官春容之度。瞻蔚之文。颺起雷轟。揭修名於千佛。霜懸雪跨。斂神氣於九仙。弓矛洛下之耆英。領袖湖南之賓客。月暗秋城。燈明夜觀。日臨仙掌。烟傍衰龍。小駐籌帷。促歸輦路。某居慚未見。功幸寅同。訪赤字於山尖。喜陪新雨。望冰壺於幕下。險結飛霞。繼捲情深。敷棗詞約。

回劉運管志叔

周隰馳驅。恍波濤之移繡。祁山流馬。催帷幄之運籌。一介施先。七襄報後。某官鞭駕英雄之意氣。攢吸霞雨之文章。雲杏露桃。艷神仙於蓬島。燈碁月枰。重賓客於湖南。小泛紅蓮。佇歸青瑣。某俯慚小草。仰辱儷花。逢故人於瀟湘。尚珍金玉。跋天孫於雲漢。莫報禮綸。

回葉茶場

車來今雨。載征濡轡之塵。旗展春山。遠聽杖藜之句。感君雙尺。華我六絲。捧雲漢之織裳。莫將瑤報。撫波

澹之舊繡。尚籍瑣規。

賀桂陽劉守

疏綸鼈掖。作鎮熊湖。天上仙班。猶帶觚稜之月。湖南道院。新行啓戟之春。條貫昭蘇。耄倪躡舞。恭惟某官。真霄漢士。爲文章翁。袖五老之風烟。插天秀色。卷三神之霧雨。搏海壯圖。自騰翔殿角之雲。已錯落班心之玉。飽看芙蓉之輝媚。尋歸芍藥之從容。記大史之名山。金匱石室。籌將軍之武庫。紫電清霜。小橫桂水之烟。歡戲萊衣之綵。乘騏驎道夫路。雷動光聲。驅蛇龍放之菹。春生敏手。襦歌鼎鼎。綈召堂堂。某息蔭載。騏。叨恩便養。東馳西鶩。迹將遠於江湖。夜醉曉行。心相望於霄漢。輪困杼謝。藜藉包羞。

賀寶慶王守

丹詔起家。彤幃就國。跨茅山鶴。來從勾曲之洞天。分竹使符。出領瀛溪之霽月。感先未識。樂在寅同。恭惟某官。雁蕩孤峯。梅溪的派。激龍湫而和妙墨。箋古史倚相之書。執牛耳而主齊盟。負大學何蕃之望。大車九軌。砥柱百川。峨峨天上之神仙。佩蒼鳴曉。纏纏水邊之花氣。戟畫闌春。風行蘭國之江山。煥轉梅峯之草木。銀菟出色。畫鹿生光。川暖玻璃。小駐插天之紅旆。花深翡翠。佇馳度漢之紫泥。某舊繡視顏。新磨照眼。九州地接。獨先鄰燭之光。一水江連。飽聽今福之頌。衷旌搖曳。舌筆單疎。

賀道州王守

鳳檢揚庭。熊旂赴鎮。翩翩趙公子。星煥九霄。粲粲元道州。風行千里。騷蘭香度。童竹歡傳。恭惟某官。簞鍾
瑤簫之音。金井玉輪之操。當家清白。撫千佛之青氈。上界葱蒼。接九仙之玉佩。出則嬾婉於湖海。入而黼
黻於周行。衣冠照須女之珠。樽俎總從戎之柝。卷紫電清霜之氣。主光風霽月之盟。驅龍蛇放之菹。春生
敏手。乘騏驥當夫道。雷動驩聲。發游刃於新礪。走神丸於迅坂。民歌來暮。公快行春。香戟凝清。和墨剩吟
於碧落。靈書照渥。追鋒促覲於紅雲。某。麗技已窮。杜驢何補。九州襟帶。喜親鄰燭之輝。萬井旌旗。滿聽今
襪之頌。溶溶新雨。爽齊下風。

賀永州袁守交割

春生騎竹。吉耀兔銀。揚照軫之旌旗。布先庚之條貫。風行千里。庭迅三吾。某喜滌籥之辰良。卽盍簪而申
慶。亟馳泓穎。預訊轅和。

回前人

懷紱湘源。榮分半竹。飛書楚觀。光挹前茅。爲華綠淨之江山。猶帶紫清之烟霧。沸歡聲於雅籥。浮喜氣於
寒蕤。瞻鸞鶴於北平。趫然擊節。爲雲龍於東野。喜甚執鞭。稟藉占圃。輪囷叢謝。

請雷州虞守

傾絨海邦。低簪楚觀。太史紉金石。契闊十年。故人逢瀟湘。會并一日。喜來今雨。願款清風。

送前人別禮

剪燭空涼喜話巴山之雨。解維浩渺莫直溟海之風。險聞傳鼓之聲。呵曷究執祛之繾綣。折梅花於餉餽。愧我騷騷隨雲氣於蓬萊。爲君媿媿。

回諸郡守冬

陽氣應黃鍾。時哉南至。兵衛森畫戟。既我東風。昭黼黻於魯臺。噓塵埃於楚觀。恭惟某官。陽明人物。雷動聲名。麗曉旌旗。照映壺冰之潔。行春鼓角。發舒圭影之和。近七日之朋來。進三朝之元會。某坐馳梅影。陰借芸香。宮線添長。正覩顏於把繡。雲門入奏。惟洗耳於歌襦。

回諸郡送年酒

開荆楚之畫雞。舊梅如夢。賦蘇州之清燕。新麴生香。挹宮錦之淋漓。醉屠蘇之先後。從太守樂。知同元日之春。爲細民斟。願廣東風之賜。

回諸郡賀年

條風開獻節。雄律鳴春。戟衛森清香。雌堂麗曉。芙蓉介社。草水生輝。恭惟某官。氣度陽明。精神雷動。玉珂舊影。光搖白獸之尊。皂蓋清塵。彩照蒼龍之角。小聽歌襦之暖。卽來召綵之溫。某坐閱一期。險瞻五馬。回車雲近。方懷印坂之思。化積日長。尙味海瀕之譜。

送徐權府折俎

舟泝雁回。載沫瀟湘之雨。雲連燕寢。渴陪桃李之春。恐廢聽棠。薄言羞蕩。乞爲寒水玉。恨莫對於冰清。走
置錦屠蘇。敢坐將於鄙淥。

回前人請宴折俎

帆浦乍歸。沐東風之飛錦。鈴齋相望。荷北海之開樽。清來畫戟之香。綠折瓊芝之草。碧筩陰卷。如坐使君
之林。玉案無酬。有愧美人之繡。

回前人送轉官折俎

影糜下隰。奚補毫釐。步進員階。忽僥分寸。正自憐於磨蟻。乃特枉於緘魚。感折寄之慙慙。佩相期之汗漫。
共明月千里。肯分此光。賦終日七襄。若何爲報。

回前人送冬

陽氣應黃鍾。時哉南至。兵衛森畫戟。睨我東風。昭黼黻於魯雲。噓塵埃於楚觀。芸香在手。梅意彌襟。日表
迎長。正視顏於把繡。雷發入奏。惟洗耳於歌襦。

回柯權郡謝舉薦

爲仲舉題坐。彼美監州。薦侯喜有詩。薄言報國。度清風於燕寢。洒今雨於雁回。大丈夫卽眞。佇膺菟紱。我

鄉人未免聊謝貂綸。

回前人賀得贖

對胸臆之行雲。何功將指。沫空同之新雨。爲養叨恩。志甫道於循陔。音首勤於傳驛。某官以錦裳手。誦緇衣詩。王事靡盬。豈敢定居。同心而體國。君子不匱。永錫爾類。推老老以及人。遂令回叩坂之車。亦猥捧江城之檄。某感深烏哺。愧甚鶉濡。顧影躊躇。漸有雲東西之迹。懷人飛越。相望斗南北之輝。

回李潭倅謝上

澗渙紫泥。光紆朱紱。蓬萊雲氣。隨太祝之輕裘。湘水月明。照監州之緹軾。茲憑回雁。薄謝來魚。某官大雅孤標。真清偉度。玉珂金鑰。聯天上之神仙。青壁銀濤。重湖南之賓客。佇携風帽。歸趁星靴。某險奉儷花。相輝芳杜。拂山尖之科斗。敬襲清霜。聽江上之琵琶。更傳白雪。

回諸郡倅賀冬

九寸黃鍾律。和動緹帷。五丈畫堂旗。春生錦段。芸香在手。梅意彌襟。某官氣類陽明。精神冰潔。廣庠樓之曲聲。徹雷發。續溢浦之吟文。裁宮線。清露曉濡於驥尾。韶風夜度於鷺行。某隅繡何工。屏泥借潤。瀟湘波暖。照明月於胡床。胸臆烟寒。倚行雲於仙巖。

回諸郡倅賀正

攝提貞孟陳。青規絢綵。風流半刺史。朱紱生輝。陽德斯升。元氣之會。恭惟某官。聲名雷動。氣度春溫。緹軾
清塵。色照蒼龍之角。玉珂舊影。光搖白獸之樽。小分千里之辰旌。卽下十行之卯詔。某坐鷺歲始。陰贊州
端。波暖江湖。未趣東西之駕。風和山水。相望南北之樓。

回諸簽幕賀冬

黃鍾陽氣應。緹幔香深。冰壺幕下清。彩毫煥轉。芸香在手。梅意彌襟。某官氣類陽明。聲名雷動。胸蟠五色。
卷舒宮線之紋。音度九韶。出入雲和之瑟。小分光於烏幕。卽翔舞於鸞行。某軫野相望。繡隅何補。招呼和
氣。陰看仙纈之華。上下春輝。密贊賓帷之勝。

回諸司諸郡幕賀正

閱鷄戶之年。頓驚元日。賞龍門之雪。險企光風。暖透荔芸。意行蘭芷。某官聲名雷動。氣度春融。綠幕生輝。
光照龍杓之彩。朱絃奏雅。音諧鳳律之陽。衣冠小立於金臺。環珮卽趨於玉府。某相逢甲換。猶喜寅同。夜
醉曉行。漸作江湖之隔。雲飛川泳。永言霄漢之期。

回施帥華送別

望冰壺於幕下。遙結飛霞。映赤字於山尖。喜來垂露。龍先一介。禮後七襄。某官冰雪孤標。雲霄名閱。玉珂
金鑰。接江左之衣冠。青壁銀濤。贊山南之鼎軸。籌帷小駐。輦路遄歸。某服膺夾袋之儲。決意緇衣之好。南

轅北轍迹。遽隔於江湖。左弭右轡。心相期於霄漢。輪困欲謝。稊積是慚。

回洪準遣到任

袞鉞掄材。油幢疏渥。花明湘水。分曉月於紅牙。柝靜鄴城。生春風於色筆。一箋愧後。六儷施先。某官威風。鳴陽神駒。奔電。貂金奕奕。發五彩之芝英。簪玳翹翹。結九歌之蘭佩。小駐清壺之下。卽陪赤鳥之東。某陰企芳塵。喜聞新雨。從軍古云樂。剩美燈碁。織女不成章。莫酬裳錦。

回趙檢法

馳絲無補。愧行湘水之春。贊幕多奇。遠洒縉雲之雪。施先一介。禮後七襄。某官瑚璉英姿。泉阿神物。洛陽龍門之清賞。吞吐風雲。軒轅鳳樂之妙音。鏗鏘金石。小游綠水。近卽紅雲。某久徯寅同。未諧辰見。云云。

回諸郡教官賀冬

吹瑠動浮灰。時哉南至。講道出新貫。既我東風。梅意彌襟。芸香在手。某官精神冰凜。氣類陽明。文鐸聲揚。一片雲和之瑟。書韻色麗。五花宮線之紋。徑携三鱧之春。入慶六鰲之曉。某何功把繡。徒愧織裳。岫嘒烟寒。自笑庭楊之影。瀟湘波暖。第傳泮藻之清。

回諸郡教官送別

星馳隕轡。空浮棘影之塵。日鹿堂瓊。喜邇槐陰之翠。輒憑回雁。占謝來魚。某官蓬萊文章。華岳瀾瑤。曉開

雲杏纏纏聲。猗清菴泮芹。源源教思。聊汲清湘而變鄒魯。行瞻黃嶽而講唐虞。某將指何功。同心有味。南轅北轍。迹似遠於江湖。左圖右書。情相期於霄漢。

回桂陽劉教授

日麗螭堂。喜近枌榆之翠。星華雁嶺。有來芹藻之清。知在歲寒。舞慚地窄。謂草木吾味。賦聊誦於梅花。毋金玉爾音。振險聆於杏鐸。七襄匪報。三宥爲榮。

回林教授

時雨鶴峯。新鞞度曉。清風雁嶺。塵臬生秋。不言而意已傳。未識而氣先感。謂草木吾味。賦聊誦於梅花。毋金玉爾音。振險聆於杏鐸。

回張教授

春滿螭堂。覃藻芹之教思。書來雁嶺。出草木之味言。先舉所知。豈非吾願。南轅北轍。迹遠於江湖。左弭右韃。心相期於霄漢。

回胡山長

挹西山之新雨。如見其人。納北窗之清風。喜有此客。亟憑回雁。占謝來魚。某官蓬萊文章。華岳瑚璉。曉開雲杏。文采九霄。清照川花。書香五色。重濯濂泉。而浴洙泗。行趨廣廈。而講唐虞。某恍舊繡之濡絲。捧儂花。

之盈袖。永爲好也。愧莫稱於報瓊。能無誨乎。尙有聞於振鐸。

回邢山長

開帝館之雲。秋蕤度曉。織天孫之錦。晴綺絢空。一介施先。七襄禮後。某官岷峨鋒鏑。蓬萊文章。紅杏碧桃。艷神仙於天上。粉牆紫界。重賓客於湖南。小對簷花。卽歸院柳。某幸僭未見。且賀寅同。自笑黔驢。難策再衰之鈍。相逢衡雁。願聞三益之規。

回衡州江判官

從軍帷幄。欣雲近於蓬萊。贈我瓊瑤。喜露承於霄漢。施先一介。禮後七襄。某官玉尺懸冰。金莖淪露。紫霄糜頂。扶搖溟海之風。綠水飄纓。談笑鄙城之月。佇看飛鷄。卽遂遙鷺。某欣捧色絲。有華舊繡。插瀟湘之草。除寄雁回。望江漢之雲。莫將貂報。

回趙判官

芙蓉暮畫。見推三語之清。桑梓年情。僅效一言之雁。舞袖方慚於地窄。織裳乃逐於雲來。瀟湘逢故人。薄酬今雨。霄漢瞻佳士。徒竚下風。

回郭判官

雲近熊山。有美芙蓉之影。書來雁嶺。頓生杜若之香。三語施先。七襄愧後。某官珊瑚文采。冰雪聰明。空冀

北之羣神行最屢。望湖南之暮。鋒淬鉅鉞。小贊凝森。遺班清切。某偶諧聚軫。多幸同寅。意重冰清。深謝宜
赦之句。贈降錦織。莫酬幼婦之辭。

回陳撫屬張監倉

馳絲何補。愧响嚶之春風。畫幕多奇。賁瀟湘之華月。施先一介。禮後七襄。某官絕俗精神。識時俊傑。洛陽
龍門之清賞。吞吐雲烟。軒轅鳳樂之好音。鏗銅金石。少凭玉帳。卽覲璧璫。某多幸寅同。有懷未見。南轅北
轍。迹似間於江湖。左弭右轡。心相期於霄漢。

回黎知錄李司理

驅馳遠使。空塞杜若之雲。俊逸參軍。辱贈梅花之雪。舞慚地窄。知在歲寒。某官巧鑄鉅鉞。清摩最屢。剛風
度筆。廣平賦之淋漓。寒露照襟。何遜詩之灑落。小需鞠草。卽看攢花。某共客瀟湘。期君霄漢。重緹錦段。莫
酬明月之珠。空羨紫鱗。擬結橫江之網。

回永州司理司戶

梅花鐵石心。相知已晚。金薤琳琅字。多謝何厖。味也同吾。惠而好我。編兮又改。嘆舞袖之地寒。白也不羣。
喜錄屏之天近。

回謝司法

星馳周隕。將爲養以懷歸。春度燕臺。乃覽輝而來下。載憑回雁。薄謝來魚。某官華岳清冰。海水明月。鑿鑿金石。軒轅鳳樂之好音。上下風雲。洛陽龍門之清賞。小吟渠綠。徑照藜青。某夙幸同寅。險瞻聚軫。南轅北轍。雖遠隔於江湖。左弭右韞。正相期於霄漢。

回諸縣宰賀冬

觀臺雲物。曉看五色之書。彭澤風流。春度一同之詠。駢花委艷。芳杜生香。某官氣類陽明。精神冰潔。霞飛錦織。卷舒宮線之紋。春落弦聲。上下雲和之瑟。佇翔鳧影。晉筮鷄行。某邇只畫簾。簡然隅繡。撫庭楊於响。雙空負分陰。培浦柳於瀟湘。險看一碧。

回諸縣宰賀正

攝提貞孟。陔八荒開壽。連城得茂宰。萬象皆春。花柳無私。茨梁有慶。某官聲名雷動。韻度天和。文艷錦機。光照龍杓之彩。風生玉軫。音諧鳳律之陽。舒舒蒲穀之香。進進蓬萊之武。某坐驚甲換。猶喜寅同。爲秋浦官。孰禦春風之鳥。送長沙客。相望明月之舟。

回衡山趙宰孟倭謝率陸時

效顰一鶚。力何補於培風。照眼雙鳧。手忽承於垂露。一謙過矣。三復寔然。某官文采珊瑚。歌聲金石。融峯九千餘丈。氣埒青蒼。郎垣二十五星。光生銅墨。哀時正直。簡在凝嚴。某借助弊長。汲清綆短。頌言美瑞。知

鱗鳳之在郊。趨覲通明。戒鸞鳳兮先路。

回善化韓宰

出宰山水縣。喜調新琴。爲織雲錦裳。有華舊繡。載憑回雁。占謝來魚。某官玉尺清方。金莖品潤。融峯九千餘丈。氣埒青蒼。郎垣二十五星。光生銅墨。暫翔鳧影。佇入鷓行。某自賀寅同。豈云未見。娟娟一碧。共看貫索之沉。耿耿七襄。莫效聯珠之報。

回鄂縣愛宰

移繡波濤。愧將絲轡。出宰山水。先度絃歌。險寄雁回。敬酬魚遣。某官琳珪清越。冰雪聰明。雲傍碧桃。千丈蓬萊之光氣。月明綠野。一簾秋浦之清風。小種縣花。佇歸院柳。某俯慚舊斧。仰辱聯珠。味黃絹之辭。永爲好也。乏貂褕之報。受言藏之。

回牧縣郭宰

舊繡塵深。閱八莫於楚觀。畫簾花度。飛五朵於雲陽。新雨同心。清冰照目。某官光華尙錦。盤錯投刀。橫巴水之野舟。肯煩期會。聞楚萍之更鼓。終覺分明。邇只鳧飛。翻其鶴立。某馳驅技短。嗟切意長。皎皎織女。終不成章。駕言匪報。駢駢征夫。每懷靡及。尙克相規。

回湘潭張權縣

雲移松影調新韻於宓堂。春滿桃陰來清風於周轡。懷哉今雨遺此華星。小生欲相吏耶。願同衷協。丈夫
卽爲眞耳。佇聽除音。一水娟娟。七襄耿耿。

回永興趙權縣

鶴岑琴好相望。明月之心。雁嶠書來不隔同年之面。以雍容之雋軌。將慷慨於公車。北轍南轡。遽江湖之
相遠。左韃右弭。尙霄漢以爲期。占對甚臯。垂孚爲寵。

回瀏陽任丞

晴紋照綬。曉入新花。遠素飛雲。春回舊繡。辱施先於一介。愧禮後於七襄。跋天孫之織雲。莫將瑤報。望美
人兮明月。尙藉璵規。

回寧遠簿到任

地鄰棲鳳。喜聆千玉之吟。風度鳴鶯。恍聽九韶之奏。縣花出色。汀若生香。然太乙之藜。佇聽令業。織天孫
之錦。莫敵朕施。

回澧縣趙簿衡陽易尉

馳隄無功。愧行雲於鮑嶁。佐琴有韻。捧明月於瀟湘。小車來映於縣花。春佩相輝於岸芷。某喜瞻聚軫。樂
在同寅。北轍南轡。漸覺江湖之隔。左韃右弭。尙爲霄漢之期。

回衛陽歐陽尉

挹春花於拂綬。喜見青撐。垂星字於乘槎。有華綠淨。重此湖南之賓客。美哉日下之神仙。杜轡何功。自笑再衰之技。貂褸莫報。更求三益之規。

回楊料院

司會名藩。有美同年之子。委書下隰。聿來異事之僚。峨簪玳於賓筵。粲麋瓊於騷圃。湖南幕貴。良懷支使之賢。水北僧高。寧久山人之索。遙憑回雁。除謝來魚。

回宋稅院萬年

篋竹嘯鼯鼠。僅免失刑。鮪鱉鰓虎螭。割傳得句。怒飛鐵畫。光照錦機。撫劍首於漆園。敢當一映。聞簫聲於赤壁。莫遂倚歌。

回劉學錄胡石壁客

我馬維駒。訪鮪鱉之奇字。有鶯其羽。發蓬萊之妙音。亦來見我乎。嘗有此客否。某人語洗烟火。書籠山川。張生手持石鼓文。氣涵綠淨。楊雄自有河東賦。聲透明光。亟呼能耳之雲。立近鰲頭之日。某味同草木。影合江湖。扶搖萬里。南溟相期汗漫。上下四方。東野此意輪囷。

通交代廖提刑邦杰號恕齋

共審疏恩象魏。易節熊湘。星度天囷。光照武陵之雪。風生春繡。神開衡岳之雲。翠蕩凌烟。華絲絢曉。恭惟
某官。傳心正學。行世清規。雲霄閱之高寒。蜿蜒浦劍。湖海樓之突兀。塊瓦參旗。屹砥柱於中流。行大車於
九軌。出擁康沂之駕。入提建禮之門。犀監重弓。武絢將軍之電。金曹曳組。輝聯須女之珠。佩聲雜運於蓬
萊。壘影橫斜於牛斗。誰謂寒露清冰之勝。屑爲春山暑露之行。收海苦之波濤。定夫正學。布湖江之雨露。
朱子常平。便當跨汗漫而擺雷硯。于以經駘蕩而出駭娑。屬天顏之西顧。念民命于南維。不有仁人。孰長
王國。乃輟神仙於海上。乃移星宿于軫中。惟君子之祥刑。自聖門之恕學。推廣不寬之條貫。發揮無訟之
本原。轉陽和於芙蓉薜荔之間。沛生意於檣棧桁楊之外。蓋以臯夔之長者。而行孔孟之本心。臯華咨度
咨詢。盡展平反之業。清問惟明。惟畏。卽陪啓沃之聯。某久把短鑊。偶塵繡斧。撫王事而集苞杞。坐隔白雲。
望美人而結幽蘭。豈逢今雨。俯仰十年之同味。夤緣百世之交情。尊叱馭。陽回車。豈是秋春之鴻燕。貢彈
冠。朱結綬。尙將上下於雲龍。舌筆疎單。裏旌搖曳。

與袁州安守到狀

叨符便養。假道言歸。西水分江。喜接九河之潤。東雲捲雨。重瞻三峽之春。卽途樞趨。預深欣忭。

回袁守不赴請

馳白雲之下。幸甚假途。卷今雨而來。言將授館。華髮之典刑甚厚。清風之簋豆有加。薄言還歸。何速叩喙。

之馭。願安承教。第懷臺峽之春。方命負慚。嗣音抒謝。

回交代權贛州孫提刑炳炎

南節易麾。爲慈親而拜命。西臺就牧。屈膚使以論交。溫朝花雨。別之盟。借堂草春暉之色。施先一介。禮後七襄。恭惟某官。大雅風流。真清人物。冰懸雪跨。吐吞禹穴之玉書。鳳躍韶鳴。鏗夏天台之金賦。雷轟欵起。山立徐行。巍冠參卿月之班。雜珮峽郎星之直。侍女護衣。鷄人傳箭。擬翠殿之賦詩。衛兵森戟。燕寢凝香。肯芝山之攜酒。豈弟十萬家之春意。精神三百里之湖光。前席興思。此佳吏部。西人則曰。真好監司。寧遲履接於星辰。便報繡行於霄漢。春風扉影。草臥桁楊。夜雨灘聲。雲銷貫索。暫屈玻璃之六轡。更聯虹玉之半符。昔清獻典州。而三川之琴有韻。而濂溪行部。則五嶺之獄無冤。每惟八境之有緣。皆著兩賢之遺迹。盛德可稱於百世。明公乃合於一人。麾蕩照江。劍刀易俗。玉節青絲。纜小駐虎頭。白馬金盤。陀邁陪豹尾。某無功將指。有味陳情。王陽回刺史車。庶乎爲子。毛義捧郡守檄。專以爲親。昔隨振鷺之英游。今忝傳龜之雅好。夢回舊繡。恍慚揚稅之前。手把新符。早托絕塵之後。會趣綸之來下。辱飛檄之遠臨。皇華之禮有加。南陵之詩復作。安有十一州之廉察。屑爲二千石之交承。行縣錄平反。喜不隔望雲之舍。詣府受約束。願遂依近月之臺。舌筆單疎。衷旌搖曳。

回陳侍郎篤齋

回車叩坂。請自效於林鳥。得郡江南。取已捐之竹馬。綢繆錦製。緹襲袞華。恭惟某官。麾斥八極之風雷。卷懷九天之星斗。古靈袖中之橐。屢薦時賢。溫公洛下之評。不遺人物。遂使忝求芻之寄。從而諧覈菽之私。某半竹奚堪。儷花甚寵。想五畝青山之樂。願請訂金。懷四方明月之詩。曷酬贈璧。

賀曾京尹淵子號留聲

露綸渙渥。星履陸華。東澗西瀝。冠十連之元帥。南昌北斗。表六典之地官。丹屏雲開。紅牙日麗。某官抉分雲漢。吞吐江湖。直氣摩空。金天晶之錯落。清規照世。玉井水之甘寒。自噓噓於鸞聲。過峨峨乎豸角。文章大手。南豐先生。政事十條。小范老子。袖出摩霜之鉞。坐吟捲雨之簾。真侍從歸拜於甘泉。慈父母來臨於京兆。乃由太乙。徑陟文昌。水懸雪跨。而朝望孚。日暖潮平。而民氣樂。儷衣冠於建禮。坐鎮千畿。籌帷幄於延和。邁歸兩地。某喜傳除綵。阻趁賀筵。五緯明霄。望龍泉之秋色。九河流澗。懷虹翠之春暉。

回曾主簿清老曾王堂秀僕之孫

千里明月。陰企停鸞。一字華星。劃開湧翠。惠而好我。粲然有文。某官地胄穹華。天資潤美。北平王之閭閻。梧竹蒼蒼。東山氏之衣冠。芝蘭奕奕。查騎麒麟而凌厲。乃從猿鶴以徜徉。展也怒飛。翻其孰禦。某頃馳楚傳。切志綿田。叩坂回車。庶乎爲子。江城捧檄。正以便親。永懷寸草之暉。更感梨花之寵。式相好矣。莫酬錦繡段之華。迺洄從之。如此玻璃江之碧。

回吉州權府賀新除

某寔疏榮座。條被緇封。身到木天。誤辱九重之眷。詞垂金薤。過蒙十部之臨。方切循牆。敢勤褒袞。蓋如庸
晚。徒抱迂愚。山林自分於投深。猷猷空存於愛上。朝清道泰。幸遭際於明時。小往大來。慶挽回於正氣。猥
令忝竊。例沐登崇。恭惟某官。瑞毓長庚。福移子駿。家有甘棠之笏。陳陳典刑。人蒙別駕之春。陶陶生遂。適
郡符之初館。觀帝綽之誤頒。蓋惟大夫之曰賢。遂令小子之有造。正朋一字。恐慚讀秘閣之書。肅使載還。
尚擬致監州之謝。

回吉守李寺丞荅

光膺芝檢。榮剖竹符。吉爲大邦。望二天之正急。公有異政。爲百姓而一來。新令風馳。歡聲雷動。恭惟某官。
雪山冰壑。天球河圖。居南岳風土之奇。夙鍾清淑。得西堂議論之正。綽著典刑。早啓雋途。荐升華貫。天官
宮正。持衡稍食之平。穉臣司農。挈領履丞之重。惟絕海迅颺。可以開鯨浸。推倚天長劍。可以破浮雲。故當
搶攘枳陸之秋。常任撫字澄清之寄。昔四郊洵淘。帝每興當饋之嗟。今二水湯湯。公迄收按堵之效。惟我
廬陵郡之劇。爲今東蒙主之難。莫非王事。我獨賢勞。旁諸縮手。謂所世臣。必有喬木。上遂傾心。向來二千
石之除。曾擬六一翁之里。惟蒼生之有福。故珠浦之重還。期會餘閒。雖異坡老作詩之舊。道理最大。喜聞
韓王有德之言。今庶幾乎。候來暮矣。青原鷺渚。未容坐席之溫。紫殿編班。正恐召環之速。某幸備受屢之

數得同載道之歡。已進迂於前驅。乃退慚於後至。欲陳情而未果。先賜汗而謂何。謝劉公紙書。姑附鴻翔之便。會皇甫壁記。卽修燕賀之恭。嚮戀深深。敷陳罔既。

回前人

某荐蒙顯翰。再遣駢緘。辭遜一出於肺肝。義理各存於肯綮。螺浦之珠。既去復返。足以爲奇。夜光之璧。無因至前。受之甚懼。輒裁尺素。庸敘寸丹。仰冀融清。俯垂澄察。

回前人送冬禮

周曆紀正。魯臺書至。袴謠雷動。恰先七日之來。榮座春生。共慶一陽之長。頌聲盈耳。和氣滿城。某未薦賀言。猥厪餽禮。岸容待臘。正棲寂寞之濱。谷律先春。多謝溫存之貺。報然登受。略此控酬。餘俟別陳。仰干情亮。

回黃主簿

伏以春華如水。驚三紀之流光。夏綠滿園。又一年之初度。方拾薪而煮瀑。卽嚼茗而嚙花。取意一謙。有來多貺。厚之廚珍。以起其牢落。將之篋實。以申其慇懃。童喜相誇。爲里中之羊酒。兒癡不了。笑門外之桑蓬。拜而受之。我之懷矣。輪囷成臆。拍塞謝言。

回盛魁錢并叟賀新除

某偶膺光寵。實沐庇庥。將爲行人之辭。先承君子之餽。樽來工部。有光臨別之梧。荷鵝贈右軍。以比大鳴於雁木。登嘉以往。感德惟深。姑此占酬。嗣容稟謝。

賀府簿錢昇叟

茲審錫命中朝。職書大府。密運良畫。協贊大功。伏惟慶愜。某正深蒙賴。倍切忻愉。函此敘賀。切幾委照。

回大庾縣尉劉天聲

昨因歸雁。獲附殷勤。歲月如馳。曠音弗嗣。五朵雲箋。翩翩復來。山林卯記。初度桑梓。拳拳黼藻。過矣就審。一麾知己。三尺司平。楊州梅花。何如庾嶺本色。吟哦小駐。倚聽橫飛。庭實磊落。分不得拜。興言遠意。若之何速之。肅使知慚。襄拜不敏。何當裔狀。

文山先生全集卷之九

記

吉州州學貢士莊記

物之在天地間。自銖粟以上。莫不有主名。獨貢士莊所儲。以擬夫三歲大比。士之送上春官者。有司不知誰宜得之。取什伯於千萬。亦無敢自必爲已得。其予奪之。殆有物焉。逸史稱隋末一書生。所居抵官庫。有數萬錢。欲取之。神人訶之曰。此財運公錢也。泉者天之利器。惟天能以與人。則夫任貢士莊者。殆爲天守利器。以俟夫天之所以與人者。充是心以往。真無所爲而爲之。其爲仁豈不至。而爲義豈不盡乎。咸淳六年。簡池趙君必輪。來爲廬陵教授。作興斯文。教養畢具。則按貢士莊之舊。稽其所出內。歲錢穀幾何。廬陵士甲江右。一科數路。資送四五百人。哀多益寡。稱物平施。末之云耳。於是有增田之議。一之曰。置尹氏租。爲米八十斛。二之曰。置彭氏租。爲米一千一百九十二斛。趙君猶以爲未足。則曰。傳而益之。其來者之事哉。添差教授番陽程君申之繼至。相與詣郡請蠲賦。吏持難易。閣弗下。永嘉繆侯元德甫下車。二君申其請。侯慨然曰。柰何與吾黨校瑣瑣乎。復之不崇朝。予聞而異之。以爲侯與廣文之用心。皆所以奉天道之不及者也。古之爵人。言必稱天。國家謹惜名器。自他蹊者。悉名僥倖。惟進士科。使四方寒峻操觚而進。付

得失於外有司。而定高下於殿陛之親擢。公卿大夫。繇此其選。當是時。天子宰相。一不得容心於其間。予嘗謂今世惟科舉一事。爲有天道行焉。士脩於家。試於鄉。如探籌然。以信夫天命之所遭。而爲貢士計者。積倉累糧。共其道路。先事而爲之備。隨天命之所與。而後與之。是心也。豈復有內交要譽之私哉。予故曰。皆所以奉天道之不及者也。是宜書。且夫取士於天下。將以爲天下用。人之常情。其窮也。不爲利疚。則其達也。不可以非義屈。後之臨大節。斷大事。決非異時。簞食豆羹。見於色者之所能也。夫使郡國上其賢能。而漢人續食之意。隱然寄於學校。士得以直行走行都。而無僕馬後顧。所望於人也輕。則所以全於己也。大是邦學者。世修歐周之業。人負胡楊之氣。如有用我。執此以往。是舉也。世道微有賴焉。蓋益可書也已。是莊創始於尙書胡公槻。隸于學者。米二千二百斛有奇。前丞相葉公夢鼎爲郡。增六百三十斛有奇。前教官黃君愷伯。增一千三百六十斛有奇。前趙侯典樞。增四百一十斛有奇。自二教創後。施君郁。鄭君師臯。增二百五十斛有奇。合今所增。通爲米六千一百斛有奇。以學論提點莊事。劉少南。張敏子云。八年八月記。

吉州右院獄空記

吉州右司理院。迺開慶元年五月獄空。九月又空。明年五月又空。吉爲州。凡三獄。曰州院。曰左司理院。右院。其一也。方千里之國。未易爲理。而物之不齊。其情固然。省刑罰。止獄訟。賢者雖欲爲之。而格於其勢之

所不可。長老傳說。以爲自南渡百餘年。惟乾道庚寅。嘉定甲申。獄嘗空。乾道事不知何如。嘉定間。南昌張別駕。被旨攝廬陵郡。初。張宰清江。得米南宮。獄空二字。勒諸珉。以詔不朽。泊來吉。摹本遍付諸獄。不三月。遂皆以空告。由今推之。爲長民者。一念之善。感召和氣可也。上有所好。下從而逢之。是未可知。夫以百餘年。兩見之事。可謂稀闊。而其可疑。又如此。然則雖謂之絕無僅有可也。今司理君。爲政寬允。嘗平反死事。二法應賞。君不自以爲功。當路論功。亦不及。人謂君超然利害之表。君曰。吾盡吾心而已。而何賞之較。君實有愛人利物之心。哀矜庶獄。無所不用其至。人人自以爲不冤。獄空遂爲常。君書三考。候代者未至。歲月有奇。獄空之事。其二在考內。其一在候代。時院之設久矣。官此者幾人。得闕而來。受替而去。其間可紀之盛。百餘年。僅僅兩見。今君受任三考。已能配此曠絕之蹤。而書滿已後。迄臻三美。君職於其事。可謂無愧矣。此而不書。後將何觀。雖然。予嘗上下世變觀之。自畫象之化遠。人心之樸。日以散。惟成康時曰。刑措不式。漢文時。幾致刑措。下此則唐初。死囚歸獄之事。人以爲奇。蓋唐虞後。至今三千餘年。而斷獄之省。數不過三四海之大。兆民之衆。不可以一院比也。然聖人得國而爲之。持之以道。使民遷善遠罪而不自知。其效驗。近卜於期月三年。而遠亦不過於必世。夫古今刑措之日。既如此其難。而區區空一院之獄。又如。此。其不數。聖人之志。其遂不可行邪。雖然。由君之事。則百餘年間。職業之可書。曾不一再。而君以歲月爲之有餘。天下事。信不可爲乎。神而明之。在乎其人。此予所以初爲世道感。而以其尙可爲者深幸也。嗚呼。

君其毋以自足哉。君姓洪名松龍嚴陵人。

龍泉縣太霄觀梓潼祠記

龍泉邑治左出門行數百步有太霄老子宮焉。辛酉之春予登其巔四山拱峙天宇高曠會令方營度作梓潼君祠邀予爲字曰元皇之殿既爲從事六月殿成明年令若士以書諭曰役之初興君實來辱爲之書請卒記之邑爲吉上游山川清拔民秀而文天聖以來高科鼎鼎出有位至侍從以忠直自奮尙論文獻者歸焉維柳實接壤桴鼓數震令初至適江上有警柳寇益乘以譟周旋軍旅不得以間事平令謂吾幸爲禮義邑雖倥偬不容不爲俗化地況少須暇乎稽諸圖志庭廟鱗立吾黨之士獨無所敬祀會賓興詔下乃進諸生謀曰今三歲大比試者以文進將文而已乎意必有造命之神執其予奪於形聲之表者蓋元皇是也士之所自爲行爲上文次之神所校壹是法合此者陟遠此者黜人謂選舉之權屬之有司不知神之定之也久矣蜀山七曲神所宅之國衣冠文物莽爲風塵惟神元命實始吳會英靈赫赫將從君父所在而依之是以江湖以南神迹多著此固士之所當欽崇而景仰者舍而不祠惟缺典是懼議遂決予按詩曰相在爾室尙不愧于屋漏又曰昊天曰明及爾出王昊天曰旦及爾游衍夫人一動之微必有神明焉得其情於幽隱易肆之地茲其所以體物而不可遺也惟經傳統謂之神未有所指名近世貴進士科士以得失爲病自元皇廟食於是始有司桂籍之說化書所謂九十四化變遷推移曠千百歲雖

涉於不可測知。然神生爲忠臣孝子，歿爲天皇真人，取士本末實防於人心義理之正，明有禮樂，幽有鬼神，果哉其不誣矣。孟子曰：天爵仁義忠信，人爵公卿大夫。古之人脩其天爵，而人爵從之。聖賢不語怪，而教人先內後外，未嘗非神之意。神雖游於太虛，而考德問業，初無戾於聖賢之言。其在祭法，苟有以明民成教，宜與祀典，則神之有祠，豈緇黃之宮之埒。邑有先民典刑，大冠逢掖，爭志策厲，爲臣止忠，爲子止孝。此其內心固油然不自已，而況高山仰止，明神在前，則其戒謹恐懼，工力當倍。他日拔起諸生，彬彬知名，則居公卿大夫之位，必將有仁義忠信之人，令之此舉，於人才甚有功於方來世道，非無所關繫。豈曰以區區科目望其人，而惠徼福於神之一顧哉。祠翼殿以廡，丹堊具鍾鼓供器如式，像設居中，內而父母婦子，事親之道，孝之屬也；外面侍御僕從，爲臣之道，忠之屬也。費錢七十萬，有奇，十萬爲令俸，餘哀多，迄于城觀下。古曰龍頭里，因其名爲坊，扁額校書郎姚君勉筆也。令方爲遠者計，廉用積餘市田以奉祠事，繼今邑之士，其受令之賜，永永無斁。令陳氏名昇，三山人，初攝事，繼辟今任云。

文山觀大水記

自文山門而入，道萬松下，至天圖畫，一江橫其前，行數百步，盡一嶺爲松江亭，亭接堤二千尺，盡處爲障東橋，橋外數十步，爲道體堂，自堂之右，循嶺而登，爲銀灣，臨江最高處也。銀灣之上，有亭曰白石青崖，曰六月雪，有橋曰兩峯之間，而止焉。天圖畫居其西，兩峯之間居其東，東西相望二三里，此文山濱江一直

之大概也。戊辰歲，余自禁廬罷歸，日往來徜徉其間，蓋開山至是兩年餘矣。五月十四日大水，報者至，時館中有臨川杜伯揚、義山蕭敬夫、吾里之士，以大學試，羣走京師，惟孫子安未嘗往，輒呼馬戒車，與二客疾馳觀焉。而約子安後至，未至天圖畫，其聲如疾風暴雨，轟騰震蕩而不可禦。臨岸側目，不得往視，而隔江之秧畦菜圃，悉爲洪流矣。及松江亭，亭之對爲洲，洲故垤，然隆起，及是僅有洲頂，而首尾俱失。老松數十木，及水者爭相跋曳，有偃蹇不伏之狀。至障東橋，坐而面上游，水從六月雪而下，如建瓴千萬丈，洶湧澎湃，直送乎吾前，異哉。至道體堂堂前，石林立，舊浮出水，而如有力者，一夜負去，酒數行，使人候六月雪，可進與否。圍棋以待之，復命曰：水斷道，遂止。如銀灣山勢回曲，水至此而旋，前是立亭，以據委折之會，乃不知一覽東西二三里，而水之情狀，無一可逃遁。故自今而言，則銀灣遂爲觀濶之絕奇矣。坐亭上，相與諧謔，賦唐律一章，縱其體狀，期盡其氣力，以庶幾其萬一。予曰：風雨移三峽，雷霆擊兩山。伯揚曰：雷霆真自地中出，河漢莫從天上翻。敬夫曰：八風捲地翻雷穴，萬甲從天驟雪颺。惟子安素不作詩，聞吾三人語，有會於其中，輒拍手捋鬚，捧腹頓足，笑絕欲倒。蓋有淵明之琴趣焉。倚闌踰時，詭異卓絕之觀，不可終極。而漸告晚矣，乃令車馬從後，四人攜手徐步而出，及家而耳目眩顛，手足飛動，形神不自寧者久之。他日子讀蘭亭記，見其感物興懷，一欣一戚，隨時變遷，予最愛其說。客曰：義之信非曠達者，夫富貴貧賤，屈伸得喪，皆有足樂，蓋于其心而境不與焉。欣於今而忘其前，欣於後則忘其今，前非有餘，後非不足，是故君

子無入而不自得。豈以昔而樂。今而悲。而動心於俯仰之間哉。予慙然有聞。自予得此山。予之所欣。日新而月異。不知其幾矣。人生適意耳。如今日所遇。霄壤間萬物。無以易此。前之所欣。所過者化。已不可追。紀予意。夫後之所欣者。至則今之所欣者。又忽焉忘之。故忽起奮筆。乘興而爲之記。且諗同游者發一噱。

鄒文叔垂芳堂記

吾鄉上游。有佳木連理。生於鄒公長者之地。不知幾何年。益公取以補廬陵圖誌。木濱水。如老蛟天矯。有騰騰怒起之勢。咸淳八年秋。一夕。大雷電以風。木隨水而飛。又二年秋。有蓮一帶雙華。出於文叔北窗下。苦池中。文叔長者曾孫也。連理表章於乾淳間。鄒氏始享有其瑞。予聞長者一再傳。皆恂恂友愛。同氣並根。既碩且蕃。實生來仍。今文叔之庭。二季競爽。兩孫端美。天將昌之。其殆視同穎兩岐。細縵坡北。而未有已乎。文叔喜。而命予題其堂曰垂芳。夫一草一木之微。比于太虛。僅同毛髮。而鄂不韙。雖小雅所爲賦也。於吾心得無感乎。予旦夕尙徘徊新堂。爲君廣棠棣之一章。

李氏族譜亭記

蘇老泉有族譜引。又有族譜亭記。引專言父祖子孫出於一本。不可忽忘。記則以鄉人查其世系。其言他人。或賊之故。愚嘗謂引之詞。極論骨肉之所從。而動其內心之愛。此宜與賢者道。至於記之所載。其言他人。或賊之故。而惟恐族陷於不淑。羞惡之心。人皆有之。則此訓又親切焉。西山李氏。家於龍泉數百年。先世有諱殺者。



興穎濱遊。老泉之譜引，自以爲得於而授，而切意其亭記，尙未及見也。今其族放蘇氏作族譜亭，以不忘先世穎濱之交，以庶幾老泉之意，有名繼祖者，又修復之，以紹前志，爲予求字，予爲之書，而樂道其美，夫其譜引先世，既自得以遺其子孫，今其子孫固已識先世之用心矣，予猶以爲未也，則告諸繼祖，歲時聚族拜奠亭下，更願與蘇公亭記，各各觀誦一過，使爲長上者，復申告之曰：謹毋爲鄉之某人者。

蕭氏梅亭記

廬陵貢士蕭元亨，江西帥平林公之孫，贛州龍南縣丞之子，蚤孤，有立克肖厥世，於其讀書游息之暇，有自得焉，乃作亭於屋之西偏，周之一徑，被徑一梅亭，後有廊，有詩畫壁，間前方池，廣五尺，飼魚而觀之，鄰牆古樹，蔽虧映帶，清風徐來，明月時至，君領客于此，上下談笑，客多乃祖父舊遊，而君樂從之，稱其家兒也。君名亭曰梅，而屬其客請記於予。予昔者登平林公之門，入其園，臺觀沼渚，卉木竹石，曲折靡勞，登覽幽遠，公緩步徐坐，杯酒流行，古君子也。退從贊府，與其次子江陵支使，昂然野鶴，粲然華星，南金荆玉，應接不暇，佳公子也。今是園也，亭館日以完美，草樹日以茂密，元亨兄弟，又從而增大之，夫高臺曲池，百歲倏忽，此孟嘗君之所以感慨於雍門周者也。予於君不十年間，俯仰三世，昔也念其門之遺，今也賀斯園之幸，則告於元亨曰：天地閉塞而成冬，萬物隸通而爲春，方其閉塞也，陰風翳栗，寒氣最厲，衆芳景滅，萬木僵立，何其微也。及其隸通也，木石所歷，霜露所濡，土膏墳起，芽甲怒長，何其盛也。天地生意，無間容息。

當其已閉塞之後。未棣通之前。於是而梅出焉。天地生物之心。是之謂仁。則夫倡天地之仁者。蓋自梅始。今君之樂斯亭而賞斯梅也。其何以哉。天地莫不有初。萬物莫不有初。人事莫不有初。人心莫不有初。君從其初心而充之。無非仁者。使梅而有知。吾知其爲君欣然矣。昔東坡記靈璧張氏園亭。推本其先人之澤。而拳拳然望其子孫。且將買田泗上。以與張氏游焉。予里人。辱君好舊矣。宜其甚於坡之愛張氏也。

衡州耒陽縣進士題名記

衡州進士題名記。設於學。耒陽隸焉。去年歷兵火。浸湮毀。耒陽宰郴江王某。始與其士刻石邑庠。以自爲一詞人物記。邦人鬱林教授周君道興。介予曰。縣之立是碑。屬歲大比。將作興士氣也。冀子爲之記。予嘉其勤。不得辭。按衡進士姓名可考者。自祥符省元。鄭向而始。景祐八人。俱擢第。郡人侈爲渾化。時耒陽居其三。嘉定郡貢十八人。耒陽又半之。間歲往往多得士。今邑人於花州之識。翹乎其未慙也。雖然。科第之末。不足爲儒者道。天下事固有大於此者矣。衡有石鼓書院。朱文公實爲記。其論世俗之書。進取之業。以爲志於己者所羞言。至謂學校科舉之害。不可以是爲適然而莫之救。先生所以正人心。破俗學者。願乎其志也。前輩之流風未遠。學者之分內何限。屬邑之士。其得無所聞乎。然則縣之此碑。將以紀姓名也。豈曰使人歆慕誇羨。矻矻然爲物外之歸哉。夫在上有師道。則在下有善人。修於家有正學。則天子之庭有真儒。此令尹與凡邑之士。兢兢終日而不能已者也。若夫苟焉而學。泛焉而仕。冒焉而題。則後人指之曰。

某也若何。某也若何。嗚呼。是可不凜凜乎哉。

撫州樂安縣進士題名記

撫領縣五進士題名記。自太平興國樂公史始。以迨于今。班班然。雖然。此記諸郡者。縣又各有記。郡縣皆以本人物之出。而縣又近也。樂安自紹興十八年始置縣。于時士文富義豐。頭角嶄出。志氣凜然。蓋文物之發。越久矣。三歲大比。由是而計。借者始而二三人。繼而四五六七人。擢奉常第者。始而一人。繼而二三人。斯盛矣。而記未立。闕也。予同年新贛州教授何君。時以書來京師。曰。薦於鄉而仕於國。皆仕之達也。追其已往之不及記。待其方來之不勝記。特託諸石。以詔不朽。願假之一言。辭不獲。按圖志。縣始創。實割崇仁三鄉。與吉之永豐一鄉。斯土也。蓋文明之會也。山川之英。扶輿清淑之所藏。是故名世出於其間。歐陽子之於永豐。文恭羅公之於崇仁。是其人也。今縣東跨西并。收拾奇山水。以爲一國。風氣磅礴。且百年於此。斯文之運。變以張王。此豈偶然之故邪。雖然。二君子所長。非科第也。有大焉者矣。登斯記也。高山仰止。景行行止。當如何哉。當如何哉。

瑞州三賢堂記

瑞有三賢祠堂。三賢。余襄公。蘇文定公。楊文節公。祠堂舊在水南閭闔。景定庚午燬于兵。前守嚴陵方君逢辰。遷之稍西。垂成而去。某爲君代。相遇於上饒。君語及斯堂。曰。瑞人之敬三賢也如生。三年無所於祠。

意閔焉。予是以亟新之也。然塗墍未畢。像設未備。子其成之。成則爲之記。某至郡。既敬奉君之教。遂率諸生行釋菜禮。而君書三至。診記之成。某不得辭。夫瑞爲郡。號江西道院。然在汴京盛時爲遠小。故余蘇二公皆以謫至。淳熙間。郡去。今行在所爲近。而楊公江西人。雖自蓬監出守。殊不薄淮陽也。地一而時不同。又守郡者與他謫異。然瑞人矜而相語。槩曰。吾郡以三賢重。余公坐黨范文正。蘇公坐救其兄東坡。先生後又以執政坐元祐黨。楊公坐爭張魏公配享事。使此三賢者皆無所坐。安得辱臨吾土。噫。甚矣。瑞人之好是懿德也。然三賢所養。猶有可得而竊窺者乎。范公忤呂丞相而去也。未幾復用。前日寅緣被斥者。以次召還。襄公自瑞徙秦。乃獨請嶺南。便郡以歸。愈去愈遠。豈非所謂同其退不同其進者耶。蘇公世味素薄。其記東軒。謂顏氏箠瓢之樂。不可庶幾。而日與郡家收緇銖之利。曾不以爲屈辱。異時再謫三徙之餘。退老穎濱。杜門卻掃。不怨不尤。使人之意也消。若楊公則肆意吟哦。筆墨淋漓。在郡自爲一集。與疇昔道山羣賢文字之樂。無以異也。若三賢者。豈以擯斥疎遠累其心哉。夫擯斥疎遠不以累其心者。其流或至於脩然遠舉。超世遺俗。而三賢又不然。余公用於慶曆。蘇公用於元祐。蹇蹇匪躬。皆在困躓流落之後。楊公當權。爰用事。屢召不起。報國丹心。竟以憂死。凜然古人尸諫之風。嗚呼。此其所以爲三賢歟。蘇前言之。吾知在瑞之時。樂天安土。蘇後言之。吾知在瑞之時。乃心罔不在王室。嗚呼。此其所以爲三賢歟。詩曰。高山仰止。景行行止。太史公曰。雖爲之執轡。所欣慕焉。瑞人之敬三賢也。又於此思之。當有以稱方君所

爲欲記斯堂之意。某於先正無能爲役。

建昌軍青雲莊記

大農簿趙侯守旰之明年。建青雲莊成。侯旦夕受代行矣。移書請記於廬陵文某曰。大江以西。縉紳衣冠。旰爲盛。旰賓與薦。士三十七。江山奇氣。發天地之藏。未艾也。郡有庫邑。有莊。皆以貢士名。貢鹿鳴與計偕者。僕馬道路而無虞矣。則後自念。士方奏名。待對皇帝。王伯之規模。造端發軔。如火始然。柰何以旅瑣瑣。病寒暖乎。會南豐有寺曰安禪。燬于寇。田若干。無所於屬。於是復其租稅。爲屋四楹。乃積乃倉於寺之廢址。命曰青雲莊。錢穀有司。三歲一會。凡旰之試御前者。曠各有差。所爲厚士於方來。蓋庶幾焉。某復於侯曰。自異學興。緇黃之宮。遍天下。其徒蠶食。阡陌相望。有志之士。嘗欲磨以歲月。聽其消亡。士大夫蔽於福田利益之私。非惟無救於敝。更張之侯也。炳然大觀。右儒而左釋。制其膏腴。移彼于此。正合前賢建置。可謂執德而不回者矣。孟子曰。我善養吾浩然之氣。夫浩然者。際天地而常存。不假外物而爲消長。士豈以侯爲晚已哉。詩云。菁菁者莪。在彼中陵。既見君子。錫我百朋。釋者曰。古者貨貝五貝爲朋。百朋得祿多也。小雅之序菁菁者。美其育材。變小雅之次菁莪者。傷其廢禮。以君師在上。取其長育人材者。禮如何其廢之。矧諸侯奉天子命。守土有國。士賢者能者。悉上送春官。勸駕續食。固其所也。侯推廣國家樂育之意。知盡禮而已。與之者。非以爲恩。受之者。豈以爲不屑哉。莊生論鵬搏扶搖而上者九萬里。風斯在下。本放曠

者寓言。自隋唐以來。世人尊異科第。若青雲者。放之而爲之辭。古之人。其身益高。其心益危。人以爲瞻望不可企及。乃其憂責之始。士之於一旦。豈真以發身爲汗漫乎哉。易之象。雲上於天。需。君子以飲食宴樂。士待對時也。雲雷屯。君子以經綸。士澤物時也。侯。誠有望於人物。有意於世道。有以爲需之飲食。侯事也。無以爲屯之經綸。士責也。侯不負士。士亦不負侯。是爲不負所學。不負天子。侯名孟適。董莊事者。前通判臨江軍。曾君稷。新袁州萬載縣主學。徐公應午。貢士。庫名存而實湮。以白金二十鎰補其籍。改庫爲田。以利久遠。其出內則隸是云。

贛州重修清獻趙公祠堂記

郡所在祠先賢之爲守者。守得祠以遺愛。然而百世之下。君子之澤。有存焉者。寡矣。而聞其風。爲之興起。尸而祝之。不謀同辭。識者於是。上下世道。而觀其大節焉。故參知政事贈太子少師清獻趙公抃。歷事仁宗。英宗。神宗。以忠亮純直。爲時名臣。公嘗治虔治杭治越。其政本之以清淡。行之以簡易。寬不爲弛。嚴不爲殘。使在漢氏。課功第能。當不在循吏下。抑公所爲。大過人者。不寧惟是。當王安石變更祖宗法。海內騷動。廷臣唯諾。移走。莫敢後先。獨與司馬文正光。范忠文鎮。唐質肅介。額額爭論。不少假借。至上疏言。財利於事爲輕。民心得失爲重。不罷青苗使者。非宗社之福。公卒去位。小人相繼用事。濁亂天經。孽牙禍根。荆舒之罪。穢汗簡冊。如有一个臣。斷斷猶無他技。中原遺老。炳然元龜。天下後世。感憤追想。猶凜凜有

生氣嗚呼。此其所謂大節。關繫於世道治亂升降。而不可誣也。咸淳六年。知贛州大宗丞番易李侯雷應。以公嘗辱爲是邦。始至。訪公祠所在。郡治故有祠。與濂溪並。自濂溪移祀于學。前守陳公宗禮始建公廟于城之東偏。歲時妥侑。習爲故常。屋弊且壓。神不顧享。侯慨然曰。是不可憚改。會歲豐人和。庭無徵發。於是棟楹欄檻之腐敗撓折者。瓠甕丹雘之疎漏患漫者。神位祭器之缺失不如禮者。所費儉約。一日新美。又更爲之門。俯臨大衢。非徒侈觀。使過者敬恭焉。明年夏五落成。侯時已除湘南刑獄使者。將行走書闕。某記之。某惟吏道苟且。逐末忘本久矣。侯之先公忠清。有風裁於世。侯得之見聞。獨能尊事文獻。景行先哲。示邦人以釋教思。其淵源有自來哉。清獻距今二百餘年。贛石公所繫也。章貢臺公所創也。公之事遠矣。而其山川猶有衣被其餘者。贛人之思之曰。公生而德澤在吾土。公之賜也。公死而典刑在吾土。公之賜也。嗚呼。公之在熙寧也。當時小人號爲得志。富貴漸盡。終歸無有。贛何地也。而公祠在焉。後公而爲贛者相望。亦豈無可以繫去思者。而公之祠。嶄然靈光。何其懿也。嗚呼。士大夫之於當世。其大節可不謹哉。可不謹哉。

贛州重脩嘉濟廟記

今天子咸淳六禩。大宗丞權侍左郎官李雷應。被旨知贛州。贛地大而俗囂。山寬而田狹。俗囂故曷以譟。田狹故曷以餓。侯未至以爲難。將至以爲憂。乃七月下車。膏雨霑流。嘉氣盆集。民聲大和。四郊以寧。侯悅。

莫喻所從來也。百姓歌之曰：我土溼溼，黍稷芄芄，孰啓我侯。我神之功，我氓蚩蚩，牛犢熙熙，孰相我侯。我神之威，侯驚召父老，進而問故，曰：是何神也？父老相率告於庭，曰：州之東有廟，曰嘉濟，自秦漢以來，血食至今。我民司命，匪神其孰尸之？侯恤然曰：我何以得此於神哉？抑神實德我，我其有不致力於神，迺肅籩豆，乃潔牲牲，晨起詣廟，以謝以祈。既竣事，周視庭宇，不遑于寧，始建議營度，刊木于厓，浮竹于津，厥材既堅，厥工惟時，植圮支仆，撤去庫陋，備力奔走，咸勸於事。堂皇言言，廊廡嚴嚴，有門秩然，有亭翼然，於是神位具宜，廟制大備。王宮皇皇，袞冕裳衣，祠既畢，則以其餘脩道途，以便來游者。葺二浮梁，以便絕江者。錢奇二百萬，粟奇二百碩，悉出侯所節縮，故役成而人不知。明年四月，侯除荆湖南路提點刑獄，未行，粟米在市，蠶麥滿野，雞犬相聞，達于嶺表。訖侯去，視始至一如日焉。百姓復歌之曰：弈弈廟貌，我侯新之，侯爲我民，匪神是私，田有稻粱，野無干戈，微侯之賜，胡以室家，屢舞僊僊，伐鼓淵淵，何以報侯，萬有千年，予時臥山中，州從事具本末來，屬予言其事，予按祭法，能禦大菑則祀之，能捍大患則祀之，神之爲靈，昭昭矣，謹叙次下方，納諸廟門爲記。

贛州興國縣安湖書院記

贛興國縣夫子廟，在治之北門，縣六鄉，其五鄉之人，來游來歌，被服儒雅，東二百里曰衣錦鄉，其民生長，斗絕險寒，或爲龍蛇，瀆于邦經，有司黽勉，以惠文從事，咸淳八年，宣教郎臨川何時來爲宰，憫然曰：使人

不可化。則性命之道熄矣。顯邑校曠。越不克施。乃夏四月。卽其地得山水之勝。議建書堂。以風來學。召其豪長。率勵執事。堂庭畢設。講肄有位。彙試館下。錄爲生員。凡二十八人。又拔其望四人爲之長。冬十月。令率諸生。以牲幣薦于先聖先師。樽俎撰章。等威孔嚴。環觀愕眙。屏息胥忤。鰥老婦子。轉相傳呼。然後翕然以儒者爲重。令曰。吾教可行矣。載命胥正。秩其比伍。家使有塾。人使有師。如黨庠術序之意。置進學日記。令躬課其凡。督以無怠。又上諸府。改其鄉曰儒學。植之風聲。於是山長谷荒。人是用勸。咸願進嚮文事。率由訓程。傳曰。天地之道。浸言化以漸也。風俗之積。幾千百年。而令一朝變之。固若是速歟。共惟國家五星聚奎。實開文明。皇祖制詔。天下州縣立學。所在表章儒先。復創書院。三代以下。斯文彬彬焉。先民有言。地氣自北而南。粵從衣冠正朔。啓我吳會。自江以南。悉爲鄒魯。今也遐荒陋僻。沐浴教恩。如狂得瘳。如迷得呼。王澤之滲漉日深。地氣之推移日至。此豈偶然之故哉。予於令爲同年進士。適守是州。今奉天子明訓。以字民爲職。能廣學愛宣德化。是爲不辱威命。將上其事於朝。復諗之諸生曰。昔有文翁興學于蜀。受業博士。時則張叔學官弟子。畏而懷之。彼何人哉。叔兮叔兮。又進諸生之長諗之曰。昔有文公設教于湖。潮人趙德以士見招。維文與行。倡于齊民。其則不遠。德哉若人。諸生拱而前曰。某等幸生明世。惟師帥不鄙夷之。俾獲有聞。雖不敏。敢不受教。請刻諸石。以詔百世。書院之制。前爲燕居。直以杏壇。旁爲堂。左先賢祠。祠後爲直舍。繚齋以廡。不侈不隘。臨溪爲之門。堂名絜矩。齋名篤志。求敏明辨。主善率性。成德其門。總曰。

安湖書院某山中所題云。

道林寺衍六堂記

余行步長沙道湘西登道林寺。舊有四絕堂。指沈傳師裴休筆札。宋之間杜甫篇章也。堂之顏。吾鄉益國周公書之。至是百二十年。公又有記。述蔣之奇語。之奇取歐陽詢書。韓愈詩。而黜裴宋。公獨合古今異同。有衍四爲六之說。人之意度相遠如此。僧志茂以屋壓字漫。壽公字于石。取公之意。易名衍六。將揭於新堂。予嘉其有二善焉。補唐賢故事。寶乾淳遺墨。非俗衲所爲。爲之嘉歎而記其後。

五色賦記

孟春之二十五日。發舟石鼓。越三日。過衡山。宰趙孟倬。送縣志遺逸門一段云。寇豹與謝觀同在唐崔裔孫門下。以文藻知名。豹謂觀曰。君白賦有何佳語。對曰。曉入梁王之苑。雪滿羣山。夜登庾亮之樓。月明千里。觀謂豹曰。君胡不作赤賦。豹曰。田單破燕之日。火燎于原。武王伐紂之年。血流漂杵。前輩游戲文字。足以解人頤。如此。客曰。更做之作黑賦如何。予應聲曰。孫贖銜枚之際。半夜失踪。達磨面壁以來。九年閉目。客絕倒。予曰。君盍賦黃賦。青如何。一客云。杜甫柴門之外。雨漲春流。衛青塞馬之前。沙含夕照。又一客云。帝子之望巫陽。遠山過雨。王孫之別南浦。芳草連天。曰黃曰青。不于其蹟。而于其神。亦一時興致所到。因反觀寇謝前作。惟月明千里。得白之神。曰雪曰火曰血。皆不免着迹。且漂杵是武王一處事。燎原與田單。

不相干。一客改之曰：堯時十日並出，燦石流金，秦宮三月延燒，照天燭地。一客又曰：夜登庾亮之樓，月明千里，如何對。或對曰：秋泊袁宏之渚，水浸一天。予謂前作已是劣劇，後來者又進乎滑稽矣。因次第其高下，赤豪雄第一，黑深妙第二，黃神俊第三，白脫灑第四，青風韻第五。或以黑爲冠，予亦莫知其定。因記之以諗觀者。

衡州上元記

歲正月十五，衡州張燈火合樂，宴憲若倉于庭。州之士女，傾城來觀。或累數舍，謁蹙而至。凡公府供張所在，聽其往來，一無所禁，蓋習俗然也。咸淳十年，吏部宋侯主是州，予適忝陳臬事，常平以王事請長沙，會改除。於是侯與予爲客主禮。是晚，予從城南竟城東，夾道觀者如堵。入州，從者殆不得行。旣就席，左右橙及階，階及門，駢肩累足，儼儼如魚頭。其聲如風雨潮汐，咫尺音吐不相辨。侑者集三面之人趨而前，執事幾不可曲折。酒五行，升車詣東廳。廳之後稍偏爲燕坐，俎豆設焉。主人旣肅賓，車不得御，乃步入燕坐之次。至兒童婦女，雜襲而爭先。男子冠以上，往往引去。及獻酬，州民爲百戲之舞，擊鼓吹笛，爛斑而前。或蒙棋焉，極其俚野，以爲樂游者，益自外至，不可復次序。婦女有老而禿者，有羸無齒者，有偃僕而相攜者，冠者，髮者，有盛塗澤者，有無飾者，有攜兒者，有負在手者，有任在肩者，或哺乳者，有睡者，有睡且蘇者，有啼者，有啼不止者，有爲兒弁髦者，有爲總角者，有解后叙契闊者，有自相笑語者，有甲笑乙者，有傾堂笑者。

有無所觀隨人笑者。跛者倚者。走者趨者。相牽者。相扶擎者。以力相拒觸者。有醉者。有勃者。咳者。唾者。噎者。欠伸者。汗且扇者。有正簪珥者。有整冠者。有理裳結襪者。有履闕者。有倚屏者。有攀檻者。有執燭鼓。惟恐墮者。有酒半去者。有方來者。有至席徹者。兒童有各隨其親且長者。有無所隨而自至者。立者。半坐於地者。有半坐。柩下者。有環客主者。有坐復立者。有立復坐者。視婦女之數。多寡相當。蓋自數月之孩。以至七八十之老。靡不有焉。其望於燕坐之門外。越趨而不及近者。又不知其幾千計也。當是時。舞者如儻之奔。狂之呼。不知其饜也。觀者如立通都大衢。與俳優上下。不知其肆也。予與侯頽然其間。如爲家人之長坐於堂。而驕兒駭女。充斥其間。不知其偈也。予起而舉酒祝侯曰。以平易近民。而民近之。豈弟父母。侯之謂矣。侯醺且執爵前曰。惟使者使民不冤。無湮辭其和。我是以大有民。予避且謝。則復諸侯曰。使時和歲豐。日星明。概舉海內。得以安其生。而樂其時。衡與賜焉。維天子之功。臣等何力之有。侯拱而立。侯蜀人也。因與予言。益州承平時。元夕宴遊。其風流所親見。蓋出于祖宗德澤。天地涵育之久。而今不可復得矣。予愍然私念之。開慶景定間。衡以中州。不得免於難。今城郭室廬。公私文物。猶草創綿絕云爾。然以幾世幾年所爲郡。而十數年間。卒然脩復。得其大體。非國家忠厚積累於民力愛養有素。豈望如今所成立哉。蜀自秦以來。更千餘年。無大兵革。至于本朝。侈繁鉅麗。遂甲於天下。不幸蕩析。若鬼神之忌盈者。今衡之民。務本而勤力。歲時一觀游之外。衣食其耕桑。儉而不泰。風氣淳厚。猶南方建德之國。其將進而未已者乎。

予爲親懷歸得郡且行。侯選表於朝有日矣。惟一時民物之槩。得於目擊。相與嗟嘆闕絕。而欣喜不厭於心者。不當無所紀。且懼夫可愛可愕之狀。俯仰蹉跎。忽不可以復追也。燕之明日。亟奮筆記之。以庶幾觀風之意。且使後來者。於侯政有考焉。侯名遇。今居延平。

雷州十賢堂記

國朝自天禧乾興。迄建炎紹興。百五十年間。君子小人消長之故。凡三大節目。於雷州無不與焉。按雷志。丞相寇公準以司戶至。丁謂以崖州司戶至。紹聖後。端明翰林學士蘇公軾。正言任公伯雨。以渡海至。門下侍郎蘇公轍。以散官至。蘇門下正字秦公觀。至樞密王公巖叟。雖未嘗至。而追授別駕。猶至也。未幾。章惇亦至。其後丞相李公綱。丞相趙公鼎。參政李公光。樞密院編脩官胡公銓。皆由是之瓊之儋之崖。正邪一勝一負。世道以之爲軒輊。雷視中州。爲遠且小。而世道之會。乃於是觀焉。我度皇之九年。詔大府寺簿虞侯應龍知雷州。侯雍公曾孫。有文學。凡登朝。必與史事。諸所褒貶。得春秋大旨。植之風聲。尙有典刑。其至雷也。考圖諜。訪耆老。顧瞻山川。怒如有懷。乃黜丁氏章氏。自萊公以至澹菴。凡十賢。爲祠於西之上。使海邦興起前聞。一朝皂白。知所以勸。敬賢如師。疾惡如仇。侯所爲。豈刀筆細故哉。嗟乎。雷何地也。諸賢冠冕於此。儼然而威。自太守諸生以下。敬恭登降。制幣薦奠。如先聖先師。人有常言。惟是風馬牛不相及也。諸賢何以得此於南海。南海何以得此於諸賢乎哉。我祖宗待士大夫。忠厚而有禮。稽諸司敗嶺海。

則止此事。上配帝王。非漢唐所及。雖施之姦回。容有傷惠。而賢者失路。靡不獲全。祈天永命。萬有斯年。噫。盛德事也。祠經始于十年九月。十月吉日落成。侯謂予同館。走書數千里。至贛。屬予記。予不敏。叙其凡。復爲迎送神辭。使祀則歌之。辭曰。颶風起兮雲黃。萬里兮故鄉。桃菊兮祓不祥。何懷乎斯宇兮。惟獨有此衆芳。海可竭兮神不可忘。五嶽爲質兮。三辰爲光。保我有國兮。萬年其昌。

雷州重建譙樓記

凡並海而爲州。皆有颶風。而雷爲甚。中州多山地。氣固密。城郭公府。苟非水火兵革之難。雖累數千百年存焉。可也。南方歲有颶風。拔大木。蜚大屋。以爲常。矧雷三而際海。當風之衝。豈獨城樓難哉。太史氏虞侯應龍來爲守。是爲咸淳十年六月十有二日。夜半。颶風作。厥明。視譙壓而城壞。方風之來也。其暈如虹。有蜃氣如樓臺。及其歛。霍凌轢。訇哮撞搗。其聲不可名狀。侯曰。斯樓郡以晝夜者。非大且壯。無以支永久。乃筏鉅材。鳩工並興。設爲巍峨。下臨鯨波。人聞而撫然曰。天下猶海也。世變猶風也。昔人有言。大廈非一木可支。又曰。震風凌雨。而後知廈屋之帡幪也。侯所建立。有安天下之道焉。侯之爲雷也。寬而有制。嚴不爲暴。始至。蒐軍明律。戮澤中爲龍蛇者。獄有三年。淹破其貨內者。覈丁籍。實民賦。老壯以時。富貧有經。又爲之表賢哲。興學校。開其倫常。示人有恥。陶爲清淳。訟是用希。凡此皆侯所爲。反風徒譙之本也。天子聖神文武。克有天命。祝融受職。海若順令。侯爲政知所本。价人維藩。式是南邦。城樓云乎哉。

序

孫容菴甲斐序

容菴孫先生。早以文學自負。授徒里中。門下受業者。常數十。晚與世不偶。發其情性於詩。今其家集甲乙丙。彙爲三帙。當先生無恙時。乙官湖王公。介爲序。丙今念齋陳公。彬筆也。獨甲篇首無所屬。太史公將以自序云爾。不幸未就。賈志以歿。後二十二年。先生之子演之。孫應角。出其本命子序。以補其遺。先生之爲詩。縱橫變化。千態萬狀。前二公模寫極矣。後生小子。於前輩畦徑。不能窺也。獨嘗往來容菴。知先生所以爲詩者。今夫山一卷石之多。及其廣大草木生之。禽獸居之。寶藏興焉。今夫水一勺之多。及其不測。鼉鼉蛟龍魚鱉生焉。貨財殖焉。天下之奇觀。莫具於山水。山水非有情者。莫之爲而爲。何哉。傳曰。山藪藏疾。江海納汙。則其所容者衆也。先生之菴。介於閩閩。敞二尋高。爲楹不踰丈。求其領略江山。收拾風月。則亦無有乎爾。然先生讀書。白首不輟。皇王帝霸之迹。聖經賢傳之遺。下至百家九流。閩閩委巷。人情物理。纖悉委曲。先生旁搜遠紹。蓋朝斯夕斯焉。是百世之上。六合之外。無能出於尋丈之間也。以一室容一身。以一心容萬象。所爲容如此。此詩之所以爲詩也。先生名光庭。字懋。居廬陵富川。以詩書世家。今其子惟終。放情哦謔。爲詩門再世眷屬。其孫懋。於文學方翹翹自厲。發矢於持滿。流波於旣溢。以卒先生爲詩之志。詩之道其昌矣乎。予里人也。知先生爲詩之故。與其所以積累繼述。因發之。以補二序之未及云。

危恕齋論序

近世有灤塘巽齋二危論行於世。予讀其文。庶幾前輩之彷彿者矣。吾州恕齋危先生。其所爲論。積成帙。學者爭傳爲矜式。先生學爲桑梓之宗。行爲章甫逢掖之望。放而爲文。所謂仁義之人。其言藹如。臨川廬陵之危。是或一道也。抑二危以此決科發身。而先生不偶於場屋以死。則所遇之足悲也。雖然。遇不遇。無足計也。于其人而已。然則學恕齋爲文。尙從其人求之。

金匱歌序

金匱歌者。鄉前輩王君良叔之秘醫方也。初。良叔以儒者涉獵醫書。不欲以一家名。一日。遇病數十輩。同一證。醫者曰。此證陰也。其用某藥無疑。數人者駢死。醫者猶不變。良叔曰。是證其必他有以合。少更之。遂服陽證藥。自是皆更生焉。良叔寃前者之死也。遂發念取諸醫書。研精探索。如其爲學。然久之無不通貫。辨證察脈。造神入妙。如庖丁解牛。僮僕承蠅。因自撰爲方劑。括爲歌詩。草紙蠅字。連帙累牘。以遺其後人。曰。吾平生精神。盡在此矣。其子季浩。以是爲名醫。其子庭舉。蚤刻志文學。中年始取其所藏讀之。今醫途多奇中。一日。出是編。予然後知庭舉父子之有名於人。其源委蓋有所自來矣。天下豈有無本之學哉。世道不淑。清淳之時少。乖戾之時多。人有形氣之私。不能免於疾。世無和扁。寄命於嘗試之醫。斯人無辜。同於巖牆桎梏之歸者。何可勝數。齊高彊曰。三折肱。知爲良醫。楚辭曰。九折臂而成醫。言屢嘗而後知也。曲

禮曰醫不三世不服其藥。言嘗之久而後可信也。人命非細事。言醫者類致謹如此。然則良叔齊楚人所云醫也。若庭舉承三世之澤。其得不謂之善醫矣乎。予因謂庭舉曰。凡物之精。造物者秘之。幸而得之者。不敢輕。然其久未有不發。周公金縢之匱。兄弟之秘情也。至成王時而發。藝祖金匱之誓。母子之秘言也。至太宗時而發。君所謂金匱歌者。雖一家小道。然祖宗之藏本。以爲家傳世守之寶。其爲秘一也。子之發之也。以其時考之。則可矣。庭舉曰。大哉斯言。予祖之澤。百世可以及人。子爲子孫。不能彰悼先志。恐久遠沈泯。上貽先人羞。敢不承教以廣之於人。予嘉庭舉之用心。因爲序其本末如此。良叔諱朝弼。季浩諱淵。庭舉名槐云。

張宗甫木雞集序

三百五篇優柔而篤厚。選出焉。故極其平易而極不易學。予嘗讀詩以選求之。如曰。鴛言陟崔嵬。我馬何虺隤。我姑酌金罍。維以不永懷。如曰。自子之東方。我首如飛蓬。豈無膏與沐。爲誰作春容。詩非選也。而詩未嘗不選。以此見選實出於詩。特從魏而下。多作五言耳。故嘗謂學選而以選爲法。則選爲吾祖宗。以詩求選。則吾視選爲兄弟之國。予言之而莫予信也。一日。吉水張彊宗甫。以木雞集示予。何其酷似選也。從宗甫道于素。宗甫欣然。便有平視曹劉沈謝意思。三百五篇家有其書。子歸而求之。所謂吾道東矣。

漢法殺人者死。我國家式敬由獄。尤於人命重致意焉。情法輕重相去一毛。轉移蔽欺其謬千里。吾儒坐論書史。志其大者。因自以司空城旦之書。柱後惠文之學。爲不必講。不必講可也。而一日臨事。惛然受成。其爲誤不少。愛人利物之心。謂之何哉。近世宋氏洗冤錄。於檢覆爲甚備。宋氏多所敬歷。蓋履之而後知。吾邦趙君與樸甫階一命。而能有志乎民。反覆駁難。推究其極。於宋氏有羽翼之功矣。使君自此有中外之迹。日增月益。豈曰小補之哉。書曰。獄貨非寶。惟府辜功。又曰。無或私家于獄之兩辭。祥刑之本也。讀趙君此編。而於書再三焉。雖不中不遠矣。

裴知縣帥正錄序

訟九五曰。尚中正。下四爻竟。至於不訟。子曰。子帥以正。孰敢不正。惟上九一爻犯終凶。至錫帶三褫。豈帥之者之罪哉。居卦之終。爲險健之極。冀其矯操。非百倍其力。有所不能。茲易所以爲憂患之書也。裴君子輝宰吾廬陵。其聽訟必據經守法。不肯少委折以貳民聽。凡斷筆備書之冊。踰年幾三帙。名曰帥正錄。大哉。君之用心乎。廬陵訟最繁。自君視事。日以銷殺。從所帥也。然猶不免於有錄。而錄不免於再。且三風俗所積。其囂也久矣。夫豈一朝一夕之故。縣古諸侯也。使君私其土。子其人。教化之人人也。深則是錄。可以無作。今之縣三年一替。君之所試。曾幾何時。讀是錄也。庶幾期月而可者矣。子路問政。子曰。先之勞之。請益。曰。無倦。君而以無倦行之。是錄也。固筌蹄之粗也歟。君名曰升。豫章人。

蕭巖夫采若集序

選詩以十九首爲正體。晉宋間詩雖通曰選。而藻麗之習。蓋日以新。陸士衡集有擬十九首。是晉人已以十九首爲不可及。十九首竟不知何人作也。後江文通作三十首詩。擬晉宋諸公。則十九首邈乎其愈遠矣。予友雲屋蕭君巖夫。五年前善作李長吉體。後又學陶。自從予游。又學選。今則駸駸顏謝間風致。惟十九首悠遠慷慨。一唱三嘆。而有遺音。更數年。雲屋進又未可量也。十九首上有風雅頌四詩。俟予山居既成。俯仰溫故。又將與君細評之。

羅主簿一鶚詩序

詩所以發性情之和也。性情未發。詩爲無聲。性情既發。詩爲有聲。闕於無聲詩之精。宜於有聲詩之迹。前之二謝。後之一蘇。其詩瓌偉卓犖。今世所膾炙。然此句之韻之者耳。夢草池塘。精神相付屬。對床風雨。意思相怡愉。傳曰。立見其參於前。在輿見其倚於衡。謝有焉。樂則生。生則惡可已。蘇有焉。東溪君嗜詩。叔曰北谷。而雲谷又其弟。鶴鳴子和。埧斂籟。應天和流動。雍于一堂。所謂無聲之詩也。噫。謝之樂不能兼蘇。蘇之樂不能兼謝。東溪君合蘇謝而一之。其樂庸有既乎。若夫君所以句之韻之者。予非能詩。又焉能評。其歸問之二谷。

新淦曾季輔杜詩句外序

杜詩舊本病於篇章之雜出。諸家註釋人爲異同。淦北山子曾季輔平生嗜好於少陵最篤。編其詩做文選體。歌行律絕各爲一門。而紛紛註釋。自以意爲去取。意之所合。列於本文下方。如東萊詩記例。而總目之曰少陵句外。予受而讀其凡。蓋甚愛之。既錄其副。則復慨然曰。世人爲書務出新說。以不蹈襲爲高。然天下之能言衆矣。出乎千載之上。生乎百世之下。至理則止矣。虛其心以觀天下之善。凡爲吾用。皆吾物也。是意也。東萊意也。而北山子得之。觀舞劍而悟字法。因解牛而知養生。予也受教於北山子矣。

忠孝提綱序

江流滔滔。日夜無聲。水之常也。至於有觸之鳴。風激之爲波。則水之所遭。拂乎常矣。爲臣忠。爲子孝。出於夫人之內心。有不待學而知。勉而行者。古之人都僉吁咷。定省溫清。行乎忠孝之實。而不必以名知於人。此人道之自然也。若夫處時之變。遭事之不幸。始有不得已。而忠孝之名歸焉。則亦有可憫者矣。帝齋郭君某。有感於忠孝之事。既取古人之大節。疇分而爲之書。又哀皇朝事爲後卷。君之用心。所謂先立其大者。吾讀其書。蓋世變存焉。非徒纂集之末而已。抑有願與君講者。率士之濱。莫非王臣。守孰爲大。守身爲大。士君子之於天下。固不必食君之祿而後爲忠。親存而後爲孝也。語曰。仁以爲己任。死而後已。義理之責。庸有既乎。君更以是推廣其說。使人人知忠孝之爲切己事。常也。由其道。變也不失其節。則於世教。豈曰小補之哉。

八韻關鍵序

八韻關鍵者。義山朱君時叟所編賦則也。魏晉以來詩。猶近於三百五篇。至唐法始精。晚唐之後。條貫愈密。而詩愈漓矣。賦亦六藝中之一。觀雅頌大約可考。騷辨作而體已變。風氣愈降。賦亦愈下。由今視乾淳。以爲古。由乾淳視金在鎔。有物混成等作。又爲古。矧長楊子虛而上。胡可復見。然國家以文取人。亦隨時爲高下。雖有甚奇傑之資。有不得不俛首於此。若朱君立例嚴。用功深。蓋亦深達於時宜者。朱君執此以往。一日取先場屋。然後舍而棄之。肆力於爲文。其於古也。孰禦。雖然。又豈爲文哉。

壬戌童科小錄序

景定壬戌。童子十人。挑誦國子監。既中試。中書如初考。吾里王元吉爲首。該恩許兩試太常。以次九人。一試。童子歸而課業。當爲來科新進士。否則再試。能又中。卽待年出官矣。噫。其亦咄嗟乎哉。山林之士。白首佔畢。有終身不得名薦書。齒下士於朝者。童子未離幼學。已得以所長。頡頏當時。雖其得於天者不凡。而貴之也。人無異辭。然世之厄於命者何限。若此。獨不以自幸哉。童子歲月方來而未艾也。天下事有大於科目之學者矣。則將何如。韓子送張童子序曰。暫息乎其所已學者。而勤乎其所未學者。予謂童子其所已學者。經也。經。載道書也。童子向記其言語而已。而沉潛義理。變化氣質。蘊之爲德行。行之爲事業。未之及也。童子而能自其所已學者。溫習紬繹。深加履踐。希賢希聖。求之有餘師。而其所未學者。徐徐而勤之。

不爲後也。大學之法，禁於未發之謂豫。當其可之謂時。童子有之，予也有志乎競辰者，日斯邁而月斯征，愧悔多矣。敢無以相童子。童子倘有利於予言矣乎。

題家保狀序

吾鄉孫幼賓，善與人周旋，受人託必忠。吾黨之士，多與爲知識。三歲大比，其欲結保就試者，率以狀轉授。俾上之有司，幼賓無所愛力。每科輒結至數百保，榜揭之日，籍中多得人。由是中禮部者常有之。從事數科，今又將詔歲人爭以幼賓爲有驗。雖幼賓亦不能自己。一日持其籍以告予曰：君疇昔籍中人也。其爲我序之，予不能辭焉。按周禮大司徒以鄉三物教萬民而賓與之。此鄉舉里選之風也。考諸族師則五家十家五人十人，又使相保相愛，刑罰慶賞相及相共。凡保必有連坐。古以德行取人，於此猶有取爾。周官之法度與關雝麟趾之意固不相悖也。進士始於隋唐，本朝沿襲不改。日引月長，弊悖浸出。上之所以國防禁治者，務盡其術。若家保狀其一也。科目與鄉舉里選自不同，然其所以立法之意殆相似。然吾州士風接歐周胡楊之遺，知所自愛，其麗於族師之禁固鮮矣。幼賓作事必履實，其所受託亦不輕所任。刑罰之相及相共者，吾又固爲幼賓一保。吉爲州鉅，應試二萬餘，然他日得之，率是知名之翹翹者。幼賓自此網羅無遺，使千佛之名盡萃於一籍，則幼賓繼今皆慶賞之日也。吾爲子賀，不旣多乎。幼賓曰：嗜欲將至，有開必先。君言且驗矣。吾籍屢驗不一驗，將微福於君，請執此以往。

又家保狀序

吾嘗觀李肇記唐科舉事。都會謂之舉場。通稱謂之秀才。投刺謂之鄉貢。俱捷謂之同年。有司謂之座主。籍而人選。謂之春闈。將試相保。謂之合保。既捷。列姓名於慈恩寺塔。謂之題名。大宴於曲江亭。謂之曲江會。進士之爲貴於天下。其來尚矣。某吉水人。肯爲吾黨袁梓家保狀。使不煩自投於官。殆好事者。介予所知識。以其籍求序。予前一夕。夢有持一卷來。曰桂籍。得此夢。若驗焉者。是籍之人。由秀才試舉場。出鄉貢。試春闈。拜座主。敍同年。赴題名所。入曲江會。將必自此合保始。雖然。使君籍而止得科目人也。吾何觀焉。天下事。蓋有大於此者矣。仁山蒼蒼。文水泱泱。歐周胡楊。休有耿光。獨無追遺芳而昌之者歟。吾之望君籍也。如此。

新淦曾叔仁義約籍序名公苞

財利在天地間。爲義理之賊。三代以下。選舉不以德行。則士雖爲聖賢。猶將從科目以進。舉于鄉里。固得時行道之發軔也。然士方窮時。驥得一舉。屬有千里之役。無所取資。不得已。俯首屈意。以爲此之求。是不待仕。固已賊其心矣。此義約之所以不可廢也。予至新淦。親黨曾君叔仁。出其所謂青雲約。魁星約者。其爲約。視他郡。特有寓公助送之例。可以觀是邦之風矣。吾黨之士。凡與斯籍名。薦書走在所。居者無深責。行者無復顧。昌其氣以從事於文。塞塞諤諤。進奉天子之對。由此培植。爲他日賢公卿大夫。殆此籍有助。

焉。然則區區周急義之末者耳。其於人才有關係。則於後之世道不爲無益。其爲義不亦大哉。

送陸興鄒道士序

新吳昭德觀。或傳西晉劉仙人飛昇之地。其觀前井。猶仙人時丹井也。今鄒高士居其觀。亦以煉丹名。或曰。高士仙人之徒。與予詰其所以爲丹。則高士之丹。非仙人之丹也。仙人之所謂丹。求飛昇也。高士之所謂求丹。伐病也。仙人之心。狹於成己。高士之心。溥於濟人。且夫兼人已爲一致。合體用爲一原。吾儒所以爲吾儒也。重己而遣人。知體而忘用。異端之所以爲異端也。高士非學吾儒者。而能以濟人爲心。噫。高士不賢於仙人歟。

送彭叔英序

彭叔英以秀才精躋度。推予命。謂剛星居多。意若他日可爲國家當一面者。巽齋歐陽先生以三命折之。具爲之說。與叔英辨予命。叔英既錯下一算。又累先生齒頰。顧區區何足以當之。抑叔英所以許予。謂主命得火。行限得金字羅計。故至於有主殺伐等語。雖然。此以論項籍關羽。故曹擒虎之流。則可。而世固不必如此。而爲名將帥者矣。非叔英之所知也。予獨以爲陰陽大化。細縷磅礴。人得之以生。其爲性不出乎剛柔。而變化氣質。則在學力。如叔英之說。某星主剛。某星主柔。得剛者必不能柔。得柔者必不能剛。則是學力全無所施。而一切聽於天命。聖賢論性等書。俱可廢已。予性或謂稍剛。殆柳子所謂奇偏者。凜焉。

朝夕惟克治矯揉。懼陷於惡。敢以命爲一定不易之歸乎。叔英憮然曰。予言命。君言性。命之矣。抑予所以爲君言者。自謂不經。士固各有志。子之志。願聞所向。請轉與巽齋直之。昔諸葛孔明與石廣元。徐元直。孟公威遊學荊州。嘗曰。卿三人仕進。可至郡守刺史。三人問其所志。孔明笑而不言。予非孔明也。予之志。豈叔英得窺哉。

送王山立序

官湖王先生。以文章名家。其子山立。無忝於弓冶之業。蚤攜琴書。相從諸公筆硯間。既而曰。士不爲司馬子長遊。不足以爲學。於是上下四方者。幾年于行。今遊且倦矣。湖海之風波浸惡。山林之歲月漸長。歛其如川方至之銳。以就於霜降水涸之實。山立將從事乎此。昔孫泰山爲養索遊。范文正公給以月俸三千。遂得留意於學。卒爲一世師表。誠齋素貧。得劉氏館。以故旁搜遠紹。及讀世間未見之書。南渡以來。稱儒宗焉。二先生之事。夫人而可爲也。會有拈出故事。以嘉惠山立者。其靜以待之。

與山人黎端吉序

與癡兒說夢。終日悶悶。使人欲索枕僵臥。明者了了。不踰頃刻。能解人數百年中事。恨相見晚矣。山人黎端吉。客吾門。旬日風雨。旦稍霽。入吾山一瞬而還。若有德色。問之。則山川巨細。情狀變態。信手圖畫。如山中生長然者。何其敏也。黎氏祖爲吾鄉羅氏葬地。百年效驗。翁不見。端吉食其報。又能以術世其家。翁信

未死哉。端吉遺予地。予方撰屨出郊。而端吉又泝十八灘上矣。臨別。敘其說。其歸也。爲予復來乎。

贈林梅所序

何所無花。屈擅蘭。陶擅菊。林擅梅。乃若有定所。然古者以功爲地之封建。後世以文爲花之封建。屈之騷。陶之辭。林之詩。皆有功於花。是故花托於斯文。而後得其所焉。噫。九畹三徑。今無復存。林之孫義。獨能世襲孤山。與花周旋。所謂居其所而不遷者。君充拓門庭。於詩道益進。豈惟克有其土地。抑亦光昭其先君之功。懋哉懋哉。

送項巽可入南序

東坡作韓文公廟碑詩云。作書詆佛。譏君王。要觀南海窺衡湘。坡在南方。亦云。茲遊最奇絕。又云。茲遊奇絕冠平生。當文公諫佛骨。豈故欲爲揭陽之行。坡不幸罹黨禍。乃以炎方爲夸。自古詩人大言而非情。往往如此。吾鄉項兄巽。可與權之度嶺也。訪予於玉虹。予問子非不得已。是行何爲。則曰。巽可生也有四方之志。弱冠時。嘗一至番禺。已而走上饒。參疊山。拜東岡古爲。然後經潯陽。出赤壁。登黃鶴樓。今也。又將往見東岡。吾所學子長遊也。他時入南者。以風土爲憚。與權年未三十。神澤而氣強。擔簦行數千里。如適其東家。是其要觀南海而從奇絕之遊者。非詩人大言類也。子長南遊江淮。上會稽。闕九疑。浮于沅湘。北涉汶泗。講學齊魯。過梁楚以歸。而平生車轍。獨未至廣。與權今游子長之所未游。從而徧歷吳楚。按子長東

南故跡。登淮山以望中原。以庶幾盡見天下之奇。子長作史記。序三千年事。爲五十萬言。漢至今又千有餘年。不知與權後之所書。其詳略如何。書成以諗我。

送賴伯玉入贛序

賴君成孫伯玉。號竹澗。五雲人。自幼已好詩。長而浸癖。有甲乙藁行於人。戊午。出宜春道中。得詩三十。歸而哀以附於乙。自是以行爲趣。一日。以書抵予。曰。某也將泝十八灘。踐空同。非子龍茲行。彼之山靈水神。未易屈降。賴君之行。殆不苟然。贛之勝處。如鬱孤。如八境。如廉泉。如塵外寺。則如慈雲天竺。在唐有香山品題。至今墨蹟如新。入本朝。東坡山谷之流。交有以發其奇。而長其光價。而東坡蹤跡之密。精神之著。又其尤者也。賴君觸目爲思。開口成句。而騷人墨客之遺。又有以動其聲聲焉者。虛而往。實而歸。此行粹宜春章。資之得。其自足以成丙藁可知也。君之茲役。予何能贊一辭。抑予有請焉。君方盛年。於詩之道。其所造已非他人。以一句一字名世者比。以君之資。其當他有所進乎。司馬子長足迹徧天下。後來竟能成就史記一部。或議子長所用小於所得。少陵號詩史。或曰讀書破萬卷。止用資得下筆。如有神耳。頗致不滿。韓昌黎因爲文章。沒有見於道德之說。前輩譏其倒學。然猶不爲徒文。卒得以自附於知道。橫渠早年縱觀四方。上書行都。超然有凌厲六合之意。范文正因勸讀中庸。遂與二程講學。異時德成道尊。卓然爲一世師表。其視韓公所爲。蓋益深遠矣。今君挑包負笈。將四方上下以求爲詩。予也不止望其爲前所稱。

騷人墨客者。因誦言諸公之失得如此。君且行矣。歸而求之有餘師。

送李秀實序

三月二日。予有行役。宿郊外。次日昧爽。有來謁者。視之。李君秀實也。李君初不之識。一見。察其爲能言士。坐定。出詩三首。其自序末句曰。他事無求求者道。莫教徒手只空轅。今人有好爲尊大。以道統屬己。自任終日瞑目。夜半授倭己者。二三言曰。道在是矣。隱君授書。孺子取履。昔人以爲近於鬼物。往往類是。李君之求。其諸此之求歟。李君曰。予知不及此。予丈夫也。桑弧蓬矢之志。將於子長遊發之。噫嘻。子長盡天下之觀。一部史記。取資於此。先民有言。杜子美讀書萬卷。止用資得下筆有神耳。予固爲子長惜也。橫渠先生。早年英邁之氣。奮不可禦。上書行都。縱觀四方。後乃精思力踐。以其學接孔孟之緒。朱文公贊之曰。早悅孫吳。晚迹佛老。勇徹皐比。一變至道。懿哉淵乎。李君所欲求者。道也。則子長之終身不足師法。橫渠何可當也。顏何人哉。晞之則是。於李君之別也。書此以贈。

送彭和父遊學序

彭江西三瑞之一。和父其孫也。家傳詩書。半世以教人爲業。以兩歲無所於館。將遊學以問於四方。命予曰。可行乎。今夫大冠峨如。大裙襜如。談道理非不纏纏可聽。一旦有飲食之累。則棄三尺。蕩四維。苟可以求無飢者。無所不至。和父雖失館。夷然無感容。所爲皇皇問館之外。無他算。此之謂不失其本心。悠悠穹

壤獨無知心者歟。

贈談命朱斗南序

天下命書多矣。五星勿論。若三命之說。予大槩病其泛。而可以意推出入。禍福特未可知也。惟太乙統紀。鈎索深遠。以論世之貴人。鮮有不合。然閭閻賤微。有時而適相似者。倉卒不可辨。予嘗謂安得一書。爲之旁證。以窺見造化之庶幾哉。最後得朱斗南出白願山人秘傳書一卷。以十干十二支五行二十七字。旁施午豎。錯綜交互之中。論其屈伸刑衝六害。察其變動。生旺官印空。而爲衰敗死絕。衰敗死絕破。而爲生旺官印。祿馬不害爲貧賤。孤劫未嘗不富貴。盈虛消息。觀其所歸。和平者爲福。反是爲禍。其言親切而有證。予切愛之。獨其所著之文。可以意得。不可以辭解。乃循其本文。變其舊讀。槩之以其凡。表之以其例。其不可臆見者。闕疑焉。統紀十干。干各一詩。其辭雖若專指一干而云。而十干取用無不相通。故詩雖以百數。其大指數十而已。亦復如白願之例。別爲之篇。以附見其後。使二書貫穿於一人之手。彼此以補其所不及。年月日時。雖相去一字之差。而於銖兩輕重。爲不可誣矣。斗南吉水人。拔起田間。談命皆自得之妙。予謂初事統紀。失之者十之二三也。繼得白願書。失之者百之二三也。予觀斗南用二書奇中。所不在論。偶然而不中。則反求之吾書。書未嘗失。願用書者。或未盡耳。予又恨白願書有闕疑也。天命之至矣。出於人之所俄度者。不可一言而盡也。吾所見斗南論命。就其一家。真白眉哉。是爲序。

又贈朱斗南序

甲巳之年生。月丙寅。甲巳之日生。時甲子。以六十位類推之。其數極於七百二十而盡。以七百二十之年。月。加七百二十之日時。則命之四柱。其數極於五十一萬八千四百。而無以復加矣。考天下盛時。凡州主客戶。有至千四五百萬。或千七八百萬。而荒服之外不與焉。天地之間。生人之數。殆未可量也。生人之數如此。而其所得四柱者。皆不能越於五十一萬八千四百之外。今人閭巷間。固有四柱皆同。而禍福全不相似者。以耳目所接推之。常有一二。則耳目之所不接者。安知其非千非百。而命亦難乎斷矣。且夫五十萬八千四百之數。散在百二十期中。人生姑以百歲爲率。是百歲內生人。其所受命。止當六分之四。奇。則命愈加少。而其難斷。亦可知矣。嘗試思之。宇宙民物之衆。謂一日止於生十二人。豈不厚誣。而星辰之向背。日月之遠近。東西南北天地之氣。所受各有淺深。則命之布於十二時者。不害其同。而吉凶壽夭。變化交錯。正自不等。譬之生物。松一類也。竹一本也。或千焉。或萬焉。同時而受氣也。然其後。榮者枯者。長者短者。曲者直者。被斧斤者。歷落而傲年歲者。其所遭遇。了然不侔。夫命之同有矣。而其所到。豈必盡同哉。然則參天地之運。關盛衰之數。此其間氣。或數百年。或百年。或數十年。而後一大發洩。必非常人所得與者。於五十餘萬造化之中。不知幾何。可以當此。而天地寶之不常出。鬼神祕之。不使世人可測知也。嗚呼。論至此。則命書可廢也耶。因書于歐陽先生贈月窗說後。

贈曹子政劍客序

江西劍客吾鄉曹子政算命標榜也。予曰：子卜也。而取劍何居？曰：世人賣卜，事詔媚，捐苦口，皇皇於一食之末，予恨其道之不直也。如是而福，如是而禍，一無所回護，故予剛者之爲也。予言必剛者而後能聽，劍是以得名。予曰：噫嘻！昔人有學字，觀公孫大娘舞劍而神，劍無與於字，而迴朔赴仆之間，乃足以相發。今子雖爲卜，而有取於劍之剛者，亦詎曰不宜哉？或曰：然則是腹劍也。予曰：惡！是何言！子政豈口如蜜者邪？或人語塞，因書以遺之。

贈山人黃煥甫序

黃景文煥甫，乃祖贛風水名術也。予里大家祖地，多出其手，而煥甫以術世其家。前十三年，予嘗以詩送之。又數年，覺煥甫小異，亟取詩更其辭，而實未深知煥甫也。煥甫遊從日以密，講辨日以多，今也而後探其胸中之所存，果有大異乎時人者。噫！知煥甫晚矣。煥甫嘗與予上下阡隴，凡予動心駭目，以爲奇詭雄特，輒掉頭不謂然。至淡然平夷，漫不起人意，往往稱不容口。予始甚訝之，久而服其爲名言也。大概煥甫之術，以爲崇岡復嶺，則傷於急；平原曠野，則病於散。觀其變化，審其融結，意則取其靜，勢則取其和，地在是矣。舍是而求地，亦固有之，而非煥甫之所謂地也。山人之獻地者，日至吾門，予使煥甫往觀，常不滿一笑。煥甫曠數年始獻一地，所獻真如其說。予爲山人所欺者多矣。若煥甫，真不欺我者，惜也。煥甫汲汲

餽口以奔走於四方。以予之近且久，幾不相知。卒然使人一見，使人愛其術而不疑，斯亦難矣。予嘗謂能爲煥甫百指計，使煥甫安居一年，必能時發天地之藏，以使予欣然而不厭。予方糞石山中，計必不能及此。姑遂其說，庶幾有因子而信煥甫，煥甫必能出所學以報所知。是楚人亡弓，楚人得之，予又何幸焉。

贈黃璘翠微序

黃璘，吾鄰人，得祖父風水之學，問與之登山，鋪張造化，口角瀾翻，亦可愛。吾館人議以翠微名之，翠微山之腰，蒼蒼鬱鬱之象，山人所得稱，抑微乎微者。地理書所謂隱隱隆隆，吉在其中，此則羸心者所不能得其彷彿。黃生齒新而意銳，更下入細工夫，以庶幾吾所謂微者。

贈仰顛峯拆字序

顛峯仰宗臣，以拆字之術行京師，諸公贈言，陳往驗甚悉。予未卽信，試之且數年，每言輒酬，奇矣哉。予問顛峯曰：禍福將至，必先知之，吾聖人則有教矣。就字而言，字心畫也，得於心，應於手，夫固動乎四體之一也。由此而推，資稟之強弱，操術之正邪，生死壽夭，貧賤富貴之理，於其字畫之大體，而夫人之平生，可一言而盡，是則予固能知之。今夫卒然而遇人，曰：請所欲書。夫人者，亦倘然應之，曾不經意，而子於其偏旁上下之間，紬繹解說，曰：某宜禍，某宜福，則其臨書之際，豈亦有鬼神壓乎其上，誘其中而運之肘歟。不然，字而字耳，何靈之有。顛峯曰：未也。天下禍福之占，于其動而已，木之榮枯，康節不能索之於其靜，一葉之

墜。算法生焉。世人見墜葉多矣。誰知大化。寄此眇末。子之觀字也。于其心。子之觀字也。于其心之動。是法也。得之異人。異人誠勿言。君退思之。子推其理不可得。而又動於巔峯之異。則思夫聖人之於事。其存而弗論者不少矣。相視一笑。就用其言贈焉。

送僧了敬序

萬安僧了敬。丙辰年來謁。示予以夫子像。予初怪之。與之語。彷彿儒者氣象。閱諸公賞音。則知其能爲詩。能讀先儒語錄。又能築讀書堂。以與邑之逢掖者處。而後嘉其來意之有以也。越五年。予至其宮。求其所謂讀書堂者觀之。則方裒繕斂材。召審曲面勢者而商度焉。因知諸公所以亟稱之者。書其志也。敬師之。竟就是役者。志之不忘也。自佛入中國。其徒牢護其說。遂與儒者之教。並立於天下。太顛止於海上。韓公屈與之交。當時羈窮寂寞之餘。以其聰明識道理。姑與之委曲於人情世故之內。其於變化其氣質。移易其心志。攘除其師之教。未必有焉。以今敬觀之。則其崛起於浮屠之中。而若有得於聖賢君子之說。而凡精業勤行。以學韓之學者。又與之周旋一室。以上下於其間。其爲聰明識道理也。多矣。陳良楚產也。閱周公仲尼之道。北學於中國。孟子推爲豪傑。然則敬師。非僧之豪傑也歟。

吉水縣永昌鄉義役序

吉水縣永昌鄉某都建義役。復淳熙成規也。予同升陳君某既爲序。則貽書於子曰。願贊一言。使鄉黨鄰

里有所憑依。日庶幾微。福於君之筆。俾勿壞。子懼不敢當。以其爲義設。不得辭。嗚呼。義役之不行。而差役之紛紛何甚也。民無以相友助。相扶持。乙曰。甲當役。甲推之乙。乙復曰。甲展轉而聽命於長民者之一語。時則其權在於官。官無以自爲也。雁行錯紙尾而進。曰。某宜差。某有以私其人。則改曰。宜某。時則其權在於吏。一方之版籍。吏胥主之。高下其手。紊於多寡之實。時則其權在於鄉胥。閭閻之間。紛爭之微。架點者乘間而起。告訐因之。而差法以亂。時則其權在於姦民。受役者有二三年迄無一事。有不幸而殺傷盜賊。鬪於其境。不旋踵家破。時則其權在於天。今陳君與其鄉約曰。爾役月日若干。爾末減若干。爾費若干。至若干以上。助若干。一齊惟公是據。處之者無媿辭。承之者無拒色。是役之權不在官與吏。與鄉胥。與姦民。與適至之天。而在吾鄉里和氣間。義之用大矣。利久遠而無訟。仁也。使人知有遜讓禮也。不以資奸智也。盟而無敢後。先信也。一舉而五常備焉。豈惟義哉。鄉之長上。其中告子弟曰。如是而福。如是而禍。守約者久處。敗羣者交罰。使一守是法。永永無斁。則其於是邦之風俗。不爲無小助。噫。亦安能下其法於天下哉。

燕氏族譜序

嘗謂人之有祖也。如水之有源。木之有本也。夫源之深者流必長。本之固者末必茂。此自然之理。已然之驗也。燕氏榮泰。來自龍潭循州。好山水之勝。通陰陽之理。歷吉之東。鄉大北溪。見其江山秀麗。地勢盤旋。

於是遂徙居之。榮秦生男貴玉，勤而力學，未遂厥志而早卒。孫長曰祐，字天益，號愛月，領職都差。次曰祺，字天祥，號瑞軒，領職通判，得其祿，得其名，廉公可畏，治政有方，年逾耳順，乞歸骸骨，故勅誥以還鄉，積善成德，宜永享其悠久也。益生男宗美，清白傳家，謙恭處己，以金石締交盟，以詩書立門戶，善繼人之志，善述人之事，勦業守成，實有光於前聞人矣。美生三子，長曰希禹，次曰希仁，三曰希舜，兄弟俱有文名，以仁睦族，以禮待人，若河東之三鳳，謝氏之彥秀者也。自是子孫蕃衍，食指浩繁，常於餘暇之際，從容商略，故有陸賈之分，長禹受永昌鄉濟灘居焉，次仁受永昌鄉青峒居焉，三舜受祖基家焉。禹生國賢，國賢三子曰德祥、德勝、德卿，德祥領職司舉，德勝領職司戶，德卿領職司理，德祥之子曰均治，徙泰和城南，德勝之孫曰子實，徙廬陵華美坊，德卿之孫曰子昇，徙永豐桃源，雖星羅棋布，是皆同一源也。恐後世久遠，真偽不辨，故命予修諸譜系，載諸詳悉，以見先公一人而來，迄今有年矣。雖族屬疏遠，長幼尊卑，按此譜歷歷殆可見矣。若夫水源木本，培植深固，支流柯葉，蕃衍盛大，亦在乎基之於前，而有顯諸後矣。爲賢子孫者，可不鑒哉。

龍泉縣監漕鄉舉題名引

恭惟祖宗以取士爲國，三歲大比，所謂從數路得人。古遂江，吾廬陵佳山水邑也。廬陵諸老，發身六一公，濟庵以學舍，益公誠齋以鄉舉，獻簡公以漕貢，而獻簡生遂江，文獻風流，又其最近且親者。山川毓靈，人

物代興高山仰止景行行止是爲題名引

文山先生全集卷之十

題跋

敬書先人題洞岩觀遺墨後

按先君作此詩時天祥甫七歲。後十五年。知觀任道士。始摹本以來。又越三年。以次道士朱山月。復爲軸以相遺。維先君子天韻冲逸。神情簡曠。使一日脫人事之累。黃冠野服。逍遙林下。真所甘心焉。爲子不德。使先志不獲遂。捧軸卻立。爲之泫然。

跋曾子美萬言書藁名士傳

菊坡天人文溪菊坡樣人。菊坡不可作已。願見文溪五仙如在天上。寶辰夏五。集英殿賜某等進士第。入局一日。同年曾兄子美來訪。議論慷慨。知非凡人。扣其所宗。則傳菊坡法衣。密文溪講席者也。當布衣時。春宮一疏。已能發菊坡之所欲言。他日爲天子御史。直氣凜凜。必能赤文溪幟。悠悠風塵。安得若人。寶祐丙辰。書於期集所。

跋李景春紹興萬言書藁

吾鄉布衣李君景春。上書於紹興。累累萬言。盡疏閭閻隱微之故。可謂知無不言矣。厥亦惟我高宗皇帝。

仁厚惻怛。勤求民瘼。是以旁通下情。庶幾古者詢于芻蕘之遺意。凡我有官君子。暨于國人。式克于勸。讀君之言。當時州縣間。可嗟嘆者如此。今去之百有餘年。孰知又有過於君所觀者。識者於此。又重爲世道感。

跋劉翠微罪言藁

崔子作亂於齊。太史以直筆死。其弟嗣書而死者二人。書者又不輟。遂舍之。崔子豈能舍書己者哉。人心是非之天。終不可奪。而亂臣賊子之暴。亦遂以窮。當檜用事時。受密旨。以私意行乎國中。斂弄威福之柄。以鉗制人之七情。而杜其口。胡公以封事貶。王公送之詩。陳公送之啓。俱貶。檜之窮兇極惡。自謂無誰何者矣。而翠微劉公。猶作罪言。以顯刺之。公固自處以有罪。而檜卒無以加於公。噫。彼豈舍公哉。當其垂役。凡一時不附和議者。猶將甘心焉。公之罪言。直未見爾。由此觀之。賊檜之逆。猶浮於崔。而公得爲太史氏之最後者。祖宗教化之深。人心義理之正。檜獨如之何哉。公之孫方大。出遺藁示予。因感而書。

跋繆上舍萬年論丁相大全詞案被黜爲沙溪塞巡檢

讀繆言詞案。世固有如此冤事哉。掩卷爲之太息。

跋歐陽公與子綿衣帖

東坡跋歐陽公與其姪通理書云。凡人勉強於外。何所不至。惟考之其私。乃見其僞。今觀此帖。綿衣之外。

一語不及其私。以此見前輩心事。未有不可對人言者。

跋胡景夫藏澹菴所書讀書堂字

此澹菴所隸以與壽亭者也。壽亭於澹菴爲累從弟。澹菴臨大難。決大議。不負所學。於國爲忠臣。於親爲孝子。斯讀書之所致也。公崇敍宗族。復以讀書惠幸其弟。固曰使之有所顯揚也。于其先與有榮焉。詩云。孝子不匱。永錫爾類。澹菴以之。壽亭曾孫景夫世其家。寶澹菴真墨。徹堂而新之。復其扁。用詔于子若孫。以追孝也。考作室旣底法。厥子乃弗肯堂。景夫追斯責矣。雖無老成人。尙有典刑。藏脩於此者。尙勉之哉。

跋呂逢德所收平園文字

此石刻司馬文正呂正獻爲翰苑時贊書。跋葉則鄉。衰平園周公爲直院時手筆也。平園此跋。屬意於文正之曾孫。淳熙距今幾年。善本存否未可知。而其刪改塗注。初葉爛然。則呂氏得之逢德。以示余。噫。其謹藏諸。

跋誠齋錦江文藁知瑞州日作

誠齋當淳熙之季。以少蓬出守。距今七十有七年矣。某他日嘗讀道院集。見所品題甚多。及來此。則先生一字之跡。無復存者。惟亭閣尙留其名。而屋亦化爲烏有矣。有則嶽嶽老壓。亦未知其爲當時屋否也。一日得先生錦江尺牘一帙。大率吏楷。而爲先生手筆者四。其三蓋在郡時作。其一作於還朝以後。而附諸

帙尾者典刑遠矣。於此尚庶幾見之。嗚呼。庚申一變。瑞之文物。煨燼十九。修復以來。得十年間殘編斷簡。不啻足矣。而況出於七十年之前者乎。且方其文物具備之時。此帙非郡之所得有。收拾散亡之餘。乃能有前日之所未嘗有。斯不謂之益奇矣乎。既勒諸石。書以識之。

跋崔丞相二帖

菊坡翁盛德清風。跨映一代。歸身海濱。常相不拜。天下之十。以不得見其秉鈞事業。爲無窮恨。今觀兩帖。所稱規模意向。局面話頭者。則文武之道。具是矣。一朝踐其位。固皆舉而措之者也。後書論邊計。尤切。是時楚叛矣。而公以不得盱眙爲憂。若不可終日者。嗚呼。寧知三十年後。楚之餘燼復然。而漣水之迫。乃有過於盱眙者乎。考引昔今。爲之永嘆。

跋李世脩藏累科狀元帖

國朝踰三百年。所謂進士第一者。何止百數。披圖而觀。某如何。某如何。夫人得而知之。李君世脩。先世多與其顯者游。今其家藏墨蹟。僅十數紙。而其可愛敬。可鑒戒者。已粲然可見。李君又欲廁予語於其間。不知後之視予。又以爲何如也。嗚呼。是可不凜凜哉。

跋李龍庚殿策

三代以下。無良法取士者。因仍科舉不能變。士雖有聖賢之資。倘非俯首時文。無自奮之路。是以不得不

屑於從事。而所謂文。蓋非其心之所甚安。故苟足以訖事。則已矣。豐城李君森甫。有文學。旦評所尊稱。晚乃屈就南廡。試名在第三。衆共惜之。門人好事者。取君所對策。刻諸梓。予得而讀之。君信能事矣。然由君言之。當時寸晷之筆。何啻芻狗。君姑借此脫韋布。蓋將有所行於時。而豈以是爲有餘哉。此非好事者之所得知也。君非碌碌。意積蓄必有深厚。故予獨探其心。表而出之。

跋王元高詞科擬藝錄後國正添序

我朝言治者。曰慶曆元祐。乾淳。厥亦惟歐陽子蘇公兄弟。周益國三洪氏。以其宗工大手。掌朝廷文字。以爲繚繚粉澤。功光當時。垂休無窮。豈曰小補之哉。國於天地。必有興立。而尚論其盛。則其渾厚。釀郁。光明。俊偉。百世之下。想望風采。必於斯文乎。是稽傳曰。鼓天下之動者。存乎辭。辭之不可已也。如是。往時有博學科。有宏詞科。士各知所崇尚。近世此學。澆少。於是而小詞科之制立。其望於人。甚約也。而應令者。迄亦落落。人才於是少衰矣。豫章王君義山。元高。自爲舉子時。獨有志於此。國家大制。詔大誥令。擬諸其形容者。叢鉅冊。其能出章逢。佔畢之士矣。元高登進士乙科。調永州司戶參軍。意若不自滿。謀卒業以大科致身。乃已。予謂元高。一命以上。皆將有世道之責。子歸而求之。他日中興太平之盛。所謂號令文章。煥然可述。以與三代同風者。安知責不在子。而正不必曰。吾不得志於進士。而退爲是也。元高欣然納之。遂存其說於軼尾云。

跋呂元吉先人介軒記後

巽齋先生曰。徂徠石先生名介。質肅。唐公名介。鄭公俠字介夫。半山老人字介甫。凡有取乎介者。其人必可觀也。予嘗評之。徂徠之介爲孤峭。質肅之介爲直方。鄭公之介爲敢決。荆公之介爲執拗。三公之介。純於天資。荆公之介。雜於客氣。介則一。而之所以介。則不同也。予獨悲夫。強辨堅忍。虛名僞行。介甫以誤於其君。以厲於其時。至今天地易位。人極不立。皆此介之流也。徂徠不得爲諫官。唐公爭新法不勝。發憤死。鄭以一跌。碌碌州縣。不復能自振迅。介美德也。三公得其純。坎坷於當世。彼其角血氣之私。竊名譽之盛。而遺毒迨今日而未已。嗚呼。僞行之誤人。而直道之難行。久矣。呂元吉之先人。名介軒。予不及識其人。諸君品題。類以爲言和而行果。色溫而氣剛。然則是介也。視前三君子有光焉。然君止於布衣。懷其耿耿。不見於用。則君之所遇。又爲不幸者。雖然。介在我。幸不幸在天。吾求無怍乎本心可矣。何外物之較。風氣澆薄。其能刻厲矯揉。以竊毅然丈夫之名者。已不多見。若夫以直自慰。而毀方爲圓。以就外物者。多矣。外物卒不可得。而本心空自喪失。是則介軒之罪人也。元吉重念之哉。

跋周蒼厓南嶽六圖

扶欹植傾。補空續高。吾欲觀於嵩恆岱華。其放六合於秋毫也邪。

跋李孟博東山夢境圖

昔有得湘中老人誦黃老之詩於恍惚中者。前輩謂其語非太白不能道。今圖中武士所授孟博帙甚鉅。庶幾亦有格力如此。詩者列其中乎。願出以示子。當許君親見太白。何但夢也。然萬一太白訝其孫輕發藏寶。或復遣六丁下問。泄者書何在。仍取以去。君將無以爲東山鎮。則不如勿出。

跋周一愚負母圖

己未之變。周君一愚家於狗咬石之下。最先遇禍。君從其兄。負母越溪以逃。妻子溺死。不能救也。事平。君爲圖紀其狀。諸公嘉其臨難識所輕重。褒之不絕口。予謂人子之事其親。不幸而處人事之變。急所急而緩所緩。本心之不能不爾。其於天。則蓋非有一毫之增益也。一愚之處此。豈其欲以爲高哉。正可悲耳。嗚呼。自狗咬石之失險。江右之父母妻子離散。不知幾人。覽君之圖。豈獨爲其一家哭哉。誰謀不臧。一至於此。昔魏陵繪襄樊之戰。爲于禁屈伏龐德怒罵之狀。將恥禁也。彼禁敗事者。見之宜發慚以死。然龐憤憤就殞。使其骨肉。見所畫像。尙復何忍。君此圖。一開卷當一流涕。毋爲自苦。予將請之轉示前之玩敵抽戈者。使誤國者。死有餘愧。而君其庶少寬乎。

題陳尙書昉雲萍錄

公守建陽。人和政成。皇曰來歸。從臺斯榮。我時在館。望公瓊珩。公不我選。我德公誠。公錄班如。友朋公卿。維公下士。敬附氏名。

題中書直院劉左史震孫雲萍錄

忠肅公朝人以直節名一代。今中書左史負沉厚剛峭之氣。以朔名齋。蓋於高會規矩焉。某始聞其風。今見其人。輒書氏名。昭與潔也。

跋辛龍泉行狀

予昔待罪館閣。辛君應始改官。受龍泉來訪。予語以山川風俗之故。君離坐傾聽。若謹識之。他日子持節。君適在部內。知君廉且明。於縣百姓有恩也。會予罷歸。後來者於予尋仇。幾累君。賴仁聖在上。君與予俱得免。去年予忝爲郎。君來受倅。相見甚歡。俯仰且兩年。君季子過予。則知予去國未幾。而君逝矣。君仕宦淮襄間。勤勞辛苦。德於人者深。予生晚。不及悉龍泉於父母旁。國子親友在焉。能言君終始。無一日董盪帷簿之跡。事實而有證。予是以信君之爲賢。悼君之不可作也。君季子以君狀示予。捧卷三讀。爲之哽塞。

跋蕭敬夫詩藁

累丸承蠟。戲之神者也。運斤成風。伎之神者也。文章一小伎。詩又小伎之遊戲者。秋屋蕭君自序其詩。乃有不克盡力之恨。昔人謂杜子美讀書破萬卷。止用資下筆。如有神耳。讀書固有爲。而詩不必甚神。予謂秋屋藁亦云可矣。顧何足恨哉。予聞君之爲學。沉潛堅忍。其自得者深。充而至之。有耿耿詩之上者。

跋李敬則樵唱藁

三百五篇之詩。間出於田夫野叟之作。當時樵者。固多能詩。自晉唐來。詩始爲一道。而作者有數矣。今李敬則莊翁。於詩太用工力。然猶不敢自以爲傑。謙而托諸樵。今樵安得此可人。其古樵之流亞歟。抑君嘗從蔡覺軒學。庸齋復贈詩曰。男兒不朽事。只在自身心。君生武夷山下。此晦翁理窟。山林之日長。學問之功深。君非徒言語之樵也。身心之樵。何幸從君講之。

跋劉玉窗詩文

予嘗造玉窗之廬。環堵蕭然。青山滿戶。真詩人之資也。唐人之於詩。或謂窮故工。本朝諸家詩。多出於貴人。往往文章衍裕。出其餘爲詩。而氣勢自別。予觀玉窗。不特工於詩。諸所爲文。皆嘗用意。而其爲人。又魁梧端秀。疑非久於唐人之窮。其駸駸於本朝之風氣者乎。玉窗劉氏。名芳潤。字元方。五雲人。

跋周汝明白鳴集

天下之鳴多矣。鏘鏘鳳鳴。雝雝鴈鳴。喈喈雞鳴。嘒嘒蟬鳴。呦呦鹿鳴。蕭蕭馬鳴。無不善鳴者。而彼此不能相爲。各一其性也。其於詩亦然。鮑謝自鮑謝。李杜自李杜。歐蘇自歐蘇。陳黃自陳黃。鮑謝之不能爲李杜。猶歐蘇之不能爲陳黃也。吾鄉周君。性初善爲詩。署其集曰自鳴。予讀之。能知其激揚變動。音節之可愛而已。予亦好吟者。然予能爲予之言。使予髣髴性初一語。不可得也。予以予鳴。性初以性初鳴。此之謂自鳴。雖然。凡音生於人心。其所以鳴。則固同矣。

跋胡琴窗詩卷

琴窗遊吾山所爲詩凡一卷。或謂遊吾山如讀少陵詩。平淡奇崛。無所不有。或謂讀琴窗詩。如行山陰道中。終日應接不暇。詩猶山邪。山猶詩邪。琴窗善鼓琴。高山流水。非知音不能聽。然則觀琴窗詩。必如聽琴。窗琴。琴窗胡氏名日宣。

跋趙靖齋詩卷

趙史君以靖名齋。其與世澹然相忘。而寄思於詩。有冲邃閑遠之韻。以靖爲受用也。公歿。其婿丞簿段君。哀其詩爲帙。出示於人。而公之所以爲靖者。始復表暴。由公之本心。豈計後人之知己哉。段君所爲。其盛德之不可掩也。然則其翁也。固所以爲張也歟。

跋王道州仙麓詩卷

讀仙麓詩。詩材政自滿天地間也。杜太苦。李太放。變踔厲慘慄。從李杜間分一段光霽。如長慶集中。君尊臣卑。賓順主穆。仙麓疑甚近之。香山天資。個儻樂易。其居又有疏泉鑿石之勝。與一時名輩爲宮爲商。九老圖中。槩可想見。仙麓屋九仙下。其騎氣御風。風流正自相接。至其當春陵龍蛇起陸之際。山窗畫永。石鼎茶香。微一日改其吟詠之度。是丸倒囊。矢破的。無地不然也。神人瑞士。其氣爲清淑者爲一。故心常得。其自律自呂之妙。仙麓此集。宜與長慶並行無疑。

題勿齋曾魯詩集

勿。夫子語顏以作聖工夫也。作詩亦有待於此乎。曰。詩三百。一言以蔽之。曰。思無邪。詩固出於性情之正。而後可。曾君魯擇言未爲不精。尙勉之哉。

跋惠上人詩卷

齊已賦梅。鄭谷爲改一字。師不覺下拜。子材不及谷遠甚。讀惠上人編。不能措一辭。然則谷不可於齊已之不可。子則可於惠之可。

跋道士婁君復詩卷

余去年行嶽麓下。遇山人譚彌明出處。謂八桂堯廟。有彌明題墨在焉。世見石鼎聯句。高古奇崛。謂是昌黎寓言。今觀婁君三卷。則知彌明嫡孫。正自堂堂也。何寓言之疑之有。

跋彭道士盧碧房

虛碧天夢境也。黃州之夢遊於斯。夢夢境也。志和結房於山。虛碧其顏。援黃州夢也。命子爲之辭。記累夢也。雖然。子焉得以爲夢乎。夫有大夢。有大覺。君其問諸希夷先生。

跋番易徐應明梯雲袂

易之坎。爲水爲雨爲雲。而雲之象。獨著於屯。與需。屯曰雲雷屯。君子以經綸。言陰陽始交而未暢。猶世道

方險阻之日。時則君子奮其經綸。有亨屯之道焉。需曰。雲上於天。需君子以飲食宴樂。言陰陽之氣。交感而未成雨。猶君子蓄其才德。而未施於用。時則君子養其氣體。和其心志。而居易以俟命焉。易象雲者二。一以爲君子用世之象。一以爲君子樂天之象。易於進退行藏之義。各有攸當。予聞之。聖賢畏天命而悲人窮。未嘗不皇皇於斯世。然方其初也。守其義。不隨世而變。晦其行。不求知於人。脩其天爵。無所怨懟。一日遠。可行之天下。正己而物正。而所性不存焉。嗚呼。聖賢非坐視民物之屯者。而安於需若此。則其道之所存也。後之學古者。宜可以觀矣。讀豈華梯雲帙。有感而書。

跋隆興王邦立所藏元祐關書

昔者嘗讀圻者王承福傳。見其自言操鋤以入貴富之家。有一至再至三至。而皆爲墟焉。問之。或刑戮也。或子孫不能有也。或歸之官也。圻者乘官勳。喪其土田。手鋤衣食。其色若自得。疑若貴富者不可常。而不如不有土田之愈也。今觀王氏居豫章。世守先緒。保有元祐關書。以迄于今。子孫業詩書。其門且將有興者。則圻者終身親歷之所感慨。豈真足以斷千古而信方來也邪。雖然。圻者爲不克肖者言也。予爲善繼者言也。韓公存圻者之辭。戒也。予爲王氏言。勸也。

題賈端老不忘室

凡道各有入處。凡學各有悟處。程氏以敬。張氏以禮。示人以從入也。而游於程張之門者。或得於靜坐。或

得於主一。或得於去一。矜字悟之不必同也。凡入皆以悟。凡悟皆可入。鹿巖賈君。得不忘二字於水心先生之詩。以名其室。先生之詩。崇好脩而黜徇外。賤決科而尊天爵。一則因言而有悟。一則因悟而示之以所入。師友淵源之懿。去之幾年。猶將見之。今其孫子純。寶其祖訓二字勿替。引之知悟幾矣。讀水心詩。尚求所以入門也哉。

題張德從畏心堂

德從取其家橫渠翁畏心一語爲心法。稱鄉前輩。其子希明肯堂。取而名諸爲家法。稱賢士夫。抑天下危莫危者心。天下樂莫樂者心。操而存之。防其危。優而柔之。會其樂。德從講學無不盡。希明有所受之矣。

題戴行可進學齋

乾稱進德者三。而象曰。天行健。君子以自強不息。聖人復甲之曰。終日乾乾。行事也。君子之所以進者。無他。法天行而已矣。進者行之驗。行者進之事。進百里者。吉行三日。進千里者。吉行一月。地有遠行。無有不至。不至焉者。不行也。非遠罪也。戴君行可以進學名齋。垂二十年前之進。予不得而考也。後之進。予不得而量也。獨有一言。願獻於君者。曰。行。行固君字也。書曰。行之惟艱。語曰。行有餘力。中庸曰。利行曰勉。行曰力。行皆行也。皆所以爲進也。不行而望進。前輩所謂游心千里之外。而本身卻只在此。雖欲進焉。得而進諸。戴君求進者也。而予言。行。予將有遠役。其知行之理。固審君之俯仰是齋也。其亦反覆於字之爲義也。

哉。

跋周應可爲蔡德夫千藥物日子後

蔡德夫病且貧。硯庵周應可過而顧之。曰：是不可坐視。問藥於所知。斯可謂知義之士矣。予方杜門守約。於所親厚。未能以徧愛。其何力及此。顧友道久薄。硯庵能崇篤如此。是亦足勸厲薄俗。敢不罄竭以爲之。從史云。

跋彭和甫族譜

莆中有二蔡。其一派君謨。其一派京。傳聞京子孫慚京所爲。與人言。每自詭爲君謨後。孝子慈孫之心。固不應爾。亦以見世間羞恥事。雖爲人後。猶將愧之。彭和甫之派。來自博士齊。非玠後也。今其譜牒。併二族爲一本。爲君謨之後。而引京以混之。人情固大相遠哉。予聞晉沈勁恥其父陷於逆。致死以滌之。卒爲忠義。唐柳玘有言。門地高者。一事墜先訓。則無異他人。是以脩己不得不至。諸公皆勸和甫以自立。和甫而祖玠。猶當爲沈勁。和甫而祖博士。柳玘之言。得不勉乎哉。

跋吳氏族譜

自魏晉以來。至唐最尙門閥。故以譜牒爲重。近世此事寔廢。予每爲之浩歎。今觀吳氏譜。源於禾川之燕。市。派於西昌之白沙。自宋興以來。衣冠燦然。蓋升學者。二十有二。舉於鄉者。五十有七。薦於漕者。三。奏於

禮部及精究科賢良科者九而特科恩封世賞拜爵者又三十有四人盛哉可觀矣自昔以知力持世功利起家有道所忌傳不數世惟詩書之澤綿綿延延愈久而愈不墜赫赫而顯孰與循循而至者哉天下之理可久者必可大吳氏代有人焉其將有尤者出以其時可矣

跋楊宰記曾氏連理木

右連理木記誠齋先生叔父百里君筆也。乾道距今幾年。墨跡如新。曾氏之父祖子孫其藏之也謹也。季淵來京師。携其所謂連理圖。及諸名公詩記。凡一軸。而是記編於圖詩之間。季淵蓋將求表章於當世之有道。以廣大其瑞。以昌其先志。會有取之以往。而鄰火夜不戒。是軸併以煨燼。季淵悼前輩之不復作。而家世百年之寶。一朝而失之。蓋於是記重致意焉。初予讀其文。愛之。命吏私識之。別帙以備遺忘。季淵不知也。及善本羽化。而楊子精神心術之燁然者。獨在吾帙間。曾氏之故。穩似墜而不墜。猶賴有此。則予昔也。讀而愛之。愛而識之。固默有以開其衷者。夫物之存亡。莫不有數。而其既亡而不遂亡。不存而復終存者。雖人力之偶及於是。而識者不敢諉之於數之外。季淵喜予存曾氏之舊。就俾書之。而予亦自以為有功於楊子。不敢辭。季淵得此於鬱攸。當無所憾。楊子而知斯文之不泯也。吾知其亦為子欣然矣。豈獨木哉。

跋彭叔英談命錄

命者令也。天下之事。至於不得不然。若天實使我爲之。此之謂令。而自然之命也。自古忠臣志士。立大功業於當世。往往適相解后。而計其平生。有非夢想所及。蓋不幸而國有大災大患。不容不出身扞禦。天實驅之。而非夫人之所欲爲也。當天下無事。仕於是時者。不見兵端。豈非命之至順。蓋至於不得已而用兵。犯危涉險。以身當之。則命之參差。爲可閔矣。士大夫喜言兵。非也。諱言兵。亦非也。如以爲諱。則均是臣子也。彼有王事。執掌不遑啓居。至於殺身而不得避。是果何辜。吾獨何爲而取其便。如以爲喜。則是以功業爲可願。嚶嚶然利天下之有變。是誠何心哉。是故士大夫不當以爲諱。亦不當以爲喜。委質於君。惟君命所使。君命卽天命。惟無所苟而已。星翁曆家之說。以金火羅計。皆爲主兵之象。遇之者。卽以功業許人。十一曜之行於天。無日不有。無時不然。人物之生。亦無一日可息。事適相值者。亦時而有之也。治亂本於世道。而功業之顯晦。關於人之一身。審如其說。則人之一身。常足爲世道之軒輊。有是理哉。聖賢所謂知命俟命致命。皆指天理之當然者而言。是故非甘石所曉。彭叔英。儒者也。而星翁曆家之說。尙不免膠固。歐陽巽齋先生。旣具爲之辨。予復備論之。叔英持以復于先生。

跋王金斗談命錄

萬鍾浮雲。我有靈龜。季子伯仁。得印奚爲。俛仰利害。桔槔夏畦。彼昏不知。彼昏不知。噫。王君又從而鼓之舞之邪。

跋劉父老季文畫像

州有父老員若干。月給糜俸若干。太守歲二月出郊。號爲勸農。則召是二三父老者。俾聽勸戒之辭。吾農實無所聞。其代而聞之者。斯人也。田里有疾痛或水旱。則父老以其職。得轉聞之。長民者。然則其事亦不輕矣。劉季文齒望八袞。蓋父老之一。以一州之人。高年者蓋多矣。而劉得以壽考。隸官之籍。且其得祿如在官。晚節有光焉。一日。以其喜像來求贊。予觀其田里淳龐之狀。山林朴茂之氣。得壽於世。非曰偶然。嗚呼。燄肩火色。騰上必速者。非人間永器。虎頭燕頤。當封侯萬里外。亦幾勞苦拂亂之甚。劉雖貌若甚朴者。然終身田里。無辛苦之態。以至於壽富貴之樂。願足易康寧哉。是亦云足矣。予未暇贊。因備誦其爲人。聞者倘有利於斯言乎。

跋李氏譜

族譜昉於歐陽。繼之者不一而足。而求其鑿鑿精實。百無二三。原其所以。蓋由中世士大夫。以官爲家。捐親戚。棄墳墓。往往而是。雖坡公不免焉。此昌黎公所以有不去其鄉之說也。友人李希元。示予家傳。自唐西平忠武王子憲。至其先人十數世。墳墓皆在目睹。亦可尙哉。使昌黎公見之。亦將以美楊少尹者美之矣。予家本石室。蓋無可疑。而自出蜀以來。未免與蘇公同是一概。方擬乞身後。卽六七世墳墓可考者。取蘇公族譜引而損益之。使世之子孫。執爲典要。且以楊侯不去其鄉而未能也。觀李氏之族譜。重有感於

昌黎之說云。

贊

巽齋先生像贊

歐陽巽齋。望宗六一。辛丑擢科。親老謝職。色難愉悅。思報親恩。學通經史。有本有根。司戶虔州。化彼蠻貊。別駕建昌。益樹名節。轉官秘著。不爲苟諛。說書崇政。講貫唐虞。都官刑曹。識獄詳備。考文成均。濟濟多士。疏抗龍顏。宜絕嗜好。欲心一萌。良心隨耗。天子嘉納。年高與祠。橫經論道。一世宗師。及門之徒。不將卽相。河汾王通。雲龍下上。名齋以巽。殊非過情。六一之學。實傳先生。

贊龍知縣龍

龍猶有欲。垂頭就象。孰知吾龍。頭角霄漢。舜卿之筆。子輝之德。往來清風。霖雨八極。

贊程縣丞龍

蟄于滄洲。驥于海垠。憫四域之焦枯。遞奮瓜而張鱗。固將神變。化水下土。豈直噴蛙躁蟹。役役於形氣也邪。

贊何了翁帳龍

澗盤其真。雲發其神。爲道不泥。遇止乘行。是爲龍之靈。是何君之所以名。

贊三山莊之龍魁星

太極初開。卽有星紀。字始蒼頡。科始漢氏。後人因之。爲鬼爲斗。乾元坤元。非德非有。謁哉莊君。明辨密察。在邦必達。在家必達。

贊沈俊之筆

厥體孔良。厥心孔端。資汝心匠。達我心官。

自贊

孔曰成仁。孟云取義。惟其義盡。所以仁至。讀聖賢書。所學何事。而今而後。庶幾無愧。

銘

彭叔英砥齋銘

爵祿之石。厲世磨鈍。頑夫奔走。廉隅蕩盡。中流之柱。障山回瀾。岩岩具瞻。千古如山。嗟今之人。模稜義利。金銀銅鐵。攪爲一器。淬去穢濁。刮出光明。他山之石。有如斯銘。

黃山人羅鏡銘

陟彼高岡。相其陰陽。因以篋之。終然允臧。

辭

劉良臣母哀辭

維婦德之中正兮。防乎人彝。彼美其盛壯兮。甘白首於一婺。夫仁者必有壽兮。及耄而望期頤。夫有德者必有後兮。紛四世其蕃滋。嗚呼。全而生之兮。必全而歸之。從一以終兮。尙得正其何悲。

贈人鑑蕭才夫談命

歲單閏。人鑑蕭才夫過予。以予命推之。言頗悉。是秋迄次年。予所遭。無有不與其言相符。噫。人鑑其神已。爲之辭曰。眇陰陽之大化兮。布漫垓垠。出王游衍之度思兮。曾淺淺乎爲天。自青紫食窮經之心兮。惟詭乘之而相撻。竊掠五緯之廣兮。誑其愚以自賢。方疾其拂耳。騷心兮。羌作炳於眇綿。將事實與行會兮。抑扶幽而鈞玄。予將窺前靈之逸跡兮。就有道而正焉。

鄒翠屏改葬哀辭

霜露成冰兮。寒谷悲陽。春歸兮。草萋萋。君一去兮。何之。造舟爲梁兮。車馬悠悠。朝出遊兮。暮歸休。君一去兮。誰留。君故人兮。如雲。白髮兮。繽紛。高臺曲榭兮。如昨。歌舞兮。成陳。君自蒔兮。桂花。昔芳稚兮。今婆娑。秋香飄九霄。君不見兮。奈何。

吳伯海自號滄浪爲徐徑販所喜携諸公詩來訪因有感作滄浪歌并呈巽齋先生

世混濁而不清兮。蟬翼爲重。千鈞爲輕。彼滄浪其無據兮。何纓非足。何足非纓。嗟靈均之好脩兮。安能受

物之汶汶，掘泥揚波以相從兮。羌不知漁父之用心，筦爾而歌，鼓枻而行。噫，漁父其何如今，掉頭乎靈均。

說

答歐陽秘書承心制說

龍溪友議好事者爲之，不知其誰何也。巽齋歐陽先生爲之辨，以書來曰：君所處變之又變，而或者於無過中求有過，援經引古，皆不類。而又毀木摹紙，流傳四方，莫曉用意所在。君於國於家，公私得失，自了然於心，雖不必較，畢竟此於世教人倫有關繫，不可以流俗誤方來。所以怫然不能自已於言也。嗟夫，先生所以主張名教，愛惜後學，至矣。抑先生就其爲說，區別禮文之隆殺，極其精微，只如此，固以明甚。然兩家事實，猶有非先生所盡知者。若某初於倉皇中處此，則不過從吾事實，順事理之本然者而行之，固不待如此鉤索精微，而其當然之路，自燦然可見也。初，此母嫁先伯祖，生男三，長曰行，是爲先伯，次爲先人，又次曰信，是爲先叔，女一，是爲吾姑。先人生歲餘，嗣先祖後，先叔既生，而伯祖方歿，已卯而後，此母適劉，鞠劉前室之子，曰敏，曰午，而自生二女一男，二女今各有歸，男曰欽，出繼於黃塘劉氏。在文在劉，通男女爲七，非適劉之日，淺於適文，文有子而劉無所出也。當先祖存，先人篤於生母，則衣食敬共之。丙午，先祖歿，先人始迎致就養，然劉之子，諱得不養之名，歲暇取養二三月，至丙辰以後，某甚專其養，而歲時劉之子孫族黨，絡繹起居，曰母也，伯叔母也，祖母也，伯叔祖母也，此母非以在文而諱其在劉，劉亦非以其在文

而不之母也。當其在文。特文有能養之資。得以遂其敬愛之情。而名義之爲劉。自若也。是以歿之日。其子午。其孫伯參。奔喪于西昌。其二女各以遠近來赴。其劉之族黨。縞素哭候於道。書銘旌曰。劉吾鄉人見者。以爲是固當然。無所不安也。固非曰未屬纊爲文。既屬纊而名之曰劉。而制禮爲是嚴也。彼好事非爲文。爲劉之族黨。媼親。又非里巷父老知事之悉。主於騰謗。故亦不問事實如何。而侮經慢法。苟可以媒藥者。不遺餘力。若曰文致綱常之說以壓之。則可覆其終身云爾。險哉其用心乎。先生辨之。得其槩矣。要其肯綮。數語可以破之。彼之說曰。在某當書申心制。姪孫而銘旌。當書故伯祖母某氏。此十一字。殊不類學者語。此母從其實。則先人本生母也。平居無所於名。則從其前日之位曰伯祖母。如以義斷。於稱謂亦恐未安。而欲自名曰姪孫。得乎。心制而曰申。稽之禮律。曰子爲所生父母也。曰弟子爲師也。苟曰姪孫矣。則何爲下得申心制三字乎。劉午之於几筵。書曰先妣某氏之靈。而書疏謝其鄉人。自書曰孤哀子。劉某以孤哀子。爲妣作喪主。不爲當。乃欲書姪孫。以主伯祖母之喪。語之三尺之童。然乎否乎。以四十七年。婦于劉母于劉。而一旦瞑目。乃使之不得爲劉母。則劉之子若女。哭劉母乎。哭文母乎。使劉之廟祀文母乎。祀劉母乎。且夫在文氏。則生先人而出繼於先祖。在劉氏。則生欽而出繼於黃塘之劉。其事體一也。今欽爲人後。不得而服本生母。亦止於申心制。某方之於欽。情義若何。而曰意其必衰麻其服。乃寂無聞焉。何其無稽之甚乎。親喪人所自盡。以義起禮。此母爲先父本生母。在先父不及申心制。在某遂承心制。吾所自盡。

何與乎。或人而或人詆毀之至此。某非惟不必辯彼亦不足辯也。獨此心不可不明於先生。故具述於此。以復命而不傳焉。

吳郎中山泉說

子在川上曰。逝者如斯夫。不舍晝夜。道體流行之妙。往來而易見者。惟川流爲然。聖人發其端倪。欲學者體認省察。而無一息之間斷也。後千數百年。程子始默識而指以教人曰。其言只在謹獨。聖人言道之旨。學者入道之門。於是而深切著明。尙書郎吳君正夫。名蒙。因名取象。有合於下坎上艮之卦。遂自命曰山泉。君所以從事。則又取二程上蔡和靖晦翁凡諸言敬者。識諸座右。易以養正爲聖功。而養之方。未之及也。吾獨見自得。乃從敬入。則豈泛然而用乎。吾力也歟。夫川之水。道之體也。山之泉。性之象。是故善盡道者。以敬而操存之。則猶之川而不息焉。善盡性者。以敬而涵育之。則猶之泉而不雜焉。蓋有欲則息。惟敬爲能不息。有欲則雜。惟敬爲能不雜。君之所以見易。其猶程子之所以見夫子歟。雖然。川上之事。純亦不已。誠者之天也。泉猶性也。泉動而出。猶性動而爲情也。是則有幾焉。誠無爲。幾善惡。始以敬而持此幾。終以幾而達此誠。則山泉其川水之源。川水其山泉之流。會而通之。混然一貫。故曰。敬者。聖學成始而成終者也。君講切熟矣。愚也不敏。方願學乎此。尙從君質之。

徐應明恕齋說

自漢儒以大中調極而極之流遂爲苟容。至先儒以極爲四外標準而學者始知極。自唐儒以博愛謂仁而仁之道遂爲小惠。至先儒以仁爲包四德而學者始識仁旨。漢晉以來有恕己恕人之說而恕之弊遂爲姑息。至先儒以恕爲如心而學者始明恕。聖人浸遠道學無傳於是漢人之中庸唐人之模稜皆足以自附於此三字之義。天下不見聖久矣。尙賴伊洛諸君子出而抉聖經千載之秘而後之學者遂得襲其遺餘以求進於道。番易徐君應明有志於學特以恕爲入門則其幸生於道學之世而不至涵忍混貸以淪於漢唐之陋也。審矣。雖然如心之事亦有所用力焉。按傳專言恕者其事有二。子曰己所不欲勿施於人大學言上下前後左右有絜矩之道。此言如愛己之心而愛人者也。大學言有諸己而后求諸人無諸己而后非諸人。此言如治己之心而治人者也。然而如愛己之心而愛人則先儒必歸之窮理正心。如治己之心而治人則先儒必以強於自治爲本。蓋未能窮理正心則吾之愛惡取舍未必得正而推己及物亦必不得其當然。未能強於自治則是以不正之身爲標的將使天下之人皆如吾之不正而淪胥以陷。則吾之爲恕者豈不相遠而吾夫子所謂終身可行者豈若是哉。故夫論語一貫之恕中庸達道不遠之恕又必以忠並言。蓋惟忠而後所如之心無往非正而凡窮理正心強於自治皆求以不悖乎忠而已也。抑予聞之論語之忠恕至誠無息而萬物之各得其所也。聖人之事也。中庸之忠恕盡己之心而推以及人也。學者之事也。吾儕小人由前之所以用力者求之以進於中庸之忠恕則聖人忠恕之天豈曰己

之非薄而無足以進諸曾子之唯哉願與徐君講之

勉耘說

百聖在天六經行世譬之五穀皆美種也錢鏐必痔茶蓼必薶既堅既好實穎實粟不然略閩蜀之躡鷗拾燕趙之棗栗而吾未嘗不飽也嗚呼此豈樂饑常法哉彭君奇宗之爲學也知所以種而以勉耘顏其堂其必自五穀始是穠是養必有豐年奇宗候之

何晞程名說

予同年何君時任廬陵縣尉尉廳洛人太中大夫程公瑀嘗辱居之後人爲建公祠又建堂曰晞程志遺跡也何君生子吏舍溫公之父生於池溫公生於光名之所起率從其地君之名子以吉宜也而官於吉者多也顧瞻斯堂取義甚大其當名之以晞程程本爲太中設何君名其子則以太中之子望之微說於予予曰大哉名乎其何如而塞之哉漢司馬墓蘭相如自名曰相如本朝有錢希白之類希樂天者也功名文藝之士事爲之相迹筆墨小技抵掌馳志刻心苦思步驟之不難若夫正心脩身窮理盡性通天地之化達聖賢之蘊如程夫子者其何以望於孩提哉雖然大中之在黃陂二夫子生焉其初固亦區區一尉之子耳洎其來廬陵二夫子年甚幼則亦童蒙也初何以自別於常兒然其後受學於春陵追繼孔孟卒以其性命道德之說爲諸儒倡聖賢豈別一等天人爲之苟有六尺之軀皆道之體不可以其不可能

而遂自暴自棄也。且夫昔之爲程也難，今之爲程也易。中庸之學，千數百歲不傳，二程獨發關鍵，直睹堂奧。此其事百倍其力而後能。今讀程之遺書，考程之行事，作聖塗轍，瞭然可尋。一日用力，事半功倍。吾儕小人，獲生斯世，講聞私淑之緒餘，非如漢唐儒者之寡陋蒙蔽福澤，深自慶幸，不敢以不自勉。况夫青原之山川不改，少府之堂宇如故。二程事親從兄於此，誦詩讀書於此，思其居處，思其笑語，思其志意，思其所樂，思其所嗜。百世之下，居乎此者，猶聞風而起。況去之二百年之近乎，此何君義方之所爲汲汲也。至於晞程之工夫，當自主敬入。然此大學之事，今其爲赤子，何君養其氣質，莫重於習。古有胎教，況於襁褓。自其能言能行，以至於入小學，使之灑掃應對進退周旋，先知所以爲敬。周匝而無欠，深穩而有本。然後可以語晞程之事。習於上則上，習於下則下，是一幾也。何君謹之哉，謹之哉。君字了翁，臨川人。晞程生己未三月。

王通孫名說

王君元剛生子，名曰通孫。初元剛夢有通守來謁，排闥入堂，闔驚寤。已而左右遂有娠，既生，名之。志所夢也。予謂元剛名子之義甚大，而其有意於斯夢也，殆不其然。人者，天地之德，陰陽之交，鬼神之會，五行之秀也。人以其血肉之軀，而合乎太虛之生氣。夫然後細縕化育人之質已成，而健順五常之理附而行焉。其聚也翕然，其散也霏然。天地之化，盈虛消息，往過來續，流行古今，如此而已。輪迴之說，佛者有之。苟自

孔氏不當以爲信然。且夫人有此身，卽有此理。詩曰：有物有則。孟子曰：形色天性也。聖賢之學，主乎踐形而不願乎其外。元剛之教子，望之以通於性命之正，以無負乎天之所以與我者。其獨善也邪？其遂符所夢也邪？其復過之也邪？皆非所必計也。人之得形於父母，而毋忝爾所生，遠不離道，窮不失令名，決性命之情，以饗富貴，富貴未必可得，而性命已失其正。此天下人子所以陷於失身者多矣。不敢不勉而有知也，不敢不告諸爲人子者。元剛爲人之父，亦爲人之子者也。其達此悉矣。予也言之，其子之長也。庶幾其有聞乎？因預定其字曰思，爲其長子也。以伯冠之。濂溪著書曰：通微生於思，不思則不能通微。嗚呼！思則得之，人人有貴於己者，弗思耳。尙勉之哉！元剛名義端，豐城人。通孫生戊午，今四歲云。

陳逢春肖軒說

陳逢春景茂，芥軒先生之子也。芥軒名鳳，官至朝奉郎，監行在豐儲倉，其爲人剛直有守，與趙東野齊名於玉虹翠浪間。平生游吳，履齋包宏齋嚴華谷諸公之門，諸公器之不置也。未及用，不幸蚤世。景茂幼孤，長而有立，自號曰肖軒，有志乎其先人也。夫孝者，善繼人之志，善述人之事者也。世之所謂狼疾人不肖子，豈其性然哉？志不存焉耳。志之所至，事亦至焉。夫肖之道，亦不一矣。奮建肖其性者也，談遷肖其業者也，彪固肖其文者也，義獻肖其書者也，環頤肖其位者也。凡爲人子者，苟有一節不忝乎其前，其亦無愧於名父之子哉？蠱初九之象曰：幹父之蠱，意承考也。易之所謂意，景茂有之矣。書曰：若考作室，厥子乃弗

肯堂景茂必無是也。尙勉旃哉。

送呂元吉麥舟說

呂元吉。廬陵之名族。東萊之近裔也。皇皇充充。以母喪淺土。未畢大事。將以石曼卿自命。而求以忠宣麥舟之事望於人。自薄者而觀。今世可復得麥舟乎。以愚論之。麥舟固可復得。借令不得。聚麥成舟。猶可及也。傳曰。凡民有喪。匍匐救之。又曰。孝子不匱。永錫爾類。中文獻前輩典刑。遐乎邈哉。不可尙已。然親親以及物。愛其父母以愛人。人心天理。油然而於不忍人之際者。豈以宇宙隔。古今間哉。呂君行矣。昔人有言。子毋謂秦無人。

龍泉縣上宏修橋說

修橋闢路。佛家以爲因果。世之求福田利益者。所以樂爲之趨。而佛家者流。所以積心竭力。勤苦奉承。而不之厭也。予過泉江。道上宏。聞有郭公者。主石橋之役。蓋毀家以成之。而僧曇發則朝夕爲之督。其事頗難。其力不倦。其心蓋可取焉。邀予爲之疏。惟予不得以預斯舉也。郭老矣。迫於其請。則念儒書中是亦爲溱洧濟人之事。雖其事之偏。而視夫拔一毛不以利人。而但賸人以肥己者。爲有間矣。郭公之所爲若此。是邦之人若士。觀感動悟。其能以自已於心乎。夫善者。性之所自然。爲善者。人之所同欲。罔俾郭公專美是邦可也。而豈必曰福田利益之故哉。因書以畀曇發。使持示邦之可語者。

葉校勘社倉記

社倉之法。阜陵下之四方。而周人委積之意。復續於二千歲之後。文公請也。公畏天命。悲人窮。汲汲焉於當世。天之所以予之者不輕。而得於其時者復厚。天其有以行之也。校勘葉君重開。無一命爲之階。而倡率同志。嘉惠閭封。已能鑿鑿精實。使君得志於世。文公之議。將次第而充之。昔劉焯僉判時。得俸不以自贏。輒買田贍族。或謂范文正公此志三十年。非參大政。則有不愜焉者矣。焯爲小官。乃能隨力爲義。可不謂賢乎。焯之於文正。君之於文公。事有大小。世有難易。心之所推。則吾無間然矣。君雖布衣。尙何不滿足哉。

與濟和尙西極說

天有南極北極。北極天帝所居。南極惟南海上。髣髴可見。非天之南北也。自中土而論。爲人世南北之極耳。天之所極。實不可知。淮南子言。禹使大章步自東極。至於西極。豎亥步自北極。至于南極。此亦姑舉地之極而言。觀禹貢所載。禹跡不爲甚遠。淮南子之說。信有之乎。惟漢張騫。曾窮西方幾萬里而還。不知是時。騫何以未嘗及佛土。後佛自西域來。又不知佛生處。與騫所經歷。相隔幾何。敢問濟和尙。西方有極處。無極處。作麼生。和尙未對。旁有童子謂予曰。日入處。不知去人幾千萬里。吾舉目卽見。吾不學佛。佛何必西方。和尙合掌作禮而退。

慧和尚說

予里南禪寺上座曰慧。慧早爲通人。得畫法於里之名手。挾是出四方。會留京師。復得相與傳神法於異人。自此覽觀山川之勝。游歷人物之會。足目高遠。迥長數格。既數年。厭薄世俗。謂天下事止如是觀。不如削髮。遂爲僧。蓋收湖海豪氣。一歸山林者也。然技養卒不能自禁。歲爲星源神像軸若干。春夏輒有遠役。初鬻本祠下。神與慧若相宜者。大家豪人見輒動心。齎齎不愛金緡。以致之。得之者咸指目以爲川僧所爲。自是四方游山上者。無畫以歸。謂爲徒行。爭致饋餼中。約隔歲取償。慧輒如期往。謹曰。川僧來矣。取畫者填門。慧徐開篋筒。如約分付。不半日。畫盡矣。若是者。年久遂爲例。今人親戚交友之間。才有一錢利害。寄諸其手。皇皇然惟恐人負之。以數千里不相知之僧。相期於一歲之外。求之也若懇。寄之也如棄。人情豈大相遠哉。藝之動人。一至於此。慧之畫。其流傳多矣。獨相與傳神。祕其術不輕售。間與予言相。頗肯傾臆。事多如其言。然每會聚。輒睥睨不已。予知其欲傳神也。越數年。竟不下一筆。予今年偕弟過山中。坐定。慧忽躍然起。倉皇索筆。不再注視。描畫不踰刻。而予兄弟二人歛歛之狀。已宛宛如活。一坐烘堂。一日用緡一幅。置予於前。予弟於後。冠八角巾。着道服。前者垂臂以執袂。後者斂手以銜袂。又作幼弟背像。手持孝經一卷。上紀移忠孝一章。若將獻諸二兄。左爲海潮。洶湧澎湃。濤頭有數丈之勢。一金龜隱見。出沒於沆漭之間。題曰忠孝歸朝。慧之用意亦勤矣。因聚觀者與慧共評之。爲之大噱。迺指潮而言曰。子寧駕絕。

海之颿以突魚龍之變。惟乎將極目於南甌北結。望洋而不濟乎。寧揚清激濁。以吊鴟夷子之遺乎。將波流澗趨。以嬉戲於杭人之旗鼓乎。寧依乘於鯨遊鯢化之會乎。將有醜有腥。有滑有膩。姑苟膳羞。以自活乎。寧涸不已。以取衝擊乎。將知止知足。與汐水俱爲縮乎。寧與波上下。屑屑於朝夕之往來乎。將觀陰陽之進退。察日月之盈虛。翔遊於六極之表乎。質之子弟。子弟笑而不言。問之慧。慧曰。區區何足以知之。子於是服慧之得子貌。而知慧之猶未得子心也。因爲紀其能事之本末。以謝其勤。并具子之所以言者。噫。亦安得知心之士。而與之語哉。

深衣吉凶通服說

深衣篇大槩三節。第一節言其制。短無見膚。長無被土。以下是也。第二節言其義。規者行舉手以爲容。以下是也。第三節言其用。可以爲文。可以爲武。以下是也。此雖三節。然畢竟義爲之主。故篇首曰。以應規矩繩權衡。其文坦易明白。前輩解之悉矣。獨吉凶通服。猶有可疑。或謂考之本篇曰。可以爲文。可以爲武。可以擯相。可以治軍旅。而不曰。可以吊喪。可以受吊。曰善衣之次。而不曰喪服之次。雖其間有孤子。則純以素一語。近於喪服。則又曰。鄭氏注年三十以下無父稱孤。則是無父而服此衣。當用素純耳。非孤子於居喪之中。可以此代喪服也。其必以爲吉服之說如此。然愚嘗參互經傳。博采旁證。則此雖吉服。未見其不可通於凶事。按檝弓。將軍文子之喪。旣除服而後。越人來吊。主人深衣。練冠。待于廟。垂涕洟。注云。深衣練

冠。凶服變也。蓋既除喪，則不當復衣喪服。故以深衣受吊，以喪服一變，而即用深衣。則深衣雖謂之喪服之次，可也。雖與善衣之次之說相反，正足以見其互相發明耳。按曾子問：親迎，女在塗，而壻之父母死，如之何？孔子曰：女改服布深衣，縞總以趨喪。注云：婦人始喪，未成服之服，蓋成乎婦，則成乎婦服，惟其未成婦也，不可以衰，故趨喪以深衣。然則此亦凶服之變也。今世女子未聞有服深衣者，然以此事考之，凶事而可服，其服於吉事可知也。注云：禮教久廢，故女遂廢此衣耳。按雜記：大夫卜宅與葬，曰：有司麻衣布衰。注曰：麻衣，白布，深身而著衰焉。此服非純吉，亦非純凶也。夫衰，凶服也。深衣，吉服也。衰之下有深衣焉，故非純凶。深衣之上有衰焉，故非純吉。由此論之，深衣不專用於吉事，又可見也。按問傳：大祥，素縞麻衣。注云：麻衣，十五升布，深衣謂之麻者，純用布無采，飭也。蓋大祥已除衰杖，本須服吉，然使便用采，飭之服，則孝子之餘哀未忘，必不安於此。故魯人朝祥而暮歌，子路笑之。有子既祥，而絲履組纓，記禮者譏之。此所以用深衣者，蓋在不衰不采，飭之間也。按喪服記：公子爲其母，麻衣纁緣。注云：麻衣，小功布深衣，以麻爲小功布者，以大功降云。公子之庶昆弟爲其母，若父卒，爲母大功。父在，降大功一等，用小功布深衣。以此證之，深衣固爲大祥之服，而亦爲小功之服。但大祥緣以布，小功緣以纁耳。夫以深衣正篇，本專爲吉服而言，然略以此數節推之，其於凶服亦自可通。大槩喪服皆用布，而以精粗爲輕重之等。鄭氏云：深衣用十五升布，緞濯灰治，升八十縷，則是千二百縷爲經。此今世極細之布也。然則深衣之所以爲吉服者，以

其布之精密。又布易得而難損。取其貴賤。可以通服。經所謂完且弗費。注所謂可苦衣而易有者也。而揆之喪服。則用布適同。而爲色又相似。且經鍛濯灰治。故止可用於服之輕者耳。非如他衣服。用繒帛采色。則專當施於吉。而不可通於凶也。此正如近世涼衫耳。阜陵以前。士大夫皆以爲會聚之常服。其後遂於吊喪用之。則亦以其顏色可通之故。正此類也。但是深衣之制。領緣不同。其間純以續者。乃是以盡飭爲美。此恐專爲吉服。而不當與凶服通。至於用素用緇。自是喪服本色。獨用青者。則通於吉凶之間。皆無舛耳。若夫冠屨一節。卻欠商議。今人謂服深衣。必須用某冠某屨。此恐未明。蓋冠屨之制。深衣正篇。既不會見明言。而其散見於他傳者。其冠亦各有變。如將軍文子之喪。主人深衣練冠。是受吊之時。方用練冠也。其施之吉。則固有他冠矣。如女用深衣之縞總。則趨喪而後變用縞總也。其在平時。必他有以爲之總者矣。又如漢制。乘輿服深衣。則用通天冠。高九寸。是天子而後有此冠也。推而下之諸侯大夫士。以至庶人。豈當拘於一冠矣乎。切意深衣。有一定不易之制。而本篇所以不載冠屨者。恐冠屨當是從時耳。何以辯之。夏之冠曰毋追。殷之冠曰章甫。周之冠曰委貌。又曰元冠。三代之冠。其制已各不同。有虞氏深衣而養老。則深衣自虞氏已有之。此時自須用虞氏之冠。尙不及有三代之冠也。又安得所謂某官者。以是推之。深衣則古矣。而冠屨則無定制也。孔子少居魯。衣逢掖之衣。長居宋。冠章甫之冠。衣少所居之服。冠長所居之冠。二者參用。各隨其宜。初不必曰魯服則魯冠。宋冠則必宋服也。以聖人之於時。且然。況今世而服。

深衣者其爲冠屨也。既不載於經。則其隨時也爲得矣。必欲用某冠某屨。則恐又失之泥也。然則所謂隨時者。宜何如。其以深衣爲吉服。則今之緇冠爲不必易也。如其以爲凶服。則受吊者。固當以櫛弓練冠爲法。而往吊者。亦須如之。玄冠不以吊故也。嗚呼。禮之時義。大矣哉。器數之精微。制度之詳密。雖以夫子之聖。不敢自謂生知。而屈意於一問。區區何人。乃敢率其胸臆。評論千載之上。多見其不知量也。雖然。亦識其所見云爾。尙以俟有考者。



新竹女中圖書館



008981

